




LIBRARY
OF THE
UNIVERSITY
OF ILLINOIS

Emblems

60

Page 84 n° 346



ms



Emblemata
FLORENTII SCHOON-
HOVII I.C.Goudani,
Partim Moralia
partim etiam Civilia.

*Cum latiori eorundem ejusdem
Auctoris interpretatione.*

Accedunt et alia quædam
Poëmata in alijs Poëma-
tum suorum libris non
contenta.

AMSTELODAMI.

Apud

Joannem Janssonium. 1648



Amplissimis, Prudentissimisque Viris,

D. Prætori, Consulibus,

Scabinis, ac universo Senatui in-
clytæ Civitatis Goudæ,

FLORENTIVS SCHOONHOVIVS

hæc

Dicat, Sacratque.



Ravissimè & prudenter à præstantissimo Philosopho litteris proditum est, Viri Amplissimi; Quales in Republicâ moderatores sunt, tales reliquos solere esse cives. Etenim cum vita Regentium publica censura sit, ea-que perpetua, & generosis ingeniis non tam imperio opus sit, quàm exemplo, ipsi gubernatores factis suis præeuntibus, quæ sunt blandissimum jubendi genus, subditos suos in officio continent, ipsaque æquitas & ratio omnes bonos adhortatur, ut legitimam eorum potentiam, atque auctoritatem, quibuscunque rebus possint, tueantur, ac revcreantur. Videmus, ubi mens sana viget in sano corpore, vigere quoque, & effulgere admirandas ejus functiones: sic Civitates, si prudenti eorum, qui ad publicum clavum sedent, ductu & auspicio regantur, florent, & tantum ultrà reliquas urbes caput efferunt,

Quantum lenta solent inter viburna cupressi.

Græci quâ ratione evaserunt toto orbe tam laudabiles? nempe quòd cæteras, quas illi barbaras vocabant, nationes omnes Sapientiâ & ingenio anteirent?

Vnde tantum nomen *Quà sidus currit utrumque,*
 fortitæ sunt Athenæ? hoc pacto scilicet, quod haberent
 præstantes ingenio ac Sapientiâ viros. Parva denique op-
 pida, si à prudentibus gubernentur, parvo temporis spatio
 maxima incrementa sumere possunt. Testis est, Viri Am-
 plissimi, laudatissima vestra Respublica, quæ prudentissi-
 mo vestro ductu & auspiciis, veterem suum vigorem, aliis
 quibusdam ad interitum vergentibus, reservavit, & adhuc
 quotidie maximum status sui incrementum capit. Idque
 non aliis modis, quàm sapientiâ vestrâ, & fideli legum cu-
 stodiâ, quæ Civitates (ut Euripides inquit) continent, quæ
 omnem societatem, & bonam reddunt, & stabilem con-
 servant. Dicebat Dionysius senior, *Vi* atque *Metu*, tan-
 quam adamantinis vinculis, magna imperia retineri;
 Quod scitè sanè & ex Patriæ suæ consuetudine Agefilaus
 refutavit; Ex eo enim quum quæsitum esset; Vtra esset
 Virtus præstantior, Iustitiane, an Fortitudo? Hæc, inquit,
 sine illâ, tantum ad perniciem valet: at illi si pareant
 omnes, hujus usus nullus futurus est. Suavissimè Horatius,

Lib. 4. ode 5.

*Tutus bos etenim rura perambulat,
 Nutrit rura Ceres, almaque faustitas,
 Pacatum volitant per mare navita:
 Culpari metuit fides.
 Nullis polluitur casta domus stupris,
 Mos & Lex maculosum edomuit nefas,
 Laudantur simili prole puerpera,
 Culpam pæna premit comes.*

Idem vos pro sapientiâ vestrâ statuitis; Hæc potissima ful-
 cra, fortissimos tibicines omnis politici status judicatis, Iu-
 stitiam, & concordem inter subditos vestros Religionem.
 Quam (ut consentiens fama de vobis semper testabitur)
 hætenus ita estis tutati, ut, dum præcipuas Bataviæ urbes
 (Hæu fa-

(Heu facinus!) intestina odia agitent, vos contrà maturum amuletum ei morbo adhibendo, tanquam in altissimo otio, atque alcedoniis, cum subditis vestris beatissime vixeritis, & pœnè uni firmi immotique steteritis, in communi illo motu. Videbaris scilicet, Amplissimi Viri, noxium hoc Religionis dissidium, maximos rerum publicarum nervos incidere; idcirco aut ei resistendum, aut doctrinâ, & sedulâ institutione oportune consopendum. Ne tantum illud audire cogeremini,

Quantum Relligio potuit suadere malorum!

Lucret.

Porro Viri Amplissimi quanquam innumera existent in civitatem vestram, Patriam mihi charissimam atque sanctissimam merita, non ero tamen in iis commemorandis prolixior, neque reliqua virtutum vestrarum præconia, (ne in publica commoda, quibus assiduò in majus provehendis studetis, peccem) recensebo, finitimorum vestrorum tacitæ conscientiae interea judicandum relinquens, quam laudem mereamini. Illud me hercules tacere non possum, me, quoties hæc rumino, (rumino autem sæpissimè) illicò in vestri nominis amorem, ac venerationem incitari, & sedulò evigilare, quo potissimum pacto vestros animos, quos nascentis meæ laudis fautores experior, mihi dignè demereri queam. Et quidem in hoc rerum mearum statu, non alia occurrit aptior occasio vobis gratificandi, quàm si hunc Emblematum meorum libellum, jam per triennium, & quod excurrit, in scriniis meis servatum, tandem à bibliopolâ Andrea Burier multis precibus mihi extortum, sub vestro nomine, in Æde Musarum consecrarem. Non mercenariâ spe illectus, ut caput unctius referam, sed ut ostendam, quicquid possum, id ipsum, imò hunc spiritum in vestræ spem gratiæ militare. Munus certè hoc nostrum, si ex vestrà dignitate spectetur, perexiguum; si ex viribus meis, mediocre; si ex animo, magnum est. A quo solo, ut alia desint, vobis gratum & acceptum esse velim, idque eo magis

futurum spero , quod non ab inquilino aliquo , sed ejusdem Reipublicæ municipe , eoque , cujus parens laudatissimi vestri Collegii Consularis , non ita pridem confors fuit , profectum sit . Et certè Viri Ampliffi . (si qua bonis de se fiducia est) non in tam sterili arvo sementem ingenii nostri fecimus : Edimus enim Emblemata , studii genus foeliciter fallax , utpote quod plus Philosophiæ in recessu habeat , quàm quidem primâ fronte promittit . Hoc opus à paucis adhuc (quod citra jactantiam dictum) in Bataviâ vestrâ tractatum est . Aliquot abhinc annis , Viri omni æternitate dignissimi D. Hugo Grotius , & D. Daniel Heinsius quædam juvenilia , id est , Amatoria edidere Emblemata ; opus me hercules & lepidum & venustum , sed quod auctores illi magni vix tantiputant ut pro suo agnoscant . Olim etiam Vir summus Alcianus , de cujus laudibus nihil tam magnificè dici potest , quod ad meritum sublimitatem assurgat , doctissimo Emblematum libello , omnibus palmam præripuisse videtur . Hunc sequuti sunt , Hadrianus Iunius , & Iohannes Sambucus , sed an pari successu , aliorum esto judicium . Post hosce Roscios me in Orchestrâ saltare ausum , aliqui fortassis ut Suffenum sugillabunt : Quibus ego responsum velim , nec mihi , nec alteri cuiquam præclusum esse ad scribendum iter , meque non tam ostentandi , quàm exercendi ingenii causâ , vel ut alios doctiores excitarem , id fecisse . Sciant etiam ,

——— (*Si quis tamen hac quoque , si quis
Captus amore leger*)

& nos aliquid invenisse , quod possit esse usui , aut voluptati . Prima sequentem , honestum est etiam in secundis , tertiisque consistere : Nam in Poëtis , non Homero soli locus est (ut de Græcis loquar) aut Archilochi , aut Sophocli , aut Pindaro : sed vel secundis vel etiam infrâ secundos . Idem asserit Romanæ fidicen Lyræ ,

Ne

*Nefortè credas interitura, quæ
 Longè sonantem natus ad Ausidum,
 Non ante vulgatas per artes
 Verba loquor socianda chordis.
 Non si priores Meonius tenet
 Sedes Homerus, Pindaricæ latent,
 Cæque, & Alcai minaces,
 Stesichorique graves camæna;
 Nec si quid olim lusit Anacreon,
 Delevit ætas, spirat adhuc amor,
 Vivuntque commissi calores
 Æolia fidelibus puella.*

Hâc spe fretus, laudabile hoc stadium decurri, invitante me profunda illa Sapientiâ, quæ olim tota ferè, cum necdum opera Platonis, Carneadis, & Chryssippi, didicisset esse loquax, sub minutulis hæc notis latitabat. Ægyptii enim Sacerdotes, sacrorum suorum mysteria, sub obscuris, & in speciem penè ridiculis ceremoniis significare solent, ut profanum vulgus à Sacris suis arcerent, & dumtaxat ab iis intelligerentur, qui sacris iisdem initiati essent. Hæc ut cognoscerent, Plato, Pythagoras, aliique æterni nominis viri Ægyptum peragrarunt, ibique ex brevibus illis sculpturis, eam sapientiam apprehenderunt, quam tot tantisque voluminibus postea tradidere. Hæc cum ita se habeant, quis conatus nostros, in hoc planè divino studio positos, vituperet? Quis non potius utrumque mihi pollicem premat? Ego ut rudiorum ingeniis consulerem, & Emblematum originem ostendi, & insignium virorum exempla, dictaque, petita ex Morali Philosophia, omnium studiorum, in quibus se humanus labor exercet, optima, subjunxi. Sciens ea permagnam vim habere, ad ingenerandum animis benè natis amorem honestatis, atque Virtutis. Sic enim in atriis dispositæ imagines, posteriorum animos ad gloriam & verum decus excitent, quanto magis in mentibus nostris suscitari convenit

Cicero in
Somn. Scip.

igniculos probitatis, ubi exempla illa dictaque, de quibus
nunquam conticescet æternitas, ad vivum expressa vide-
mus? Quem non vel gravissimo veterno sepultum exper-
gefaciant, & altius in animum admissa, intrepidè ducant
ad pulcherrimum illud Bonæ Mentis sacellum? Cæterum
non omnia, quæ in medium adferri poterant, attuli, sed
ut Fabius inter Grammatici Virtutes collocat, *quædam
nescire*, ita in his diligentia partem esse putavi, *quædam
præterire*. Vos Ampliss. Viri, munus vestrum benevolè
amplectimini pro quo vestrum nomen, velut amuletum,
ad averruncandam invidiam, & placandam Nemesein
excubabit, sub quo eodem, placeat, relegatur, ametur.
Valete, & Rempub. vestram periculosissimis hisce tem-
poribus, scèliciter & providè regite, indubitatè scientes,
omnibus qui patriam suam adjuverint, exiguam tenuem-
que auxerint, justitia, pace, bonis legibus ornaverint, iis
suam certam mercedem, non in celebri loco Statuæ, sed
ordinatum ac constitutum in cœlo locum, in quo extra
omnem fortis vicissitudinem, cum æternis illis mentibus,
quarum corpora naturæ concesserunt beatè, non ali-
quot annos, sed ævum immortale agant, cum summa &
perpetua lætitia. Datum Goudæ, Ipsis Kalendis Mar-
tiis. A° cId Idc xviii.

Lectio-

Lectori Benevolo S:

Res anni sunt, benevole Lector, quòd Poëmata mea publici juris fecerim, in gustum scilicet, & periculi faciendi causa, qui tuus in me mea-que esset animus: Ea quia tum temporis doctis quibusdam non displicuere, & à te obviis, quod dicitur, ulnis excepta sunt, etiam hæc Emblemata, extemporali curâ effusa, & jam tum apud me parata è fidis Silentii castris erumpere passus sum. Quia (ut inquit ille) Spes alitur exemplis, & placitum confidimus, quod aliis placuisse gaudemus. De illis autem (sicut de aliis) seriò rogo, & obtestor, uti amicè, non rigidè censeas; ut quam benevolentiam antehàc expertus sum, eandem etiamnum in te sentiam. Etenim, ut verum confitear, voluimus hîc aliquid, sed impari cum aliis queis corculis esse datum est, successu. Sufficit nobis, si solam invidiam deprecemur, quam quidem eò mihi æquiores futuram spero, quòd infirmum & informem hunc fœtum, non sapientior ætas, sed adolescentia enixa sit, & quidem ea, quæ propter alias curas, in hâc solâ curâ esse non potuerit. Hoc Lector si cognoscis, ignosce, si ea vitia non effugerim, quibus ut plurimum tales affines sumus. Sin minus, me tamen consolabor, omnium bonarum rerum conatum in laude, effectum in casu esse.

Si

Si defint viris, tamen est laudanda voluntas,

Hac ego contentos auguror esse Deos.

Ultimum restat quod te precer, aut potius deprecer, ne scilicet mireris sententias quasdam Græcorum, Latine hic à me esse expressas. Cum enim Typographus noster defectu illarum litterarum laboraret, mihi que non aliud tempus ad corrigendum opus, quàm hoc dierum Canicularium Iustitium suppeteret, commodè illæ expectari non potuerunt. Verba autem auctorum Græca, si quis nostris Latinis non contentus, fortè desiderabit, ex ipsis, quorum loca fideliter & ex lege designamus, petat. Aliorum verò sententias, quas hic in morem Centonis conteximus, discriminibus verborum, aut litterarum figura disparare nolimus, ad minorem nimirum Typographi molestiam, & ut (quod mihi placebat) uniformis esset Scriptura. Vnicuique autem quod debeo, ingenuè addito è regione nomine, acceptum fero. Tu Lector have, & si merui, fave.

In com-

FLORENTII SCHOONHOVII,

J.U.D. & Poëtæ eximii.

VIdimus Alciati benè doctum Emblemata, nec illi
 Edidit aut simile, aut doctius alter opus;
 Hunc tamen ad vivum, Schoonhovius indolis altæ,
 Exprimit; huic primo, jure secundus erit.
 Sive quis inventum spectet, quis sive Poësin,
 Seu videat prosa planius omne datum:
 Quis non tam varias simul uno in pectore dotes
 Suspiciat? quis non credat inesse Deum?
 Quod dedit Alciatus Minoë interprete, solus
 Schoonhovius vates hoc simul omne dedit.
 Hunc igitur docti, quibus ex meliore met allo
 Finxit Apollineus pectora dia calor,
 Hunc avidâ versate manu: legisse juvabit;
 Utile nam dulci miscuit omne simul.
 Philologus, vates Themidis, Phœbique sacerdos,
 Omne tulit punctum, & commoda multa feret.

GERARDVS TRAVDENIVS.




Quem sibi sancta Themis teneris sacravit ab annis,
 Inq; suum pariter Musa vocavit opus,
 Schoonhovenius sic ora gerit; Iuvenilis imago est,
 Mens tamen interius nil iuvenile sapit.
 Gerardus Fraudenius.

I
FLORENTII SCHOONHOVII.
E M B L E M A T A.

Nosce te ipsum.

E M B L E M A I.



*Ne meritum praelustre tuum, Dignissima mundi
Pars Homo, servili conditione premas;
In te tota patet cælorum atque orbis imago,
Hinc decus, hinc dotes noscere discas.*

A

COM-

COMMENTARIUS.

OMnis hominum vis ac præstantia in Animo & Corpore sita est: Utrumque autem habent egregium, nisi quod aliud alio sit præstantius. Hoc lustremus, atque in eo nos illustremus: Corpus quod attinet; videmus illud eis à Natura datum sublime, & quum cæteras animantes pronas, ventrique obedientes, ad pastum abjecisset; solum Hominem ad cælum, quasi ad cognationis domiciliique pristini conspectum, erexit. Hinc Poëtarum ingeniosissimus:

*Pronaque cum spectent animalia cætera terras,
Os homini sublime dedit, cælumque tueri
Iussit, & erectos ad sidera tollere vultus.*

Altius si indagemur; omnia, quæ mundus, eum habere comperiemus; quatuor scilicet Elementa, Spiritum aëreum, Cor igneum, Corpus terreum, & Os aqueum. Præterea capitis quoddam cælum, & in eo scintillantes oculos, ipsam formam rotundam cum brachia & pedes expandit, à quorum extremitatibus si lineam ducamus, rem habebimus autorem. Quibus rationibus moti philosophi *Μικροκόσμον* illum appellarunt. Testatur id Macrobius in Somnio Scipionis: Physici mundum magnum hominem dixerunt, & Hominem brevem mundum. Rectè, quia ut ille à Deo regitur, sic Homo ab Animo, alterà illà sui parte, immò toto; Nec enim nos ii sumus quos forma ista declarat, sed mens cujusque, is est quisque. Quare Socrates cum decorum adolescentem conspiceretur: Ut te videam, inquit, aliquid loquere. Etenim arbitrabatur hominem non oculorum, sed mentis acie, & animi obtutu esse considerandum. Ab hoc illud cæleste animal sumus quod divinæ in terris Providentiæ quandam quasi repræsentat imaginem; sagaces, multiplices, acuti, memores, pleni rationis & consilii, denique præclarâ quâdam conditione generati, nimirum ut cæteris animalibus imperemus:

Cicero in
somm.

Ovid. in
Metamorph.

*Sanctius his Animal, mentisque capacious alta
Deerat adhuc, & quod dominari in cætera posset
Natus homo est, sive hunc divino semine fecit
Ille opifex rerum, mundi melioris origo, &c.*

Divino semine inquit Poëta non poëticè; Anima enim rationalis ex ipso æternitatis gremio decerpta est, ab illo tradux, divinitatis

vinitatis originem initiumque accepit, ex hoc orta huic similis est. Quid ej clausum, quid invium? in Cœlum usque penetrat; astorum ortus, obitus, cursusque cognoscit; diēs, menses, annos finit, defectiones Solis & Lunæ & scit & prædicit in omne posterum tempus, quæ, quantæ, quando futuræ sint. Suo denique ingenio in rerum Naturâ, alteram quasi naturam efficere conatur.

*Quis dubitet post hæc Hominem conjungere Cælo,
Eximiam Natura dedit linguamque, capaxque
Ingenium, volucremque Animum; quem denique in unum
Descendit Deus, atque habitat, ipsumque requirit.*

Manil. 2.
lib.

Cum itaque, O Homo audacissimæ Naturæ artificium, tot tantæque tibi sint dotes, eas cognosce, & attollere, ne tanquam fun-
gus in illustri hâc mundi machinâ sedeas & cucurbitas pingas,
excute coporearum cupiditatum cœnum, rumpe clavos quibus te,
terrenas habitans Libido mentes, terræ affigere studet, ne pejus
tibi velle videaris quàm ipsa Natura voluit.

*Hæc, nisi terrenus malè desipis, admonet figura
Qui recto cælum vultu petis, exerisque frontem;
In sublime feras Animam quoque, ne gravata pessum
Inferior fidat mens corpore celsius levato.*

Boëtius.

Sapiens supra Fortunam.

E M B L E M A II.



*En quæ jura solet per Vniuersum
Cunctis dicere Sors hîc illigatur:
Nimirum sapientiâ recoctus
Extra se nihil expetens bonorum
Sortem sub pedibus premit superbam.*

C O M M E N T A R I U S.

IN nemine Deorum Dearumve tam prodiga ingeniorum fuit antiquitas, quàm in Fortunâ, ut quæ sola utramque paginam facere (vel teste Plinio) in ratione mortalium fuit credita. Hinc tot ejus cognomina, tot eam precibus ambiunt, quos elegantissimè Horatius noster Lib. i. Ode xxxv. descri-

descripsit. Enimverò cæci homines res mortalium nullo ordine, nullo alio rectore, quàm Fortunâ, fluitare existimabant. Divinos itaque ei tribuebant honores, litabant, cælo denique eam collocabant. Testis Juvenalis Satyra x.

Nullum Numen abest si sit prudentia, sed te

Nos facimus Fortuna Deam, Cæloque locamus.

Et idem alio loco :

Si Fortuna volet, fies de Rethore Consul,

Si volet hac eadem, fies de Consule Rethor.

Hæc ille Ethnicus Poëta ethnicè de Fortuna. Pudet autem maximo cum Christianorum dedecore confiteri, pot etiamnum esse, qui non Deum Fortunæ rectorem, sed ipsam Fortunam propriâ suâ lege meantem agnoscunt, qui huic secunda & adversa sua accepta referunt. Pendent miseri ab eâ, nunc magni sunt, nunc pusilli, nunc elati, nunc supplices, ut cumque se mutarit Rhamnusia; non secus ac conchilia crescente Lunâ augescunt, decrescente decrescunt. Contra verò Sapiens, pedissequus ille ac imitator Dei, quem hic in scenam producimus; hâc Deâ altior & sublimior stat; utpote semetipso, & ex se nascentibus bonis contentus; hoc est iis, quæ casu non dantur, quale bonum est Virtus: Nam qui alia bona judicat, venit in Fortunæ potestatem, alieni arbitrii fit. Porro in unoquoque Sapiente,

Quis Deus incertum est, habitat Deus.

Seneca.

Ille dat consilia magnifica & erecta, ille dat animum excellentem, moderatum, omnia tanquam minora transeuntem, quicquid timemus optamusque ridentem. Quem elegantissimè suis coloribus depinxit Horatius:

*Quisnam igitur liber? Sapiens, sibi qui imperiosus,
Quem non pauperies, neque mors, neque vincula terrent,*

Lib. 2. Sat. 7.

*Respondere cupidinibus, contemnere honores
Fortis, & in seipso totus teres, atque rotundus;
Externi nequid valeat per laxe morari,*

In quem manca ruit semper Fortuna.

O quàm magna quàm paucis? Examinemus, & caput Sapientiæ in istis habebimus. Liberum itaque Sapientem esse sic pro me probat Cicero in Paradoxis. Quid est Libertas? potestas vivendi ut velis. Quis igitur vivit ut vult? qui recta sequitur, qui gaudet officio, cui vivendi via considerata atque provisa est, qui

Sapiens lib.
b. 11.

Sibi imperans.

legibus quidem non propter metum paret, sed eas sequitur atque colit, quòd id salutare maximè esse iudicet. Soli autem id contingit Sapienti, ut nihil faciat invitus, nihil dolens, nihil coactus. Confitendum itaque est, nisi qui ita sit affectus, esse liberum neminem. Sibi imperat Sapiens, quia non attollitur prosperis nec mergitur infœlicibus. Testis ille à Porticu Sapiens, clamans altum & intonans: Ego solus rex sum, solus dives: & interim conspicitur ad alienas fores mustitans;

Da regmen Hipponacti, namque frigeo

Totusque contremisco.

Nec morti cedens.

Nec morti nec vinculis Sapientem cedere; videre est in innocentissimo Socrate, cujus animum triginta Tyranni circumstantes infringere non potuerunt. Quemadmodum enim nihil incommodi adfert nimbus in mare decidens, utque grando illisa tectis magno quidem fragore, verùm nullâ novâ defultat, sic inanis ille terror mortis nihil in Sapientem potest. Ad omnem incursum invictus & interritus est, non si paupertas, non si luctus, ignominia aut dolor impetus faciant, pedem referet, securus contra illa ibit, plenus gaudio domestico. Verè Boëtius. Lib. i. Metro. iv.

*Quisquis composito serenus aeo
Faturn sub pedibus dedit superbum
Fortunamque tuens utramque rectus
Invictum potuit tenere vultum,
Non illum rabies, minave ponti
Versum funditus excitantis aestum,
Nec ruptis quoties vagus caminis
Torquet fumificos Vesevus ignes,
Aut celsas soliti ferire turres
Ardentis via fulminis movebit.
Quid tantum miseri feros Tyrannos
Mirantur sine viribus furentes?
Nec speres aliquid, nec extimescas;
Exarmaveris impotentis iram.*

Serena Epist. 59.

En tibi duo rivuli exturbidissimo Affectuum fonte deducti; nimirum spes & timor, qui etiam in Sapientis animum non influunt, utpote in quo nil nisi tranquillitas, non secus ac status mundi super Lunam.

Perpe-

Perpetuum nullâ temeratum nube serenum.

Nam illa mundi pars superior & ordinatior, nec in nubem co-
gitur, nec in tempestatem impellitur. Eodem modo sublimis
ille animus, quietus semper & in statione tranquillâ collocatus,
modestus, venerabilis & compositus est. Venio ad Honores.
quos quàm facile sit Sapienti contemnere testatus est Dioge-
nes, qui maluit in dolio suo volutari quàm Alexander esse: Scivit
scilicet;

Honores
contemnens.

*Regnum & Diadema tutum
solum deferre virtutem;*

*Quum tamen invitam blandè vestigat, & ultrâ
Ambit honos, docuit toties à rure profectus
Lictor, & in mediis Consul quasitus aratris.*

Claud.

Denique (quod fons est Emblematis) Sapientem esse totum ex
se aptum, ex se pendentem, & supra Fortunam; paucis pro me
docebit Epictetus: Sicur Jupiter secum est atque agit, & in se
acquiescit, fruiturque cogitationibus se dignis: Sic & Sapiens
sibi ipse sufficit & secum esse potest, fruiturque puriore illâ &
sublimiore meditatione; quâ fœlicitate (secundum Senecam)
nulla Deo est propior. Porro cum vera magnanimitas atque li-
bertas duabus potissimum rebus constet; in contemnendis cum
prosperis tum adversis, quis hoc melius potest quàm Sapiens?
qui totum Fortunæ regnum despicit, & animosè cum Horatio
exclamat; Fortunam

Ex se pen-
dens.

*Laudo manentem, si celeres quatit
Pennas; resigno qua dedit, & meâ
Virtute me involvo. probamque
Pauperiem sine dote quaro.*

Habeamus aquam & polentam, & Jovi ipsi de fœlicitate movea-
mus controversiam. Age nunc

Seneca.

*Serviat, atque novos moveat Fortuna tumultus,
Quantum hinc imminuet?*

O muros quos construendos in animi nostri sensibus monebat
Antisthenes nullâ vi expugnabiles. Quàm alta hîc (sine quâ ni-
hil dulce) securitas? Quantus hîc tollendus risus, quantâ volup-
tate implendus animus ex hâc sublimi, & tutâ arce contemplantium
aliorum errores, suam autem quietem.

Non quia vexari quenquam est jucunda voluptas.

Lucret.

Sed

Sed quibus ipse malis careas quia cernere suave est,
Hi planè juxta Græcorum proverbium

ὅτ' οὐκ ἔστιν ἀχάρις.

Seneca.

Ipsi stantes in littore navigantis artem & discrimen spectant otiosi. Exurgamus, exurgamus & nos aliquando ex hâc fæce, ut evadamus in illud sublime & excelsum, ubi tranquillitas nos manet, & expulsis terroribus vera Libertas. Certe

Lucret.
lib. 1.

Nil dulcius, benè quàm munita tenere
Edita doctrinâ Sapientum templa serenâ,
Despicere unde queas alios, passimque videre
Certare ingenio, contendere Nobilitate,
Noctes atque dies miti præstante labore
Ad summas emergere opes, rerumque potèiri.

Alcum

scire datum, nec scitari permissum, nec scrutari religiosum. Cum enim Deus regnum suum, seque sine arbitris regat; sanctius & reverentius est de eo credere, quàm scire; mirari, quàm rimari. Plura de hoc

Scire nefas homini.

Tangere vis cœlestes illos ignes? cum Icaro liquefces. Scandere in Providentiæ arcem? cum Phaëtone temerario cades. Una & quidem maximè laudabilis audacia hîc, nihil audere; unum acumen, nihil cernere; una scientia, nihil scire. Quia

Horat.

Prudens futuri temporis exitum,

Caliginosâ nocte premit Deus,

Ridetque si mortalis ultra

Fastrepidet.

Quid itaque animum æternis consiliis minorem fatigamus? Quid nos homulli, nos terra, pulvis, somnium. immò somnij fugacis umbra: angusto sinu illum claudere volumus, quem nec cœlum ipsum? quid cœlestia ejus decreta capere, quos nunquam cœpit cœlestis Curia? Tamen

——— *Nos pravum & debile vulgus*

Scrutamur penitus Superos. hinc pallor, & ira.

Hinc scelus, insidiaque, & nulla modestia voti.

Nos ij sumus qui secreta Cœli inquirere sudamus, qui curiosâ mente mentis æternæ recessus tentamus, & in ipsa ipsius Decreta irrumpimus. Nos de divinâ Prædestinatione, de Libero Arbitrio, de Lapso primorum parentum, aliisque, quæ otiosæ mentes semper quærunt, & nunquam inveniunt, disputare audemus, simplicemque Scripturam quæstionum ambagibus implicamus; cum tamen Veritas hæreat sub ictu, immò amittatur nimium altercando.

Prudentius.

Idcirco mundi stulta delegit Deus,

Vt concidant Sophistica.

In his si quis seorsim à sensu nostro senserit; in eum statim arietamus, crimenque ducitur lustralibus febris expiandum. Pro his,

Lucan.

Bella geri placeat nullos habitura triumphos.

Pestis certè & hujus, & jam olim pluriùm Rempublicarum, nec facile excutienda si aut ipsa potens, aut obsedit potentes. Nonne hodie hanc ob causam, provinciam provinciæ, civem civi infestum videmus? nonne hoc

*Procurit enses,
Et socias inimicat urbes?*

Horat.

Accedunt concionales turbæ, quæ undique gladiatorio animo classicum canunt, quæque pax deberent esse mundo, fax sunt, & πῦρ ἑὴν πῦρ addunt, quum tamen omnis modestia atque moderatio eas deceat; quam sinon habeant, sumerent saltem sibi hoc tempore mutuum.

Sed frustra est hæc quærela; quisque regnum sibi vi, atque factionibus munit; hinc castra ex unâ parte contraria, & parentum liberorumque sacramenta diversa:

Diditur incertum studia in contraria vulgus

Verè incertum; quia, non aliter quàm pecorum ritu, sequitur antecedentium gregem, pergens non quàm eundum, sed quàm itur; nec ad rationem, sed ad similitudinem componitur. Libertas quidem, & speciosa nomina prætexuntur; sed ut imperium evertant, libertatem præferunt; si everterint, ipsam aggrediuntur. Sub hoc mantili & everriculo multarum fraudum, fervida ingenia violentiam naturæ, & profundam ambitionem velare student. Relligio passim in ore, improbitas in corde, cui nisi frena maturè injiciantur, & veteres artes, per quas Batavum nomen, & illius crevere vires, revocentur; ita in nervum erumpet, ut non nisi Vi Majore ejus motus componendi sint. Quod si fit, conclamatum est, & exequias Belgicæ quibus commodum est ite. Non desunt nobis exempla istarum quas patimur cladum, sed ipsi nobis. Nonne Græcia, & quod recentius, Flandria, hæc immodicâ libertate & licentiâ concionum periit? Nonne speciosi hi religionis prætextus,

Seneca de
vita beata.

Tacit. 4. An-
nal.

Idem 16. An-
nal.

*Altis urbibus ultima
Stetere causa cur perirent
Funditus. imprimeretque muris
Hostile aratrum exercitus insolens?*

Certè nimis quàm verum. Sed quid? Ita se res habet ut plerumque qui fortunam mutaturus est Deus, consilia corrumpat. Iam rebus omnibus florentissimi, Regibus, Principibus, Rebus publicis suspiciendi, immò (dicere hoc liceat) adorandi; nosmet ipsos perdere, & in nostra viscera victricem dextram convertere studemus: palàm alioqui beati, nisi unum hoc desit, animus qui modestè istæc ferat, At vix est ut queamus; opes enim,

Veil. Patere.]
lib. 2.

divitiæ , nimiaque fœlicitas afflîxere feculi nostri mores: hinc illæ lachrymæ , hæc una fundi nostri calamitas. Philosophus quidam interrogatus, quidnam esset, Fortuna? respondit; Malus medicus; plerosque enim quos curat, cœcos facit. In nobis id verum, quibus hostis in latere, & tantum non ad portas Hannibal, & tamen dulci Fortuna ebrii litigamus; Syracusæ nostræ capiuntur, & nos in pulvere pingimus, sperantes amoto metu & intereâ oscitantes opprimendi. At quantò satius erat, id operam dare, ut sapientiam cum modo habentes, Consilia quibus impares sumus fato permitamus, & pestilente hâc fruge in herba oppiessa, tutam rebus adstruamus securitatem. Animos commune periculum jungat, si multas post sit: Ne tum denique nostra intelligamus bona, cum quæ in potestate habuimus ea amiserimus, Serum est mortua re verba facere; Optimum autem aliena infania frui.

At vos:

Sed calidus sanguis, seu rerum incitia vexat

Indomita cervice feros, ubicunque locorum

Vivitis, indigni fraternalium rumpere fœdus.

Nos qui nihil præter vota in commune conferre possumus, Deum intimè precamur, ut pura simplexque Religio in patria nostra restauretur; ut nova commenta, & cœtera ludificandis animis per otium callidè excogitata, aboleantur; tandemque, sublata scissura, pax in domo ejus, in Conscientiis quies, securitas in Republica constituantur.

In

In publico malo fœlices.

E M B L E M A.



*In sua victrici dum sævit viscera ferro
 Patria, & innocuo terra cruore rubet ;
 Vultur adest subito, defuncta cadavera pascens ,
 Quodque aliis damno est , hinc sibi lucra petit :
 Grassari quò tuta queat ad munia opesque
 Civica deposcit prælia seditio.*

COMMENTARIUS.

A

Ristophanes in Equitibus ait:

Fecisti ut is qui captat anguillas facit.

Quieta quum sunt stagna venatur nihil ,

B 3

Sed

*Sed cœnum ubi omne illac & hac subverterit,
Captura magna est; Tu quoque ubi perturbaveris
Hinc civitatem & inde; plurimum capis.*


Cic. 2, in
Cat.

Similitudo mehercules optimè quadrans in seditiosos, qui honores quos quietâ republicâ desperant, perturbatâ se consequi posse arbitrantur. Itaque miscent omnia sursum & deorsum, certis suis conatibus oportunissimos esse illos transitus rerum. His ducibus comites sese adjungunt ij qui ex conscientia scelerum nihil spei sibi reliquum fecerunt, nisi in summa rerum omnium desperatione: hi privata vulnera Reipublicæ malis operire statuunt. Præterea obærat, quibus afflictâ fides in pace, qui rebus turbatis alacres, & per incerta tutissimi sunt. Hinc apud Suetonium Iulius Cæsar inquit; ijs quos gravior criminum, inopiæ, luxuriæ vis urgeret; bello civili opus esse. Quemadmodum enim pulegium ipso brymæ tempore floret, quum marcent omnia: ita mali, quorum in pace nullus est respectus, rebus pessimè vexatis regnum tenent. Sed id pro tempore saltem; parum enim diuturna est felicitas quæ his fundamentis innititur. Et rarò magna illa Reipublicæ moles convelli sine exitio convellentium potest. Qui igne immisso sylvam incenderit, non potest eventum reliquum arbitrio suo moderari, sed ignis quocunque impetus fert, pabulum quærit, & in ipsum incendii auctorem sæpe ruit: haud aliter qui malo consilio patriam intestinis bellis incendit, cum illâ confligente conflamat, pereunte perit, & æquales cum victis victoris condiciones accepit.

Ni-

Nihil ignavis votis.

E M B L E M A.



*Rebus in humanis nostrum solamen opemque
 Nil juvat ignavâ sollicitare prece :
 Audentes Fortuna juvo : conamina vestra
 Iungite, & hoc nostrum præsto erit auxilium.*

C O M M E N T A R I U S.

Proverbio celebratum est apud Lacedæmonios: Admota manu Fortunam esse invocandam: Quo significabant sic esse invocandos Deos ut simul & manuum apponamus, & nostram addamus operam, alioqui frustra invocari. Non enim, votis neque supplicationibus muliebribus auxilia Deorum parantur; sed vigilando, agendo, bene consulendo omnia ^{Salust.} pro-

prosperè cedunt. Vbi socordiæ atque ignaviæ te traddideris ne-
quicquam Deos imploras, irati infestique sunt. Gubernator vi-
dens insurgere tempestatem Deorum auxilium perit; nihilo seg-
nius interim clavum moderans & antennam detrahens. Miles,
invocatâ ope Divinâ, armatur. Arator ab Hesiôdo jubetur Diis
Max. Tyrius. sacrificare, deinde aggredi. Nec Ægyptius Colonus solo Nili fre-
tas flumine semen suum spargit, nisi prius aratro bovem junxerit,
Cicero in Offic. sulcum duxerit, multum laborarit. Tum deinum flumen vocat,
opus suum illi commendat: Ita fluvius miscetur cum labore a-
gricolæ, cum labore spes, cum molestia fructus. Quod si autem
omnia nobis quæ ad victum cultumque pertinent, quasi virgula
Divina (ut ajunt) suppeditarentur, tam optimo quisque jure se
negotiis omnibus ommissis otio daret. Sed

Horat.

— Nil sine magno
Vita labore dedit mortalibus.
Et

Ovid. in
Metam.

— Ignavis precibus fortuna repugnat.

Manil. Astr.
Lib. 4.

Pro pretiô labor est, nec sunt immunia tanta,
At nisi persosis fugiet te montibus aurum.
Impendendus homo est, Deus esse ut possit in ipso.

Xenophon.

Quæcunque bona sunt ac præclara, eorum nihil sine labore ac stu-
dio Dii hominibus largiti sunt. Si qua sælicitas inter eos est, non
Pindar. Pyth. Ode 12 sine iis existet, sed eam ad exitum perducet aut hodie, aut postea
Deus. Ait alicubi Hesiodus:

Agrine cum multo facilis se ignavia cuivis
Offert, plana via est aditus levis ejus ad ades:
Ac virtutis iter sudore Dii obvallarunt,
Longa quidem pariter, viaque ardua ducit ad ipsum,
Asperitate graves aditus quæ fronte recludit
Prima sed levis est superato vertice tandem.

Si itaque delectant præmia quæ promittuntur, ne deterreant cer-
tamina quæ jubentur. Nam (ut Plautus inquit)

Qui è nuce nucleum vult, frangat nucem.
Claud. in Epithal. Honorii.

Non quinquam fruitur Veris odoribus,
Hyblais latebris nec spoliât favos,
Si fronti caveat, si timeat rubos:

Armat spina rosas, mella tegunt apes.

Si Doctrinam amas, dormienti tibi eam Dii non conficiunt, non enim lata (ut ait Propertius) via ad eam currere datur. Nec frustra Musas antiqui in arduo atque edito monte habitare dixerunt; Laborem enim, sudorem, & vigilias in earum atrio excubare voluit Deus; hæ earum matres sunt, negligentia autem iis noverca est. Si mercuriales artes, hoc est mercaturam, exercere tibi animus est; nequicquam tibi ignavo faculam lucrificam allucebit Fortuna.

Plaut. in
Persa.

Nimis homo nihil est, qui piger est,

Vigilare decet hominem qui vult sua temporis conficere officia.

Idem in Ru-
dente.

Denique si bello inclarescere studes, quernamque coronam mereri; non ex plano & facili hæc gloria petitur, nec segnibus animis sibi que indormientibus ad eam aspiratur:

Non flantibus austris,

Claud. de
Hon. Conf.

Nec pluviis cedes.

Inventis utere cibis, solabere partes

Æquali sudore tuas. Si collis iniquus;

Primus ini, sylvam si cadere provocat usus;

Ne pudeat sumpta quercum stravisse bipenni.

Calcatur si pigra palus, tuus ante profundum

Prætenet sonipes, fluvios tu protere curru

Herentes glacie, liquidos tu scinde natatu.

Nunc eques in medias equitum te consere turmas,

Nunc pedes assistas pediti, tum promptius ibunt

Te socio: tum conspicuus gratusque geretur

Sub te teste labor.

Cogit (scilicet) tantos tolerare labores

Summa ducis virtus, qui nudâ fusus arenâ

Lucan. lib. 9.
bel. Civ.

Excubat, atque omni Fortunam provocat horâ.

Sunt tamen quidam hoc astro, ut iis ad amplitudinem & gloriam, Cicero. & ad res magnas bene gerendas divinitus adjuncta Fortuna videatur, quibus venti, tempestatesque obsecundant: homines scilicet majore Fortunâ quàm Sapientiâ; quæ quia deest, ad temeritatem sæpius invitantur, cum pravo consilio illa propitia arderet, quæ ita prodesse nonnunquam vult, ut vehementius noceat. Itaque Cæsareum illud probemus; Virtute duce, comite Fortunâ.

In Ambitiosos,

EMBLEMA VI.



*Ecce viatores adverso, Sole nitente ;
 Tramite qui peragant perficiuntque vias,
 Hic sequitur, fugit ille suam quam sedulus ambram,
 Qui sequitur, fugit hunc, qui fugit, hunc sequitur.
 Gloria sic humiles amplectitur, at sibi quisquis
 Hanc nimiâ poscit ambitione fugit.*

COMMENTARIUS.

Non abs re quidam Ixionis fabulam adversus inanis
 gloriæ sectatores excogitam esse existimant : nam ut
 ille, pro Junone, cum nebeculâ concubuisse, atque ita
 Cen-

Centauros aliaque monstra procreasse fertur; sibi gloriā, veluti quandam Virtutis umbram, amplexi, nihil sincerum aut laude constanti dignum, sed adulterina pleraque edunt, homines scilicet ineptissimi, quorum ambitio

— *Vestibulis, foribusque potentum*

Excubat, & pretiis commercia poscit honorum,

Quorum vota per fas nefasque ad fasces & secures quā improbiſſimè festinant, quæ quidem, jam adeptæ, gratæ non sunt, si aliquid majus reſtet, ultra quod ſe avara cupiditas porrigat, quæ non quos vincat, ſed à quibus vincatur aſpiciat, cuique non tam jucundum eſt multos videre poſt ſe, quā grave aliquem ante ſe. Unde uſu venit, ut illos vera conſtanſque gloria, tanquam turpiſſimos ſui lenones deſerat, aut immoderatus ardor peſſum deſiciat, majores alioqui futuros, ſi minores eſſe voluiſſent. Teſtes mearum ſententiarum ambo Gracchi, infelix par fratrum, qui ſi civilem dignitatis concupiſſent modum, quicquid per tumultum, ac ſeditionem, adipiſci conabantur, quietis reſpublica obtuliſſet. Etenim ambitioſis hiſce ingeniis, alioqui ad imperia gerenda non ineptis, quòd æqualibus gloriae cauſa inviderent, eoſque de ſtatu ſuo dimovere conarentur, id non exiguo in rebus præclare gerendis impedimento fuit, eos enim virtutis ſuæ adverſarios reddiderunt quibus adjutoribus uti potuiſſent. Præterea id hominibus ingenium eſt, ut qui improbe eniti, & ad honores graſſari conantur, eos deprimant, contra, qui nihil ſibi vindicant, & infra aliorum æſtimationes ſeſe metiuntur, omnia adſequantur. Atque hæc de aperta ambitione: reſtat ut dicamus de tacita, quæ ideo periculoſior, quia occultius, & per majores cuniculos fallit. Hæc eſt, quæ, quemadmodum remiges, puppim intuentes, proram tamē ulterius promovent & impellunt; ſic fugere videtur, quod perſequitur, vituperare, quod quam maximè laudat: non ſecus ac Philoxenus naſi muccum in catinum emungere ſolitus fuit, quo, reliquis convivis deterritis, ipſe ſolus cibis appoſitis fruereſetur. Interea autem hæc intimè apud ſeſe precatur,

— — — *Pulchra Laverna*

Horat.

Da mihi fallere, da juſtum, ſanctumque videri,

Noctem peccatis, & fraudibus objice nubem.

Cæterum gloria ne ab iis quidem, qui contemptum ejus intro-

Val. Maximus.

ducere

ducere conantur, negligitur; quoniam quidem ipsis voluminibus nomina sua diligenter adjiciunt, ut quod professione elewant, usurpatione memoriæ consequantur. Quam vanitatem omnium Philosophorum divinissimus Socrates quam optimè derisit: Cum enim Antisthenes Cynicus pallium haberet pertusum, idque obvertens fissuram omnibus daret inspiciendam; Per fissuram, inquit pallii tui video tuam inanitatem. Adedò nihil simulatio proficit, paucis imponit leviter extrinsecus inducta facies, veritas in omnem partem sui semper eadem est. Tenue est mendacium, perlucet si diligenter inspexeris. Porro nulli non Virtus & vivo & mortuo retulit gratiam, si modo illam bona fide secutus est, si se non exornavit & pinxit, sed idem fuit sive ex denunciato videbatur, sive imparatus ac subito: Exemplum dabit M. Catò homo virtuti simillimus, & per omnia ingenio Diis quàm hominibus propior; qui nunquam rectè fecit ut facere videretur, sed quia aliter facere non poterat; qui omnibus humanis vitiis immunis semper Fortunam in sua potestate habuit, quæ ipsum in Prætura postponens Strumæ Vatinio, optime ab ipso derisa est; non enim Cato repulsam tulit, sed ipsa dignitas eam passa est; Non secus ac Anaxagoras ab Atheniensibus exilio mulctatus, non privabatur Athenis, sed illæ illo. Roma Vejiserat qua tempestate maximus illæ patriæ liberator Camillus exulabat pulsus ab ingrata urbe. Quicunque Rempub. salvam volunt sunt cives Romani.

Seneca.

Vell. Patere.

Ennius.

Qui rectè consulat, consul fuat.

Hostem qui feriet mihi erit Carthaginienfis.

Horat.

Virtus repulsa nescia sordida, in-
contaminatis fulget honoribus,

Nec sumit aut ponit secures.

Arbitrio popularis aura.


Enimvero non purpura aut aureis virgis, sed utilitate publica adductus, Cato Præturam petiit, ut amicis propinquisque, & omnibus civibus, omnibus deinde mortalibus paratior utiliorque esset propius positus: Idque laudabili morum suorum fiducia, quæ quia in animis bonorum de affectu simplici surgit, genus est virtutis. Nec certe caruit heroicus ille conatus, vel, laude vel præmio, etiamsi ei non responderit eventus. Rectè enim
facto-

factorum verus fructus est fecisse, nec ullum virtutum pretium dignum illis, extra ipsas est. Quod probè callēbat idem Cato, cordate affirmans, se malle ut homines quērantur cur ipsi non esset posita statua, quam statuta esset quērant. Arcus enim & statuas, aras etiam templaque demolitur æars, obscurat oblivio, negligit carpitque posteritas; contra contemptor ambitionis & infinitæ potestatis domitor ac frænator animus, ipsa vetustate florescit, nec ab ullis magis laudatur quam quibus minimè necesse est. Magnum est non expetere quod merēris, immo majus quàm mereri. Pædaretus Lacon cum in numerum trecentorum non esset allectus, vultu hilari surgens è Senatu discessit, hoc dicto; Grattias vobis ago Dii immortales, quod urbi huic tam multos dedertis me meliores. Nimirum vir hic, meritorum suorum securus interpret, patriæ suæ, vel se è Senatu excluso, bene esse gaudebat, nec ob id virtus ei demptâ gloriâ amara fuit, quæ sequi debet non appeti, nec, si casu aliquo non sequatur; idcirco quod gloriâ meruit minus pulchrum est. Socratis gemmâ hæc consigno, qui dicebat expedita & compendiaria via eos ad gloriâ pervenire, qui id agerent, ut quales videri vellent, tales etiam essent: quâ quidem prædicatione apertè monebat, ut homines ipsam potius virtutem, quàm ipsius umbram consecrarentur.

Pl. in Pa-
neg.

Sat citò, si sat benè.

EMBLEMA VII.



*Vt orbium diversus in contraria
Nisus coërcet fervidum motum rotæ,
Sic & senectæ providens cunctatio
Calidos juventæ frenat ausus, & regit.
Idcirco Princeps eligat sibi senes
Ad consulendum; Iuniores comparet
Ad exequendum jussa Prudentum senum.*

COMMENTARIUS.

HÆc duo boni Status fulcra sunt; Consilium & Vis; Sed conjuncta, quia (ut testatur Cicero) nihil vis valet foris; nisi con-

consilium sit domi; nihil consilium domi, nisi vis sit foris. Consilium, secundum omnes Politicos, à senibus, (quos quia capite Plaut. in sunt candido, sapere oportet) petendum est; vis autem à juvenibus, Moffell.

Quis integer avi

Sanguis adest, solidaque suo stant robore vires.

Virgil.

Fecerunt id Romani; qui semper Senes, quibus corpus annis infirmum, ingenium verò Sapientiâ validum erat; Reipublicæ clavo admovebant, eosque, à curâ, Patres dicebant. Afferit Val. Maximus: Validior ætas imperium Romanum rexit, & duplicavit; senectus, excellentissimis ornamentis decorata, in altissimo majestatis fastigio fulsit. Et Ovidius in fastis:

Magna fuit quondam capitis reverentia cani,

Lib. 5.

Inque suo pretio ruga senilis erat.

Martis opus juvenes, animosæque bella gerebant,

Et pro Diis aderant in statione suis.

Viribus illa minor, nec habendis utilis armis:

Consilio Patria sæpè ferebat opem.

Nec nisi post annos paruit tunc Curia seros,

Nomen & atatis mite Senatus habet.

Sciebant autem viri prudentissimi; Adolescentum animos plerumque parum providos, eosque molles, & ætate fluxos, quique haud difficulter dolis capiuntur:

Juvenilis ardor impetu primo furit:

Seneca in
Octavia.

Languescit idem subito nec durat diu.

Contrà Senes cunctatores natura sunt, quibus cauta consilia, cum Tacitus. ratione magis, quàm fœlicia ex casu placeant. His (quod olim apertissimè de se Mithridates profitebatur) Fortuna, multis rebus ere- Sall. in frag. ptis, usum dedit benè suadendi. Horum senectus (ut Philto apud Comicum loquitur) Historiam veterem atque antiquam sustinet. Juvenes fidunt Fortunæ, tanquam cum eâ fidem stare oporteat, Livius lib. 35. eorum calida sunt consilia, quæ quidem specie læta, sed tractatu dura, eventu aspera sunt. Prudenter Plutarchus,

ὁ γὰρ ἐστὶ βελῆς τοῦτο ἢ δρόμος τέλῃ.

Cursus haud est finis idem & consilii;

Quia nihil magni discriminis consiliis tam inimicum, quàm præcipitantia. Callidi itaque, non calidi in consilium adhibendi sunt, qui,

Quicquid

*Quicquid est incoctum, non promunt,
Bone coctum duunt;*

Plaut. in
Mil. Ger.

Qui quum cogitarint facere audent, & prius cogitare, quàm facere consueverunt. Legimus ducem illum Græciæ Agamemnonem unum Hestorem decem Ajaci similibus prætulisse: Et quidem jure; quia unius viri Sapientis consilio fruuntur omnes, fortitudine autem viri fortis pauci. Et apud Homerum Nestor in consiliis præcipuus, bello utilis. Darius etiam tot Zopyros sibi exoptat, quot grana insunt Punico malo. Hi autem fuerunt senes, qui non viribus, aut celeritate corporum res magnas gessere, sed consilio, autoritate, & Sapientiâ, quibus non modo non orbari, sed augeri etiam senectus solet.

Virgil.

Nec tarda senectus

Debilitat vires animi, mutatque vigorem.

Et Ovid. in Metamorph.

Non omnia grandior ætas

Quæ fugiamus habet, seris venit usus ab annis.

Hinc ea verba Agamemnonis ad Nestorem Iliad. 8. O senex utinam ut animus in pectoribus amicis, sic tibi genua responderent, visque tibi firma esset. Porro quanquam Sapientia canis non sit æstimanda; & plurimi in vestimento hoc Comici meritò proferre possint;

*Spektare noli simne juvenis qui loquor,
Viri sed utrum verba prudentis loquor;*

Tamen;

Terent.

*Nunquam ita quisquam bene subducta ratione ad vitam fuit;
Quin res, ætas, usus, semper aliquid adportet novi,
Aliquid moneat, ut illa quæ te scire credas, nescias,
Et quæ tibi putaris prima, in experiundo repudies.*

Quia ut alius Comicus inquit;

Sapientia ætas condimentum est, sapiens ætati cibus.

Et; *Multâ est operâ opus ficturæ qui se fictorem probum*

Vita esse agenda expetit.

Itaque Plutarchi sententiâ hæc finio: Maximè servatur Civitas, ubi consilia senum, & juvenum virorum præcellunt lancix.

Miser-

Miserrima servitus, servire voluptati.

E M B L E M A V I I I.



*Imbelli digito dum carpis fila, columque,
Fæmineos inter Sardanapale greges;
Servus es infamis. Quid enim servilius illo,
Quem premit imperiûs fæda libido suis?*

C O M M E N T A R I U S.

Hic error hominum animos invasit, ut illos in purpurâ
& Diademate fulgentes; quibus undique lictor popu-
lum circumfufum arcet, quos supra capita hominum,
supraque turbam delicatos Lectica suspendit; magnos
fœlicesque existimet; quorum tamen superficialiam fœlicita-
tem si diligentius introspeciamus; non reges, liberos, aut fœli-
ces,

Boët. lib. 4. ces, sed miserrimos servoseffe comperiemus:

Met. 2.

*Quos vides sedere celfo
Solii culmine Reges
Purpura claros nitente
Septos tristibus armis:
Detrahat si quis superbis
Vani tegmine cultus
Iam videbit intus arctas
Dominos ferre catenas.*

Seneca.

Nemo quidem illis venientibus resistit; sed nec ipsi ambitioni crudelitati que resistunt. Tunc quum agere visi sunt, aguntur. Quis Tarquinium vitiis affectibusque servientem Regem dicat? An Sardanapalus mihi rex erit, cui muliercula imperat? cui leges imponit, præscribit, jubet, vetat quod videretur? qui nihil imperanti recusari potest, nihil negare audet? Si poscit, dandum est; si vocat, veniendum; si ejicit abeundum; si minatur, extimiscendum est. Ego vero istum non servum, sed nequissimum servum existimo. Quomodo, aut cui tandem hic libero imperabit, qui non potest cupiditatibus suis imperare? Refrenet prius libidines, spernat voluptates, iracundiam teneat, coërceat avaritiam, cæterasque animi labes. Tunc incipiat aliis imperare, cum ipse improbissimus Dominus dedecori ac turpidini parâre desierit. Talem Regem tibi Tragicus depingit.

In Thyest.

*Rex est qui posuit metus,
Et diri mala pectoris,
Qui tuto positus loco
Infrâ se videt omnia.
Occurritque suo libens
Fato, nec queritur mori;
Mens regnum bona possidet,
Rex est, qui metuit nihil.
Hoc regnum sibi quisque dat.*

En tibi Regem, non vitiis, non casibus, non morti ipsi subjectum, omne denique gaudium ex Bona sua mente promentem. Et an non pulchrius ampliusque hoc regnum;

*Quàm si Lybiam remotis
Gadibus jungas; & uterque Pænus
Serviat uni.*

Mihi ceste cum Claudiano videtur, dum inquit,
 Tu licet extremos latè dominere per Indos,
 Te Medus, te mollis Arabs, te Seres adorent;
 Si metuis, si prava cupis, si ducis irâ;
 Servitii patiere jugum, tolerabis iniquas
 Interius leges tunc omnia jura tenebris,
 Cum poteris rex esse tui. Proclivior usus
 In pejora datur, suadetque licentia luxum,
 Illecebrisque effrena favet, tunc vivere castè
 Asperius, cum prompta Venus; tunc durius ira
 Consultur, cum pœna patet. Sed comprime motus,
 Nec tibi quid liceat, sed quid fecisse decebit
 Occurrat.

Non abludit ab hoc illud Senecæ; Si vis exercere tibi utile, nulli
 autem grave imperium; submove vitia. Favet etiam Boëtius;

Lib. 3. Met. 5.

Qui se volet esse potentem,
 Animos domet ille feroces.
 Nec victa libidine colla
 Fœdis submittat habenis;
 Etenim licet Indica tellus
 Longe tua jura tremiscat,
 Et serviat ultima Thule;
 Tamen atras pellerè curas,
 Miseraque fugare querelas
 Non posse; potentia non est.

Futura latent.

EMBLEMA IX.



*Dum gravis apricis in collibus Æschylus errat ,
 Concipens cedro carmina digna lini ;
 Decidit ex Aquilæ rostris Testudo ; sacrumque ;
 Heu , miseri Vatis contudit illa caput :
 Nescia mens hominum Fati , dum plurima fingit
 Secula , mors ipsas sæpe stat ante fores .*

COMMENTARIUS.

Narrant ij , qui Historiam Naturalem conscripserunt ,
 Aquilæ tantum esse ingenii , ut Testitudinem raptam , ex
 alto aptum speculata locum , in saxum aliquod demittat ,
 ut

ut ad eum modum ruptâ testâ carnibus vesci possit, Verum in Æschylo parum aquilinis oculis fuit, quum in hujus albicantem calvariem, saxum esse rata, dimissâ Testitudinc miserum occiderit, ut vel ob hanc unam causam optimo jure Poëtis omnibus conveniat esse invisam. Hujus autem Æschyli improvisus casus admonet nos fragilitatis vitæ humanæ, nostrasque conceptiones inanes esse, utpote quæ pusillo temporis spatio sæpe franguntur & corruunt, & in ipso cursu ante obruuntur, quàm portum conspiciere valeant: ita ut verissime cecinerit Tragicus.

Gens hominum fertur rapidis obvia fati

Incerta sui, stygiasque ultrò querimus umbras.

In Herc. fuerent.
Seneca ad Lucil.

Omnis dies, omnis hora vitam nostram carpit, omne denique momentum quàm nihil simus ostendit, & aliquo argumento recenti admonet nos fragilitatis nostræ oblitos, & æterna cogitantes, respicere cogit ad mortem. Quod animadvertens Aristoteles, vere nos imbecillitatis exemplum, temporis spoliū, Fortunæ lusus, & calamitatis trutinam appellavit. Et ille dixit: Hominem esse lutum scitè mixtum, vitam, hæminam unam sanguinis, quam quilibet levis casus rumpit, quælibet febricula corrumpit. Quid Lucianos in Charonte? vitas hominum bullis hujusmodi similes facit, quarum aliæ simul ac natæ sunt protinus evanescunt, aliæ paulo diutius durant, omnes brevissimis quibusdam intervallis aliæ succedunt aliis. Plautus in Pseudolo.

Quasi herba solstitialis paulisper fui:

Repente exortas sum, repentino occidi.

Huc etiam respexit Pindarus, cum dixit, *τί δὲ τίς, τί δὲ τίς σκιάς ὄναρ αὐθιγῶτος.* i. Quid est aliquis? quid est nullus? umbræ somnium homo. Et verè; punctum enim est quod vivimus, & adhuc puncto minus, sed hoc minimum specie quadam longioris spatii natura derisit. Aliud ex hoc infantia terit, aliud pueritia, aliud adolescentia, aliud inclinatio ad senectutem, aliud ipsa senectus. Et sic

Seneca.

Festinat decurrere velox

Flosculus angustæ, miseraque brevissima vita

Portio, dum bibimus, dum sarta, unguenta, puellas

Poscimus, obrepit non intellecta senectus.

Juvenal.

Immo & mors: Sed in hoc errore versamur omnes, ut non putemus nisi senes inclinatosque ad eam vergere, quum illò in-

Seneca in Consul.

fantia statim, & juvena, omnisque ætas ferat. Agunt opus suum fata, nobis sensum nostræ necis auferunt, quoque facilius obrepit mors, sub ipso vitæ nomine later.

Nascentes morimur, finisque ab origine pendet.

Tragicus.

Et prima quæ vitam dedit hora carpsit. Hæc quum ita sese habeant quum tantulum sit quod vivimus, quantis tamen illud circumscriptum est angustiis? Sexcenta morborum genera quotidie infestant, nec pauciores impetunt casus, & ruinæ, venena, naufragium, lapsus, fulmen, & quid non? Ait non falsus Vates,

Stat

*Quid crastina volverit atas
Scire nefas homini.*

Et Lyricorum Princeps,

*Quid sit futurum nunquam homini satis.
Cautum est in horas, navita Bosphorum
Pænus perhorrescit, neque ultrâ
Cæca timet aliunde fata:
Miles sagittas, & celerem fugam
Parthi, sagittas Parthus & Italum
Robur, sed improvisa lethi
Vis rapuit rapietque gentes.*

Petron.

Alium acini granum glutientem, suffocatum accipimus; Alium porus cum lacte pilus strangulavit. Illum Bellantem arma decipiunt. Illum Diis vota reddentem Penatum suorum ruina sepe lit. Ille vehiculo lapsus properantem spiritum excussit. Si bene calculum ponas; ubique mors præsto est. Et tamen nos hoc animal sumus, quod tantos molitur tumultus, cujusque cupiditatibus hic orbis angustus. Cujus rei clarissimum specimen præbuit Alexander, qui Philosopho quodam de pluribus mundis disserente plorasse dicitur, quod unum tantum subegisset, eoque insanix tandem devenit, ut Deus appellari voluerit. O turgidum putrentis vermis votum! nesciebat scilicet se sperma fætidum, saccum stercorum, animal denique esse ἡμερόβιον, cui vitæ mensura dies. Sed quid hoc in Alexandro Monarcha totius universi miramur? Cum inter tot Fortunæ obsequia parum sobria sit mortalitas? In nos descendamus, idem & nobis objicii posse comperiemus. Quanto studio, quantaque contentione miselli homunciones honori & ambitioni velificamur? quàm solliciti in

in titulum sepulchri laboramus? quum tamen omnia mortalium studia mortalitare damnata sint. In quam longinquum cogitationes nostras ordinamus? ignari nullam fidem vitæ esse, maximam mori. Providus certè, & in posterum prospiciens mihi sit; qui collectis sarcinis suis, & ex hac vitâ tanquam hospitio, migrare paratus; crastinum securus expectet, quem si Deus concedat, in lucrum suum deputer.

Despe-

Desperatio audaces reddit.

E M B L E M A T A X.



*Actum est, interii, nisi Desperatio præceps,
Per medias cæcam concitet ire fudes.*

C O M M E N T A R I U S.

Pessimè meâ sententiâ Imperatores ducesque ij agunt, qui hostes suos ad extremos usque fines persequuntur: Nam quemadmodum felis undique cincta fustibus

Fortis virtute coactâ

Lucan.

Per eos ruit, & sæpissimè evadit: sic hostibus locorum angustijs, & armatorum multitudine circumventis, ex desperatione crescit audacia, & quum spei nihil est, sumit arma formido. Quod probè intelligens Scipio; dicebat hostibus viam, quâ fu-

fugiant, aperiendam esse. Sæpè enim qui mortem evadere non potest, ultro pericula sequitur. Eique (ut Statius asserit)

Vires fiducia lethi

Lib. 7. The-
baid.

Suggest.

Ita ut illud Virgilii audiat;

Moriamur, & in media arma ruamus;

Vna salus victis nullam sperare salutem.

Et, ut Seneca in Medea inquit;

Qui nil potest potest sperare, desperet nihil.

Valerius Maximus ait; Humanæ imbecillitatis fortissimum du- Lib. 2.
rumentum esse necessitatem. De hoc si antea dubitabatur, nostris temporibus ingenti documento, adversus Hispanos, compertum est; nulli scilicet populo, ad decus ac libertatem nato, tam degenerem animum esse, ut velit, tam afflictas vires ut cogatur permanere in eâ vivendi conditione, cujus eum pœniteat. Hinc enim dolor, & indignatio, eruptura tandem in nervos, ubi graviora sunt quæ patiuntur homines, quàm quæ ultra formidare queant. Damindas, quum Philippus irrupisset in Peloponesum, & quidam ira loqueretur; Periculum est ne acerba patiantur Lacedæmonii, nisi Philippo reconcilientur; O semiviri inquit, quid nobis poterit acerbi accidere, qui mortem contemnimus? Crotoniensium (ut ait Justinus) centum & viginti millia armatorum erant, quum Locrenses paucitatem suam conspicientes (nam sola quindécim millia militum habebant) omisâ spe victoriæ in destinatam mortem conspirant, tantusque ardor ex desperatione singulos cœpit, ut victores sese putarent, si non inulti morerentur. Hi quum mori honestè quærunt, victores exstiterunt. Tantum scilicet effecit mistus timori pudor, spesque desperatione quæsitâ. Proinde altè sedeat Imperatorum animis, quod Pyrrhus, inter cætera militaria præcepta, memoriæ prodidit: Non esse pertinaciter instandum hosti fugienti. Sed secundum Guicciardinum, *All' inimico quando voleva andersene, non si doveva chiudere la strada, ma più presto, secondo il vulgato proverbio, fabricarli il ponte d'argento.*

Quia fortior ultima virtus.

Lucanus.

Et acerbissimi sunt morsus morientium ferarum.

In statuam Bacchi.

E M B L E M A XI.



Cur ferulam Bacchus manibus gerit atque papaver ?

Dic mihi cur veteres hæc voluere Patres ?

Scilicet ut vino plenus, det corpora somno,

Postridie pœnas se meruisse sciat.

C O M M E N T A R I U S.

Veteres illi quorum auctoritas & Sapientia adhuc usque tempora provecta est; Bacchi statuam ita depingebant, ut ferulam dextrâ, papaver verò sinistrâ gestaret, innu-
entes per ferulam, ebriosum pœnâ dignum, per papaver, nihil ei esse utilius somno. Egregium certè commentum : Nam
quum

Hodie est magnum hoc vitium in vino, ut

Pedes captet & linguam luctator doloſus :

Plautus.

cumque ebrius, ignoratione ſui, dubia, & parum explanata verba proferat, & vertigine capitis laboranti, tota domus, velut aliquo turbine, circumagi videatur, quid illi conſultius quàm crapulam illam, ſtomachi tormentum, quum efferveſcit merum, & viſcera diſtendit, edormire? Poſtero autem die, quum ſibi reditus intelligit omnia vitia ſua detecta, pœnitentiam agit. Etenim quemadmodum muſto dolia ipſa rumpuntur, & omne quod in imo jacet, in ſummam partem, vi caloris ejicitur: ſic vino exæſtante, quicquid in imo eſt abditum, effertur. Tunc injuſta prodeunt certamina, & nullis exiſtentibus cauſis, aſpera rixa excitatur, quia ebrius, interponendo verba ſua vana, aliorum ſana dicta non audit, ſed in contumeliam erigitur, in convivarum & proximorum crimina, & cœdes. Ne longè exempla petamus, offert ſe nobis Alexander, qui Clitum, chariſſimum ſibi ac fideſſimum, inter pocula transfodit, & intellecto facinore mori voluit. Denique

Ne quis modici tranſiliat munera Liberi

Centaurea monet cum Lapithis rixa ſuper mero

Debellata, monet Sithoniis non levis Evius,

Cum ſas atque neſas exiguo ſine libidinum

Diſcernunt avidi.

Horat.

Certè

Nox, & amor, vinumque nihil moderabile ſuadent,

Ille pudore vacat, Liber Amorque metu.

Hinc Hegio, apud Terentium in Adelphis, docens Soſtræ filiam inique ab Æſchyno tractatam, ac tandem vitiatam eſſe, ſic ait;

Perſuaſit nox, amor, vinum, adoleſcentia.

Et Plautus in Bacchidib.

Iſto illecebroſus

Fieri nihil poteſt, nox, mulier, vinum, homini adoleſcentulo.

Hoc intelligens Pittacus Mitylenæus, legem tulit, ut, qui per temulentiam ſcleris quid commiſiſſet, duplo plecteretur. Solet enim vulgus hominum, ebrietatis obtentu crimen extenuare, & omnem offenſam in vinum conjicere. Hoc videre eſt in Dinarcho adoleſcente apud Plautum, dum inquit;

*Per tua obsecro genua, ut tu istuc insipienter factum sapienter feras,
Mihique ignoscas, quod animi impos, vini vitio fecerim :*

Cui Callicles senex;

Non places, in mutum culpam confers, quod nequit loqui,

Nam vinum si fabulari posset, se defenderet.

Non vinum hominibus moderari, sed vino homines solent,

Qui quidem probi sunt, verum qui improbus est, aquam si bibit,


Sive adeo caret temeto; tamen ab ingenio est improbus.

Certe vinum si effundendum est, aliter effundi potest quam per corpus humanum, in quo consilia impedit, & vigilantiam aufert. Leotychidas quodam rogante quam ob causam parum biberent Spartiata; Respondit; ne pro nobis alii consultent, sed nos pro aliis. Nam, ut Menander inquit, multum meri nefaria cogit sapere. Vini usum præscribet tibi Anacharsis, qui dicebat vitem ferre tres botros, primum voluptatis, alterum ebrietatis, tertium molestiæ: Sentiens parcum vini usum esse jucundum, quia sedat sitim, largiorem gignere temulentiam, largissimum parere rixas, cædes, & morbos.

Medio

Medio tutissimus ibis.

E M B L E M A XII.



*In medio fueram tutus; dum prendere summa
Nitor, in aduersum culmine dejicior.*

COMMENTARIUS.

DOcet hoc Emblemata; Fortunam reverenter, & cum modo esse habendam, ne dum ad culmen pervenire contendimus, unâcum ipsis ramis, quos comprehendimus, decidamus. Testudo ubi collecta in suum tegmen est, tuta stat ad omnes ictus; ubi exierit partes aliqua; quodcunque nudavit; obnoxium atque infirmum habet: sic nos, apud nos tuti sumus. Cum autem Cæsareum illud, *Plus ultra*; cogitantes, Fortunæ nos exponimus; ex alto in imum sæpe præcipitamus.

Quoniam ad ultimum exire, nisi lenta fœlicitas non solet. Appetitus autem, dum longius evagantur, & tanquam exulantes cupiendo atque appetendo, non satis à Ratione cohibentur; ~~fistula~~ & modum transeunt; quem ubi semel reliquerunt; actum est:

Quisquis (enim) medium defugit iter;

Seneca.

Stabili nunquam tramite currit.

Et secundum Aristotelem; quantò magis aliquid accedit ad medium, tantò melius; quantò magis distat à medio, tanto pejus est.

Hoc unum itaque cum Plauto cogitemus;

In Præfatio.

Modum omnibus rebus optimum esse habitum,

Nimiaeque omnia, nimium exhibere negotium hominibus ex se.

Prudenter Tragicus;

In Oedipo.

Fata si liceat mihi

Fingere arbitrio meo;

Temperem Zephyro levi

Vela; ne presse gravi

Strepitu antenna tremant.

Tuta me media vehat

Vita decurrens via.

Quicquid excessit modum

Pendet instabili loco.

Probavit hoc insolens ille puer, patriæ cautionis immemor, qui

Gnosum Regem timens,

Alta dum demens petit,

Artibus fidens novis,

Certat & auras leves

Vincere, & falsis nimis

Imperat pennis Puer;

Nomen eripuit freto.

Callidus medium senex

Dadalus librans iter:

Nube sub mediâ stetit

Alitem spectans suum.

Hinc ita Horatius ad Licinium,

Ode. 10.
lib. 2.

Rectius vives Licini, neque altum

Semper argendo, neque dum procellas

Cantus horrescis nimirum premendo

Littus iniquum.

*Auream quisquis mediocritatem
Diligit, tutus caret obsoleti
Sordibus tecti, caret invidendâ.*

Sobrius aulâ.

*Vivitur parvo benè, cui paternum
Splendet in mensa tenui salinum,
Nec leves summos timor, aut cupido*

Sordidus aufert.

Munera ista quæ fallax Rhamnusia dat insidiæ sunt, & quod Demosthenes de donis hostium dicebat; *δῶρα ἄδωρα.*

Quicquid in altum Fortuna tulit, ruitura levat.

Tragicus.

Licet enim pullis suis aspirare aliquando videatur, tamen ad ultimum temeritati non sufficit, quosque diu prosecuta est, repente velut fatigata destituit. Destituit? immò abjicit. Soletque, quos plurimis beneficiis ornavit, ad durissimos casus reservare.

Vell. Pater.
terc. lib. 2.

Et longi pœnas Fortuna favoris

Lucanus.

Exigit à miseris.

Itaque adversus hujus fallacias, hoc scuto & scito, cum Senecâ te munio & monco; Ut scilicet ad parva te redigas, ex quibus cadere non possis; & Fortunam, ut tunicam, magis concinnam quàm longam probes.

Epist. 20.

In Deo lætandum.

EMBLEMA XIII.



*Cynthius igniferâ contingit lampade terram.
 Et tamen æthereo servat in axe locum:
 Sic Animus, quanquam sit nostri corporis hospes,
 Assiduò auctori debet adesse Deo.*

COMMENTARIUS.

Seneca lo-
 cus.

QUamquam simus inclusi his corporis compagibus, ubi munere quodam necessitatis, & gravi opere perfungimur; Animus tamen, illa Divina particula auræ, altius surgere debet; Nulli enim ei positi sunt termini nisi communes propemodum cum Deo. Ad quem à corporis sui habitu vocatur, qui in Cælum erigitur, quò ipsum initia sua

sua, & origo trahunt. Maximum autem argumentum est divinitatis; si hæc, in quibus versatur, humilia judicet & angusta, si exire non metuat, unde venit. Erit autem illuc, etiam antequam hâc custodiâ exolvatur, si vitia, ad quæ, à carnali corpore, malo suo hospitio, impellitur, deferat; purusque ac levis in cogitationes divinas emicet. Quarum ducem sibi habebit cœlestem illam Philosophiam, quum securus; oculis suis per cœli plagas, & assiduo lucentes globos peregrinabitur, iis itineribus, quæ exploratione acuminis sui, pervia sunt solis mediatationibus. Audi Vatem;

*Mente Deos adiit, & qua Natura negavit
Visibus humanis; oculis ea pectoris hausit.*

Ovid.

In hac sublimitate collocato, nihil videbitur magnum in rebus humanis, utpote cui æternitas omnis totiusque mundi nota erit magnitudo. Aurum argentumque, in quibus jacuere tenebris, dignissima non hoc æstimabit splendore, quo imperitorum verberant oculos, sed irretortis luminibus præteribit, & tamen Orientem, Occidentemque plagam suam faciet. Cum verò veniet dies ille decretorius, qui mixtum hoc divini humanique secernat; non illum tanquam extremum reformidabit, sed tanquam æterni natalem, lætus aspiciet. Corpus hoc ubi invenerat relinquet, nec quis deinde reliquus ejus futurus sit exitus quæret. Et cum cordatissimo illo Sene hilaris exclamabit; Non me pœnitet vixisse, quoniam ita vixi, ut frustra me natum non existimem; discedo autem ex hâc vitâ, tanquam ex hospitio.

Ingratis servire nefas.

E M B L E M A X I V.



*Serpentes hederæ nequeunt consistere per se ,
Sed duce Populeo stemmate summa petunt.
Et tamen hoc vitâ tandem complexibus orbant ,
Obsequiis vinci mens malè grata nequit.*

C O M M E N T A R I U S.

Hederæ herba est perpetuò virens; quæ quum per se stare non possit; arboribus & muris adhæret. Hinc ab hærendo eam dictam putant. Sed verisimilius ejus nominis originem ab Edo deducemus; quod arbores, atque parietes edat, & consumat. Adstipulatur Festus: Hederæ dicta,

dicta, quod hæreat, vel quod edita petat, vel quia, id cui adhæserit, edat. Et vetus Poëta Laberius ;

Vt hadera serpens vires aboreas necat ;

Ita me vetustas amplexu annorum enecat ;

Sepulchris similis, nil nisi nomen retineo.

Hujus herbæ exemplo, quidam primam & facillimam ad gloriam viam ineunt, per notitiam clarorum, & illustrium virorum, deq; Republicâ benè merentium, ut non aliter quàm hedera, validam amplexu arborem, unâ cum eâ se erigit atque attollit; sic illorû hominum consortio innotescant. Tamen quemadmodum hædera, vires, & vitalem illum arboris succum ac spiritum arctis suis amplexibus impedit, atq; enecat: sic sæpissime videmus illos qui cum talibus simul & surgunt & crescunt, eò tandem insolentiæ devenire, ut per quos profecerunt, & quibus omnia incrementa sua, vitam denique ipsam debent; eos de statu deiciant. Ut alia omittam; insigne maximæ ingratiitudinis exemplum præbuit impius ille Sextilius, qui L. Cæsarem; à quo tum studiose, tum etiam fœliciter, gravissimi criminis reus fuerat defensus; Cinnamæ profectionis tempore profugum, à sacris perfidæ mensæ & altaribus nefandorum penarum avulsum, truculento victori tradere jugulandum non exhorruit. Themistocles olim se platanis similem haberi conquestus est; sub quarum ramos, ubi tempestas & pluvîæ ingruunt, confugitur; ubi verò serenitas oboritur, rami earum amputantur, & conteruntur pedibus: Idem de illo actum; cum enim patriam incolumem, claram, opulentam, principem denique Græciæ reddidisset, eousque illam inimicam sensit, vt ad Xerxis, quem paulo ante destruxerat, misericordiam perfugere necesse habuerit. Egregiam certè ingratiitudinem! quid aliud hoc, quam cum ariete iniquam nutritionis mercedem persolvere? Anaxogoras Philosophus, quum à Pericle, curis publicis occupato, jam senex negligetur, capite obvoluto, vitam inediâ finire decrevit; Periclem itaque casu adventantem, & serio, sed sero lamentantem, quod talem in Republicâ gerendâ consiliarium amitteret, hâc voce allocutus est; Quibus lumine opus est. hi oleum lucernæ affundunt. Verum hercle effatum, & optime quadrans in ingratos, quos diversis locis ita perstringit Comicus,

Plutarc.
Polit.

Val. Max.

*Nihil amas, cum ingratum amas, neque tipula levius pondus,
quam fides ejus;*

Si quid benefacias, levior pluma est gratia.

Si quid peccatum est, plumbeas iras gerit.

Ad Demon. Isocrates eos canibus alienis comparat, quibus licet benefiat, tamen in posterum admordent, & allatrant. Quare ironicè Theocritus inquit;

In Hodæpor. *Pasce canes, qui te lanient, catulosque luporum.*

sentiens scilicet minimè eos esse favendos, ne miseri Aetæones à privatis discerpamur canibus, quoniam, ut testatur Mimus;

Malevolus semper suâ naturâ vescitur.

Æschylus;

Catulum Leonis alere in orbe non juvat,


Magis cavendum ne Leones nutrias,

Quos qui educarit; ejus & mores ferat.

A mi-

A minimis quoque sibi timendum.

EMBLEMA XV.



*En ego qui terror cunctis incedo per orbem ;
 Solius culicis spicula dira tremo :
 Ne nervis confide tuis ; Nam parvula quæque ,
 Dum minimè credis, quo perimamur habent.*

COMMENTARIUS.

MOnemur hoc Emblemate; nihil tam firmum esse, cui periculum non sit ab invalido Sic Leo aliquando minimarum avium pabulam fit, & ferrum rubigo consumit. Arbores magnæ diu crescunt; momento extirpantur. Sylva multarum ætatum unâ horâ fit cinis. Xiphus piscis, Latinis Gladius, ipsi Balænis (teste Æliano & Plinio) formidabi-

dabilis; Oestro, sive Asylo, insecto vix aranei magnitudinis, percitus in furorem adigitur; ita ut sæpè in terram, vel naves exsiliat, donec tandem immensos cruciatus cum morte commutet. Quod animadvertentes, nimiam nostri fiduciam paululum ponamus, & cogitemus, eum qui jam in rerum est cumulo, cras posse esse in tumulto:

Seneca.

*Vos quibus Rector maris atque terra
Ius dedit magnum necis, atque vita,
Ponite inflatos tumidosque vultus,
Quicquid à vobis minor extimescit;
Major hoc vobis Dominus minatur:
Omne sub regno graviore regnum est.*

Horatius,

*Regum timendorum in proprios greges,
Reges in ipsos imperium est Iovis.*

Olim hi versus contra Imperatoris Maximini senioris crudelitatem prolati sunt:

*Qui ab uno non potest occidi, à multis occiditur,
Elephas quidem grandis est, & occiditur,
Leo fortis est, & tamen occiditur:
Tigris acerrimus est, & occiditur:
Cave multos, si singulos non times.*

Una enim cervix Régis est, ac plurimæ sunt subditorum manus; & qui suam negligit, in cujusslibet vitam jus habet. Hæc exempla Principes moneant, ut humanitatis gloriam accupentur, amentque cum nomine Maximi; jungere etiam nomen Optimi, certi certissimum esse munimentum, munimento non egere, sed solo subditorum amore stipari. Quia,

Claud.

*Non sic excubia, nec circumstantia tela;
Quam tutatur amor.*

Fortitudine jungendus astus.

E M B L E M A X V I.



*Quid sibi vult rabido Vulpes conjuncta Leoni?
Scilicet ut Vires adjuvet usque Dolus.*

C O M M E N T A R I U S.

DIcebat olim Lyfander; si Leonis exuvium non sufficit; adde vulpinum: Innuere volens; quum res viribus obtineri non possit, adhibendum esse Dolum; Et quum Facuvius. contendere nequitum est; clam tendendum esse plagam. Hic Lyfander quemadmodum in ejus vitâ memorat Plutarchus irridere solitus est eos, qui veluti ab Hercule prognati, bella apertis viribus, citraque dolum, gerenda esse censerent. Simile huic Lyfandri, Maro etiam approbare videtur, cum inquit;

Mu-

Lib. 2. Æ-
neid.

*Mutemus clypeos, Danaumque insignia nobis
Aptemus, dolus an virtus quis in hoste requirat.*

Plutarch. in
Vit. Syll.

Carbo olim Syllæ dixisse memoratur, se bellum gerere cum Vulpe & Leone; quorum uterque habitabat in animo Syllæ, sed magis se à Vulpe timere sibi quàm à Leone. Et hodie videmus, magis astutiam in bello, quàm vires exerceri, cum ingentibus illis & execrandis machinis bellicis atque bombardis, fortissimi quique, & Homeri verbo, *θυμολέοντες* ab imbellissimo timidissimoque homuncione sæpe tollantur.

Ab imbellibus nulla victoria.

E M B L E M A XVII.



*Iacentem Leporem Canis laceffet
 Rarò; sternere posse cursitantem
 Gaudet : Sic generosus ardor ille
 Heroùm, modò strenuos fatigat;
 Vires pectoris incitat fovetque
 Æmulatio; quòque perstat hostis
 Magis; hoc magis incitatur ardor.*

C O M M E N T A R I U S.

DOcemur hoc Emblemate
Parcere subjectis, & debellare superbos:
 G

Virg. Æ.
 Exem-ncid. 6.

Exemplo Canis, qui (ut Pierius in Hieroglyphicis suis de Cane ait, prostratum Leporem rarissimè laceffit, sed fugientem ex naturali illa ἀντιπαθεία quam ocissimè insequitur. Leones prostratis parcut, & in viros potius quàm fœminas sæviunt, non perimunt infantes, nisi magnâ fame coacti. De his sic Ovidius ;

Lib. 3. Trist.
Eleg. 4.

*Corpora magnanimo satis est prostrasse Leoni,
Pugna suum finem, quum jacet hostis, habet ;
At lupus, & tristes instant morientibus ursæ ;
Et quacunque minor nobilitate fera est.*

Et à Lucano dicitur

Nobilis ira Leonum.

Quibus ferarum exemplis monemur, in eâ victoriâ, quæ de vilibus reportatur hostibus, nullam inesse dignitatem, verùm cum præstantibus susceptam contentionem esse in utramque partem tutam. Nam ejus victoria insignem habet gloriam, & si quid secus acciderit, præsto est consolatio. Præterea monemur alieno sanguini tanquam nostro parcendum, & homine non esse prodige abutendum, sed potius clementiam exercendam; quâ virtute nihil magno & præclaro viro dignius, nihil laudabilius,

Claud.

— *Nam quum vincamur ab omni
Munere; sola Deos aquat clementia nobis.*

Terentius in Adelphis :

Reipsa repperi

Facilitate nihil esse homini melius neque clementiâ.

Nullum ornamentum Principis fastigio dignius, quàm illa Corona, quæ datur Ob Cives servatos.

Seneca in
Media.

Hoc Reges habent

*Magnificum, & ingens, nulla quod rapiat dies ;
Prodesse miseris, supplices fido lare
Protegere.*

Seneca de
Clement.

Hæc autem gloria servandi, nemini competit, nisi majori. Legimus apum Regem non aculeo, sed ipsa majestate armari. Voluit scilicet illum, Naturæ opifex Deus, nec sævum esse, nec ulationem magno constituram petere ; telumque detraxit, & iram ejus inermem reliquit. Exemplar hoc magnis regibus ingens, quos non laurus, nec duces catenati, non bracteatus licitor, non fremor Quiritum, aut arma perduellibus erepta, spoliave, queis

Feretrium.

Feretrium Jovem mactare solet, æque clarant, quàm hæc clementiæ laus. Uti itaque animose debent tanto munere Deorum, dandi auferendique vitam potentes: in his præsertim, quos sciunt aliquando suo fastigio obstitisse, hoc arbitrium adepti, ultionem impleverunt, perfeceruntque, quantum veræ pœnæ satis erat. Perdidit enim vitam qui debet: & quisquis ex alto ad inimici pedes abjectus, alienam de capite suo sententiam expectavit, in servatoris sui gloriam vivet, plusque nomini ejus conferet incolumis, quam si ex oculis ejus ablatus esset. Novit hoc probè Antigonus, qui hostibus victis omnem libertatem concessit, & Philippus, qui Athenienses sine pretio dimisit incolumes. Cæsar etiam laudatus olim fuit, quod bellum aliorum pace mollius gessisset. Magni scilicet animi est injurias in summa potentia pati, nec quicquam gloriosius Principe impune læso. Illud non venit in dubium, quin se exemerit turbæ, & altius steterit, quisquis despexit laceffentes. Sic irritus ingenti scopulo fluctus assultat. Sic immanis fera latratu canum minimorum lenta respicit, nec unquam fando auditum, aut lectum est bubones cecidisse Pœanis arcu. Timidi & imbelles Damæ non possunt mereri iram nobiliorum ferarum, & *Ἀετὸς ὃ θηρεύει τὰς μύσας*, id est, aquila non caprat muscas: quod si autem à Cornice provocetur, negligit illam, sciens sibi ab illà noceri non posse. Seneca eodem.

Idem.

Adag.

Noctua Minervæ sacra.

E M B L E M A XVIII.



*Nocte vigent sensus; hinc est sacrata Minervæ.
Noctua, quæ triplici lumine nocte videt.*

COMMENTARIUS.

Ovid. 2. Metamorp.

DUabus de causis Noctua Minervæ sacra est; tum quia pauciloqua (quæ causa fuit cur in Cornicis locum succederet) tum quia nocte acutissimè videt. Minerva autem Dea sapientiæ, sapientes sibi quærit consiliarios. Nullum vero sapientius consilium quàm nocturnum, quale semper est Noctuæ. Plutarchus in Sympoticis, decade septima, problemate nono, citat Platonem, qui scripserit, apud Lacedæmonios fuisse νυκτερινὸν σύνορον, id est nocturnum conventum gravissimorum virorum; ad quem gravissimæ causæ rejiciebantur. Addit apud.

apud Veteres noctem *ἡ νύκτα* fuisse vocatam, *ἡ νύκτα φρονεῖν*, id est, à bene sapiendo. Enimverò propter solitudinem, altumque illud silentium, vel maxime ad considerandum & consultandum de rebus gravibus nox est idonea. Nulla enim acrior, nulla altior cogitatio, quàm nocturna: quia illa mentis vis vehementior est, quum per oculorum meatus non expirat. Scopelianus Sophista, quoniam somni parcissimus erat, noctem existimabat studiis & exercitationi mentis, accommodam. Hinc subinde exclamabat: O nox, tu sanè maximâ ex parte consors es sapientiæ Deorum! Habet enim homines mens, in alto illo silentio, corporis sensibus jam feriatis, aliquid divinitatis, si sese intenderit ad rerum sublimium speculationem. Plautus in Epidico:

De die sapè stultividi sumus, contra noctu

Licet senatum in corde convocare consiliarium.

Audi Plinium Epist. Lib. ix. Mire silentio & tenebris animus alitur, ab iis quæ avocant abductus, & liber, & mihi relictus. Non oculos animo, sed animum oculis sequor, qui eadem, quæ mens, vident; quoties non vident alia. Cur Philosophum illum oculos sibi erui curasse putabimus, nisi quia aut melius philosopharetur, aut ut vitiis viam, quæ per oculos est, eriperet? Ut enim ad Lucernæ flammam, pyralles, culicies, & id genus alia insecta convolant; sic ad oculos alati isti cupidines vitiorum. Homerus utroque quidem oculo captus fuit, at mentis oculis ita usus est, ut non modò Poëtis & pictoribus, sed omnibus omninò doctis faciem & lucernam accenderit.

Vinum acuit ingenium.

E M B L E M A XIX.



*Pegasus, & Bacchus tabulâ junguntur in unâ;
 Huic latus, huic sacrum circuit ala caput:
 Mens humana calens modico perfusa Lyæo
 Surgit, & ignavam deserit ales humum.*

C O M M E N T A R I V S.

Nemo ita perfunctoriè in Poëtis versatus est, ut ignoret Pegasus Equum esse alatum, è Medusæ sanguine procreatum, & ita dictum ἵππος πηγῆς, id est, à fonte. Cum enim in Heliconâ evolasset, saxum ungulâ feriens, aperuit. Qui ex eo Hippocrene, id est, fons equinus appellatus est. Huic Pegaso, sicuti & Baccho, ideo alas tribuit vetustas, quod scilicet

scilicet Vinum modicè sumptum ingenium reddat agile & alacre,
& , quemadmodum versus ille apud Athenæum innuit ,

Οινός ἡ χαρίεντι πέλει μέγας ἵππος αἰοῖ δ᾽ ὦ

Plutarchus auctor doctissimus , inventionem & facundiam Vino tribuit ; dum sic in Sympotiacis loquitur : Quidam inter bibendum inventionis acrimoniâ & linguæ facundiâ , quæ in sobriis jejuna & contracta erat , seipso superant , iique vini fervore , ceu odore quodam thureo suffiri , atque expleri se sentiunt , metu , qui spiritus generosos cohibebat , expulso. Quamobrem Homerus suos Heroas , ipsumque Ulysses de rebus gravissimis & quam maxime seriis inter pocula facit differentes , non illa quidem (ut verisimile est) pleno auro spumantia , quibus sapientia obumbratur ; sed parva & rorantia , quæ quum in Venas animumque manare & illabi cœperunt , mandragoræ adinstar curas omnes sopiunt & componunt , & non obnoxie , ac proinde vere loquendi facultatem , sine quâ nullus ingenii aut industriæ usus est , adserunt. Hæc sunt

Quæ lenè tormentum ingenio admovent

Plerumque duro ,

Quæ nos hilari ludibundaque mente ad festivitatis portum perducunt , quæque ex sententia Platonis ingenii fomites , virtutumque incitamenta sunt. Videmus quod plantis , idem etiam evenire nobis , illæ enim si paulatim , quantumque satis est bibant , sese erigunt , & tepentis halitum favonii admittunt : Nos , si modice flore illo Liberi Patris adspergamur , animo adfurgentes , magnum quippiam & supra reliquorum mediocritatem meditamur. Hoc si alibi , in Poëtis certe dilucide videre est , hominibus integritæ , scelerisque puris , quorum animæ cum verum illum & non fictum Pegasi liquorem largiuscule admiserint ; ab omni verborum (ut ita dicam) vilitate effugiunt , & sumunt voces à plebe summotas. Iraque Horatius , cum iis qui Gratiis sacrificant , tres tantum cyathos haurire permittat ; Musarum sacris operatos novenum debere numerum supplere edicit.

Qui Musas amat impares ,

Ternos ter cyathos attonitus petat

Vates : tres prohibet supra

Rixarum metuens tangere Gratia.

Quantò

Apulejus
lib. 4. Flor.

Petron Ar-
bit.

Quanto enim Musarum cratera crebrior, quantoque meracior, tanto propior ad animi sanitatem est. Tunc per exuberans sententiarum tormentum præcipitatur liber spiritus, ut Poëtarum scripta, potius furentis animi vaticinatio appareant, quàm religiosæ orationis sub testibus fides. Narrant Ennium bella, Æschylum tragædias, non nisi inter calices scripsisse: quos partus concipere, & ita omnibus numeris absolutos edere non potuissent, si potius Nymphis, quàm Baccho se devovissent :

Τὸ δὲ πρὸς τῶν χορηγῶν εἰδὲν αὐτῶν :

Et ut I laccus inquit,

Nulla placere diu, nec vivere carmina possunt

Quæ scribuntur aqua potoribus.

Hoc de sese Martialis profitetur,

Possum nil ego sobrius, bibenti

Occurrunt mihi quindecim Poëta.

Seneca de
Tranquil.
Anim.

Nam si ve Græco Vati credimus; aliquando & insanire jucundum est: si ve Platoni; frustra Poëticas fores compos sui pepulit: si ve Aristoteli; nullum magnum ingenium sine mixturâ dementiæ fuit. Non potest grande aliquid, nec supra cæteros loqui, nisi mota mens. Cum vulgaria & solita contempsit, instinctuque sacro surrexit excelsior, tunc demum aliquid cecinit grandius ore mortali. Non potest sublime quicquam & in arduo positum contingere, quamdiu apud se est. Desciscat oportet à solito & efferatur, & mordeat frenos, & rectorem rapiat suum, eoque ferat, quò per se timuisset ascendere. Quod non aliter, quam modici vini beneficio fiet. Ita ut valde mihi Dirceus ille Cygnus, quamvis multa aura illum levet, errasse videatur; dum cantus suos sic auspicatur; *Ἀεῖον μὲν ὕδαρ*: Nisi forte Ismenus patriæ suæ Fluviu, non aquâ, sed vino decurrerit. Aliter certè ille vatum pater Homerus sensit, qui nimium decantandis vini laudibus à plerisque *vinosus* arguitur. Et quidem si verum excutiamus, re ipsâ hoc comprobavit: Ita enim vitam suam, in morem Cicadæ, instituit, ita obiit, ut nec Codicillos, nec Legatum facere necesse habuerit, sed sibi ipse hæres extiterit. Et cum septem urbes de Natalibus ejus certarunt, vix duo mendici propter baculum, & peram digladiati sunt. A Poëtis ad gravissimos illos Romuli nepotes transeo, qui, ut est ingenium humanitatis, etiam plussculum innoxie hilaritati indulgere non dubitarunt

tarunt Scimus priscā illam intonsi Catonis virtutem sæpè mero caluisse, & virum illum durissimum, corā quo Romam pec- care pudit, frontem severam & rugas inter amicos quibus sese dabat explicuisse: Probè enim callebat cordatus vir, hominem publicis negotiis occupatissimum, remissum quidem aliquando animum posse habere, nunquam solutum,

Horat.

Siccis omnia nam dura Deus proposuit, neque

Mordaces aliter diffugiunt sollicitudines.

Zeno interrogatus cur quum esset severus, tamen in convivio hilaresceret, lepide respondit: Et lupinum quum sit suā naturā amarum, tamen aquā maceratum dulcescere. Hinc ille omnium leporum & facetiarum pater Anacreon inquit:

Πίω μὲν ἔν τ' οἶνον

Τὸν τῷ καλῷ Λυαίᾳ


Σὺν τῷ δὲ πίνειν ἡμᾶς

Εὐδίσσιν αἰ μέμεναι.

Ergo merum bibamus,
Pulchrum merum Lyæi;
Bibendo namque vinum
Ærumna dormit omnis.

Indegeneres magnorum patrum filios.

E M B L E M A T A X X.



*Affice latrinas, nitido quas lumine Titan
 Lustrat, & in tenebris non latuisse smit:
 Talis is est; quisquis, nullâ laudabilis arte,
 Patriciâ cautum nobilitate tumet.*

C O M M E N T A R I U S.

VErissimè Marius apud Salustium inquit; Quanto vita
 majorum præclarior, tantò posterorum socordia flagi-
 tiosior est. Ut enim, turpitudine objectu lucis insignior,
 atque conspectior sit; sic illa Parentum merita, & splen-
 dor, degenerantium filiorum notas detegunt. Patet hoc in
 Scipionis Africani, Quinti Fabii Maximi Allobrogici, & Marci
 Tul-

Tullii Ciceronis; non Filiis sed teterrimis portentis, & (ut ille dicebat) benè natis asinis, quos heroum illorum Parentum facta, non illustrarunt; sed prodiderunt, & ridendos toti orbi propinarunt: ita ut satius fuisset illos latuisse; quàm in tam clarâ luce à parentibus suis collocatos esse. Quia (ut Juvenalis inquit)

*Omne animi vitium tantò conspectius in se
Crimen habet, quantò major qui peccat habetur.*

Cicero in Officiis; Si quis ab ineunte ætate habet causam celebratis, & nominis, aut à patre acceptam, aut aliquo casu à Fortuna; in hunc oculi omnium conjiciuntur, atque in eum, quid agat, quomodò vivat, inquiritur, & tanquam in clarissima luce versetur; ita nullum potest esse illius obscurum dictum, aut factum. Et sic in maximâ Fortunâ minimum licentiæ est. Scivit hoc Pin-darus quum aurea hæc dicta, ad Hieronem Siciliae Regem proferret;

*Attamen (melior enim miseratione invidia)
Ne omitte honesta; gubernata
Iusto clavo populum,
Veracemque ad incudem
Fabrica linguam,
Si enim vel leve eruperis;
Magnum feretur
Abste; multorum dispensator
Es: multi testes utriusque fidi.*

Claudianus ad Honorium;

*Hoc te præterea crebro sermone monebo
Vt te totius medio telluris in orbe.
Vivere cognoscas; cunctis tua gentibus esse
Facta palam, nec posse dari regalibus unquam
Secretum vitiis; nam lux altissima Fati
Occultum nihil esse finit, latebrasque per omnes
Intrat, & abstrusos explorat Fama recessus.*

Videant nunc Heroum Filii, in excelso ætatem agentes, quam honorifica necessitas illis incumbat, insistendi vestigiis majorum benè præcedentium. Videant quod oculis immo potius quàm toti mundo satisfaciendum sit; procul dubio quod vis animi non daret, conferet vis pudoris, & ad ignaviam profligandam, quod propria virtus non valeret, valebit spectator. Apud Plautum ille sic ait; quamvis alio sensu;

*Eo sum genere natus, magna me facinora decet efficere,
Qua post mihi clara, & diu clueant.*

Ita statuamus; incitamenta nobis esse debere, faces, & gesta nostrorum parentum; non desidia tibicines, & (ut ille dicebat) velamenta nequitiae. Ne sancti eorum manes, nostro vitio, probrosum illud dictum audire cogantur;

Fuere quondam strenui Milesij.

Bene monet Lysiteles apud Comicum :

*Itane tandem Majores famam tibi tradiderunt tui,
Vt, virtute eorum anteparta, per flagitium perderes?
Atque honori posterorum tuorum ut vindex fieres?
Tibi Paterque Avusque facilem fecit, & planam viam
Ad querendum honorem, tu fecisti ut difficilis foret,
Culpâ maximè & desidia, tuisque stultis moribus,
Praeptavisti amorem tuum ut virtuti praeponeres,
Nunc te hoc pacto credis posse obtegere errata:
Cape sis Virtutem animo, & corde expelle desidiam,
In foro operam amicis da, haud in lecto amica, ut solitus es;
Si istuc ut conare, facis indicium, tuum incendes genus,
Tum igitur tibi aequae erit Cupido. genus qui restinguas tuum,
Ne scintillam quidem relinques, genus qui congliscat tuum,
Is est honos homini pudico; meminisse officium suum.*

Reperatum urbi praefectum; Rex Athalaricus, quondam ita hortatus fuit; Redde laudes posteris tuis, quas tu à majoribus accepisti. At, prohi inversi mores, quotus quisque est, qui id cogitet? Partae quisque gloriae potius securè indormit, quam de amplificandâ labore. Hinc Nobiles multos videmus, & paucos, multi cinguli jus habent; pauci meritum. Satis beatos, satis illustres sese existimant, virtute patrum, non secus ac si fama eorum legari posset, & non quæri debeat. Hi sunt qui alios, omnia incrementa sua sibi debentes, praesecontemnunt: quos appositè hoc heroico dicto percutiemus: Meum genus à me incipit, tuum in te definit. Olim Anacharsis, exprobranti sibi Attico cuidam, quod Schyta esset; respondit: Mihi quidem probro est patria mea, sed tu patriæ tuæ. Bradeæ etiam, jactanti apud populum nobilitatem suam, in calceis eam tantum habere fuit exprobratum. Antigonus; quum quidam fortissimi patris ignavissimus filius, stipendia patris rogaret, Ego, inquit, adolescens pro-

propter cuiusque fortitudinem, non propter paternam, stipendia numero. Et certè quum in omni laude, vel existimatione, illa propriè excutienda sint, quæ cuiusque sunt; & quum magnos homines non Fortunâ, sed virtute metiri debeamus; quis tam perversi animi ut Catonem Vatinio præferre dubitet? Quis fortem illum Iphicratem, & magnum bellatorem, cui nobiles non erunt avi, nec fulgidum titulis genus, sed clara virtus; Harmonio non præferat? Iuvenalis ita sensit;

*Malo pater tibi sit Therfites, dummodo tu sis
Æacida similis, Vulcaniaque arma capeffas;
Quam te Therfita, similem producat Achilles.*

Stat. 8.

Idem in eadem Satyrâ;

*Hac satis ad Iuvenem, quem nobis fama superbum
Tradit, & elatum, plenumque Nerone propinquo:
—— Sed te censeri laude tuorum
Pontice noluerim; sic ut nihil ipse futura
Laudis agas; Miserum est aliena incumbere Fama.*

Plutarchus; Τῶς πατέρες ἀνθρώτοι; ἐν μὴ ευδαιμοναὺς ἴσθαι? quis patrem laudabit, nisi infœlices filii? Ut itaque finiam, & ad alia me conferam; hoc à Vellejo Paterculo, tanquam ex Apollinis tripode accipe; Optimus quisque nobilissimus, & in cuiuscunque animo virtus est, ei plurimum est tribuendum;

Virtute decet, non sanguine niti,

Claud.

Et non si magnus eris, bonus eris; sed magnus, si bonus. Nemo igitur desperet; Bona enim mens omnibus patet, omnes hâc sumus nobiles, &

*Nullus degener exstat,
Ni vitus pejora fovens,
Proprium deferat ortum.*

Zero.

Quia autem Silustii Marium, in principio hujus commentarii citare cœpi, non potui non totam ejus orationem, in quâ vera Nobilitatis origo deducitur, hîc addere. Tu Lector lege, & intellige.

Scio, ego, Quirites, plerosque non isdem artibus imperium à vobis petere, & postquam adepti sunt, gerere: primò industrios, supplices, modicos esse, dein per ignaviam & superbiam atatem agere, sed mihi contrà videtur: nam, quo pluri est Resp. quàm consulatus, aut pratura, eò majore curâ ad-

ministrari, quam hac peti debere. neque me fallit, quantum cum maximo beneficio vestro negotii sustineam. bellum parare, simul & arario parcere, cogere ad militiam eos, quos nolis offendere, domi forisque omnia curare. & ea agere inter invidios, occurrentes, factiosos; opinione, Quirites asperius est. Ad hoc, alii si deliquere, vetus nobilitas, majorum facta fortia, cognatorum & affinium opes, clienela multa, omnia hac praesidio ad sunt. mihi spes omnes in memet sita: quas necesse est, & innocentia, & virtute tutari: nam alia infirma sunt. Et illud intellego, Quirites, omnium ora in me conversa esse; & quos bonosque sавere: quippe benefacta mea Reip. procedunt: nobilitatem locum invadendi querere. quod mihi acrius adnendum est, uti neque vos capiamini, & illi frustra sint. ita ad hoc etatis a pueritia fui, ut omnes labores, pericula consueta habeam. quae ante vestra beneficia gratuito faciebam, ea uti, acceptam mercede, deferam, non est consilium, Quirites. Illis difficile est in potestatibus temperare, qui per ambitionem sese probos simulavere: mihi, qui omnem etatem in optimis artibus egi, bene facere jam ex consuetudine in naturam vertit. Bellum me gerere cum Iugurtha iussistis: quam rem nobilitas agerrime tulit, quaeso, reputate cum animis vestris, num id mutari melius sit si quem ex illo globo nobilitatis ad hoc aut aliud tale munus mittatis hominem veteris prosapia, ac multarum imaginum, & nullius stipendii. scilicet uti tantum in re ignarus omnium trepidet, festinet, sumat aliquem ex populo monitorem officii sui, ita plerumque evenit, uti quem vos imperare iussistis, is sibi imperatorem alium querat. At ego scio, Quirites, qui postquam consules facti sunt, acta majorum, & Gracorum militaria praecepta legere coeperint, homines praeposterii. nam gerere quam fieri, tempore posterius, re atque usu prius est. Comparete nunc, Quirites, cum illorum superbia me hominem novum. Quae illi audire & legere solent, eorum partem vidi, alia egomet gessi. quae illi literis, ea ego militando didici. nunc vox existimate, dicta an facta pluris sint. Contemnunt novitatem meam, ego illorum ignaviam. mihi fortuna, illis probra obiectantur. quanquam ego naturam unam, & communem omnibus existimo, sed fortissimum quemque generosissimum esse. ac si jam ex patribus Albini, ac Bestiae quari posset, mene, an illos ex se gigni maluerint: quid responsuros crediditis, nisi, sese liberos quam optimos voluisse? Quod si jure despiciunt me: faciant idem majoribus suis: quibus, uti mihi, ex virtute nobilitas coepit. invident honori meo: ergo invideant labori, innocentiae, periculis etiam meis, quoniam per hac illum cepi. verum homines corrupti superbia, ita etatem agunt, quasi honores vestros contemnant: ita hos petunt, quasi honeste vixerint. ne illi falsi sunt, qui diversissimas res pariter expectant, ignavia voluptatem, & praemia virtutis. Atque etiam,

cum


cum apud vos, aut in Senatu verba faciunt, majores suos extollunt eorum fortia facta memorando clariores sese putant: quod contrà est. nam, quanto vita illorum præclarius, tanto horum socordia flagitiosior. & profectò ita se res habet. Majorum gloria posteris lumen est, neque bona eorum neque mala in occulto patitur. Hujusce rei ego inopiam patior, Quirites; verum, id quod multò præclarius est, meamet facta mihi dicere licet. nunc videte quàm iniqui sint. quod ex alienà virtute sibi arrogant, id mihi ex meà non concedunt. scilicet quia imagines non habeo, & quia mihi nova nobilitas est. Quam certè peperisse melius est, quàm acceptam corrupisse. E- quidem ego non ignoro, si jam mihi respondere velint abundè illis facundà, & compositam orationem fore. sed in muxumo vestro beneficio cum omnibus locis me, vosque maledictis lacerent, non placuit reticere: ne quis modestiam in conscientiam duceret. nam me quidem, ex animi sententià, nulla oratio laderè potest. quippe vera, necesse est bene prædicet: falsam vita, moresque mei superant. sed quoniam vestra consilia accusantur, qui mihi summum honorem, & maxumum negotium imposuistis: etiam atque etiam reputate, num id pœnitendum sit. Non possum, fidei causa imagines, neque triumphos, aut consulatus majorum meorum ostentare: at, si res postulet, hastas, vexillum, phaleras, alia dona militaria, præterea cicatrices adverso corpore. hæc sunt meæ imagines, hæc nobilitas, non hereditate relicta, ut illa illis, sed quæ ego plurimis meis laboribus & periculis quæsi. Non sunt composita verba mea: parum id facio. ipsa se virtus satis ostendit: illis artificio opus est, ut turpia facta oratione tegant. neque litteras Græcas didici. parum placebat eas discere, quippe quæ ad virtutem doctoribus nihil profuerunt. at illa multò optuma reip. doctus sum hostes ferire, præsidia agitare, nihil metuere, nisi turpem famam; Hiemem & æstatem juxta pati, humi requiescere, eodem tempore inopiam & laborem tolerare. his ego præceptis milites hortabor: neque illos arctè colam, me opulenter, neque gloriam meam laborem illorum faciam, hoc est utile, hoc civile imperium. namque, cum tute per mollitiem agas, exercitum supplicio cogere, hoc est, dominum, non imperatorem esse. hæc, atque talia majores vestri faciundo, seque remque publicam celebravère. quis nobilitas freta, ipsa dissimilis moribus, nos illorum amulos contemnit, & omnes honores non ex merito. sed quasi debitos à vobis repetit. cæterùm homines superbissimi procul errant. Majores eorum omnia, quæ licebat, reliquère, divitias, imagines, memoriam sui præclaram: virtutem non reliquere, neque poterant: ea sola neque datur dono, neque accipitur. Sordidum me, & incultis moribus ajunt, quia parum scite convivium. exorno, neque histrionem ullum, neque pluris

pretii cocum, quàm villicum habeo, qua mihi lubet confiteri, Quirites. nam & ex parente meo, & ex aliis sanctis viris ita accepi, munditias mulieribus, viris laborem convenire omnibusque bonis oportere plus gloria, quàm divitiarum esse. Quin ergo, quod juvat, quod carum aestimant, id semper faciant: ament, potent: ubi adolescentiam habuere, ibi senectutem agant, in convivis, dediti ventri, & turpissima parti corporis: sudorem, pulverem, & alia talia relinquunt nobis, quibus ea epulis jucundiora sunt.

Quod

Quod citò fit, citò perit.

E M B L E M A XXI.



*Quo flamma fumo clarius sese exerit;
 Hoc est minus vivacior;
 Namque imminentis finis, est maturitas
 Præcursor, atque nuncius:
 Rarò perennat ingenî præcox vigor,
 Puerque qui spirat virum.*

COMMENTARIUS.

Quintilianus inquit; præcox illud ingeniorum genus rarissimè pervenire ad frugem: & vulgò asserunt; qui pueri adhuc, & usque à cunabulis sapiunt, scientiasque
 I ad suo-


ad suorum mensum calculos numerant; eos vel citò occidere, vel in illam stultitiam, quam infantes declinarunt; senes incurrere. Quod Actius approbare videtur, qui apud Aulum Gellium ait; sibi in juvenilibus ingeniis, itidem ut in pomis immaturis, placere acerbitatem; nam hæc demum maturescunt. Porro maturitas tempestivam adfert suavitatem, reliqua antè tempus putrescunt. Fœminæ quæ maturius pariunt, citius senescunt: Velut in Caliginis, Indiæ gente, quinquennēs pariunt, & octavum annum non excedunt. Floret prima Amygdalus, postrema parit. Salix cito semen profert, & perdit. Itidem nimis præcocia illa ingenia, quæ animalibus istis, quæ *ἡμερόβια* vocamus, penè sunt similia; tam properè occidunt, quàm nascuntur. Leonis catuli informes nascuntur, vix egrediuntur semestres, non moventur, nisi bimestres; ita etiam, quæ egregia futura sunt, serò proveniunt, & lentis auctibus absolvuntur. Scivit hoc Apulejus, quum diceret; odi puerulum præcoci sapientiâ, quem cum Sophocle *ἀνδρόπαιδα* vocare possumus. Cur autem præcocia illa ingenia raro diuturna sint, hæc (ni fallor) causa est; quia, quicquid ad summum pervenit, tendit ad exitum. Nec ultimum tempus expectant, quæ primo Vere maturuerunt; In rerum natura celer, nimisque præcox cucurbita se in altum cacumen brevi admodum temporis spatio effert, & quum de se quid magni promittere videtur, deficit. Sic ingenia quo illustriora sunt, eò breviora; Nam ubi incremento locus non est, vicinus adest occasus. Difficilis in perfectio mora est, naturaliterque, quod procedere non potest, recidit.

In Apol. 2.

Typus

Typus Regis.

EMBLEMA XXII.



*Ex cubias grus sola gerit, pars cætera dormit
Tuta, nec infidos sperat ab hoste dolos :
Grus notat hæc Regem vigilantem pro grege, qui si
Dormiat; incautum vastet ovile lupus.*

COMMENTARIUS.

Plinius Naturalis Historiæ Lib.x. Cap.xxiii. hæc sequentia de Gruibus commemorat : Inducias habet gens Pygmæa, abscessu Gruum cum iis dimicantium. Imminus est tractus quò veniunt, si quis reputet, à mari Eoo. Quando proficiscantur consentiunt; volant ad prospiciendum altè; Ducem, quem sequantur, eligunt; in extremo agmine, per vices qui

exclament dispositos habent, ut gregem voce contineant. Excubias habent nocturnis temporibus. Excubitor lapillum pede sustinet, qui laxatus somno, & decidens, indiligentiam coarguat. Cæteræ dormiunt capite infra alam condito, alternis pedibus insistentes. Dux erecto providet collo & prædicit. Hæc ille: Quibus typum nobis, & subditorum, & veri Regis, proponit. Ut enim Dux ille Gruum, aliis dormientibus, erecto collo providet: sic verum Regem, pro subditis vigilantem, & oculatum *πρόσω, & ὀπίσω*, id est, à fronte, & à tergo (secundum Homerum) esse oportet: & (ut Plautus in Aululariâ inquit) in occipitio quoque habere oculos debet. Plutarchus in Commentario de Iside & Osiride refert; in Hieroglyphicis Ægyptorum picturis, Regis simulachrum fuisse Oculum: quo scilicet vigilantia, cum rectâ, justâque rerum administratione, significabatur. Hinc Græci *ἀνάκτας* reges dixerunt, ut Plutarchus interpretatur, *ἀπὸ τῆς ἀνακῆς ἐχόν*, quod est curam gerere: Imperator Justinianus memor fuit; dum ait se noctes ducere insomnes, ut quietem posteris præparet. Et Silius Italicus inquit;

In præfat.
Novell. 8.
in princ.

Lib. 3.

*Turpe duci totam somno traducere noctem,
O Rector Lybia vigili stant bella magistro.*

Est enim Rex, quemadmodum Plato in Politicis asserit *ὡς θεὸς ἐξ ἀνθρώπων*, id est, Deus quispiam humanus, qui eligitur, non ut se molliter curet, sed ut per ipsum, ii qui elegerunt, benè beatèque agant. Malè ille se gerit, qui ex magnâ Fortunâ licentiam tantum usurpat; qui non curis intentus, sed stupris, & adulteriis principem agit, at verus bonusque, sciat, maximo imperio maximam curam inesse. Cumque sit *πομπὴ λαῶν*, scire debet; civium non servitutem sibi traditam, sed tutelam, nec Rempublicam suam esse, sed se Reipublicæ. Manet hoc Poëta:

Homerus.

Lucanus
lib. 9.

*Tu civem, Patremque geras, tu consule cunctis,
Non tibi; nec tua te moveant, sed publica damna.*

Claud.

Ille vitâ suâ & moribus aliis præeat; quia

Non sic inflectere sensus

Humanos Edicta valent, quàm vita regentis.

Exemplo Catonis, qui

*Ipse manu sua pila gerens, præcedit anhelis
Militis ora pedes, monstrat tolerare labores;
Non jubet, & nullâ vehitur cervice supinus.*

Carpen-

*Carpentoque sedens, somni parcissimus ipse est,
 Vltimus haustor aquæ, quum tandem fonte reperto;
 Indiga cogatur latices potare juvenus,
 Stat dum lixa bibat :*

Benè me hercules : Facta enim Regum, & principum, jussa sunt : Quintilianus Decl. 4.
 Tacita hæc lex est, hæc conditio Principum , ut quicquid faciant, præcipere videantur, & recte facere cives suos, faciendo doceant.
 Sit itaque continuis laboribus intentus; Nocte omnes, diesque perpeti sollicitudine pro salute omnium cogitet, quod breviter illius munus est, & in fine finis.

Sapiens, quò fœlicior; cò modestior.

EMBLEMA XXIII.



*Quò se quadrigis altius tollit suis,
Diale lumen Cynthii;
Hoc & vagantum de suis rotis jacet
Vmbrae minores corporum.
Benè præparatum pectus, & prudentiæ
Succis recoctum; quò magis
Fortuna vultu lubrico favet, catè
Hoc se gerit submissius.*

C O M M E N T A R I U S.

Hoc Emblemate proponitur verè Sapiientis animus; qui, quemadmodum Sol, dum in meditullio cœli consistit, exiguas jacet tenebras, ita etiam, quo altius eum Fortuna exivit, hoc magis se reprimat, sciens omnium extrinsecus advenientium bonorum lubricam, & incertam esse possessionem, sæpeque Dominum suum mutantem. Cautus gubernator in tranquillitate tempestatem, in tempestate tranquillitatem expectat; hunc etiam imitatur Sapiens, qui

Rebus angustis animosus, atque

Fortis apparet; sapienter idem

Contrahit vento nimium secundas

Turgida vela.

Contrà insolentes illi, &, dulci Fortunâ ebrii, cum Pindarico Olymp. odè 1. illo Tantalò μέγαν ὄλβον κατεπέψαι εἰ δύνανται, id est, magnam felicitàtem concoquere non possunt. Et ut quivis non facile multum vini fert; sic hi non abundantem Fortunam. Quicquid leve est in animo; secundâ se aurâ sustollit. Statuunt cum Plautino illo

Secundas Fortunas decere superbias.

In Sticho.

Talem animum sic perstrinxit Archidamus Agesilai filius, qui cum post conflictum apud Cheronæam habitum, litteras à Philippo Macedonum Rege acerbius scriptas accepisset Respondit; Si metieris umbram tuam, haudquaquam reperies illam factam majorem, quàm erat ante victoriam. Sapiens longe aliter, qui in hac rerum affluentia modesto, composito, & bene ordinato est animo, altè sibi hoc Terentii imprimens,

Ah Demæ, hoc tu facito, ut tecum animo cogites;

In Adèph.

Quam vos facillimè agitis, quum estis maximè

Potentes, dites, fortunati, nobiles,

Tum maximè vos aquo animo aqua noscere

Oportet, si vos vultis perhiberi probos.

Etenim habet has vices conditio mortalium, ut adversa ex secundis, secunda ex adversis nascantur. Si quis lætioris Fortunæ radius effulget, ecce minantis & novercantis simul umbra adest, & vestigia premit, aut excipit,

Ita Dis placitum, voluptati ut Mæror comes consequatur,

Quin in commodi plus, malique illic adest, boni si quid obigit.

Quidi

Boëtius lib.
2. Prof. 2.

Quid Tragœdiarum clamor aliud deflet, nisi indiscreto ictu Fortunam felicia regna evertentem? Hinc plerosque veterum Sapientum, memoriæ proditum est exoptasse, ut inter secundos prosperosque successus, nonnihil adversi sibi eveniret. Quod nequaquam ratione caruit: tum ne elato nimis animo pellacissimi monstri Fortunæ mole corruerent; tum quod ita judicarent ejus vitæ, cujus tractus nullam habuisset offensionem, miserrimum exitum aliquando esse reservatum. Cujus rei Homerum quoque testem habemus, qui eo in cæli limine, unde animas nostras ad decurrendum ætatis hujus spatium dimitti putavit, duas constituit urnas: alteram bonis omnibus refertam, alteram malis: Quæ pro beneplacito mixta, Jupiter distribuit, cuicunque Bonoque Maloque. Et Chilon dicere solebat, Deum, τὰ μὲν ὑψηλὰ ἔπειθεν, τὰ δὲ ἑπὶ δαΐμονι, id est, erecta dejicere, dejecta erigere. Hodie magnus es, cras alius, aut nullus. Jugurtham in carcere, Persecum in custodia obisse scimus. Quæ denique potentia est, cui non parata sit ruina, proculcatio, dominus, & carnifex? Nec magnis ista intervallis divisa, horæ momentum interest, inter solum & aliena genua. Locuples es? nunquid ditior Pompejo? cui cum Cajus vetus cognatus, novus hospes, aperuisset Cæsaris domum, ut suam clauderet, defuit panis & aqua, quum tot flumina possideret in suo orientia, in suo cadentia, mendicavit stillicidia; fame ac siti periit in palatio cognati, dum illi hæres publicum funus esurienti locat. Honoribus summis functus es? nunquid aut tam magnis aut tam insperatis quam Sejanus? Quo die illum Senatus deduxerat, populus in frustra divisit: in quem quicquid congeri poterat Dii hominesque contulerant, ex eo nihil superfuit, quod Carnifex traheret. Rex es? non ad Cræsum te mittam, qui rogam suum & accendi & extingui vidit; factus non regno tantum, sed etiam morti suæ superstes Ptolomæum Africæ regem, Armeniæ Mithridatem, inter Caianas custodias vidimus, alter in exilium missus est, alter ut meliori fide mitteretur optabat. In tantâ rerum sursum ac deorsum euntium versatione, si non quicquid fieri potest, pro futuro habes, das in te vires rebus adversis, quas infregit quisquis prior vidit. Idcirco

Seneca de
Tranq. Ani.
m.

Claud. lib. 2.
in Ruff.

*Desinat elatis quisquam confidere rebus,
Instabilesque Deos ac lubrica Numina discat.*

illa

Ille manus, quâ sceptrâ sibi gestanda parabat,
Cujus se toties submitit ad oscula supplex
Nobilitas, inhumata diu miseroque revulsa
Corpore, feralem questum post fata poposcit.
Aspiciat, ne quis nimium sublata secundis
Colla gerat, triviis calcandus spargitur ecce,
Qui sibi Pyramidas, qui non cedentia templis
Ornatura suos exstruxit culmina manes.
Et qui Sydonio velari credidit ostro.
Nudas pascit aves : jacet en, qui possidet orbem,
Exigua telluris inops, & pulvere raro
Per partes tegitur, nusquam, totiesque sepultus.

K

Ars

Ars Naturam juvat.

E M B L E M A XXIV.



*Sponte sua unigenum fert tantum Arbuscula fructum ;
 Ast eadem varios insitione parit :
 Naturam quicumque rudem non excolit, ille
 Semper idem est, cultu sit sibi dissimilis.*

C O M M E N T A R I U S .

CUm tota ratio felicitatis humanæ, his tribus potissimum rebus constet; Naturâ Ratione, & Exercitatione: & Natura sit docilitas ac propensio nobis insita, ad res honestas; Ratio, doctrina quæ monitis constat, & præceptis; Exercitatio, usus ejus habitus, quem Natura, sive Deus nobis in sevit; vehementer medius fidius mihi errare videntur; qui

qui satis esse putant nasci, cœcamque naturam in tenebris suis marcere, & torpere sinunt. Ut enim fructus aut unius tantum generis, ut aut plurimum insipidos gignit arbor, citra curam institutionis; ut agri non solum nullas fruges, sed tribulos, carduos & lolium producant, si non excolantur, exculti verò innumera & varii generis frumenta pariunt; sic homo, nisi Naturam, nobile illud Dei depositum, doctrinâ excolat, tanquam rudis massa, & cui nulla forma est inducta, in hoc mundi theatro versatur: secus in se uno omnia habet, nulla que est disciplina quam non apprehendat, si præceptionibus & exercitatione instituerit. Omnibus enim Deus (ut Seneca inquit) fundamenta dedit, semenque virtutum, quod doctrinâ suscitatur, non secus ac scintilla, levi flatu adjuta, ignem suum explicat. Testatur id Boëtius,

Intus est hominum vigor

Arce conditus abditâ.

Et alio loco idem,

Hæret profectò semen introrsum Veri

Quod excitatur ventilante doctrinâ,

Nam cur rogati sponte recta censesis

Ni mersus alto viveret fomes corde?

Et si Platonis Musa personat verum,

Quod quisquè discit, immemor recordatur.

Libet hîc addere elegantissimos magni illius Scaligeri versus:

Istos animi igniculos, seminaria ista,

Queis sevit agros ingenî, beata rerum

Natura parens, studiis augescere par est,

Aut splendor abit perditus arugine tetrâ.

Indigni certè tantis Dei muneribus qui hæc negligunt & putrescere sinunt, quum alioqui, si bonus cultor ea excepisset, similia origini suæ divinæ prodiissent, & paria his, ex quibus orta sunt, excrevissent: nunc, quia colonum negligentem sortita sunt, necantur, & purgamenta pro frugibus pariunt. Apulejus asserit hominem nec perfectè bonum, nec malum nasci, sed utriusque semina ei à naturâ indita, quæ institutione in hanc, vel illam partem emicant. Vide quantum valeat ille cultus, cui (quod Demosthenes de Pronuntiatione dicebat) prima, secunda, & tertia debentur. Quamvis autem Natura quosdam à se

impetus sumat; excolendo tamen perficienda est. Dicit hoc Romanæ fidicen Lyræ;


Doctrina sed vim promovet insitam,

Relique cultus pectora roborant.

Animadvertit & hoc Vegetius in militari suâ doctrinâ, dum ait; Paucos viros fortes natura procreat, bona institutione plures reddet industria. Hæc est, quæ Elephantem faciat funambulum, morionem Asinum. Et ad quid non fingat hominem, animal omnis Disciplinæ capax? vincamus itaque, aut saltem adjuvemus Naturam diligentiam, excludamus torporis somnium.

Rationis cum Affectibus bellum.

E M B L E M A XXV.



*Vt dira Sēpens semper in solo repens,
Ciconiæ perenne concitat bellum ;
Sic vilis illa turba Mentis , Affectus,
Rationis altæ regium impetunt callem.*

C O M M E N T A R I U S .

EX hieroglyphicis sculpturis petitum Emblemata. Ægyptii enim, quum internum illud affectuum cum ratione bellum designarent; Serpentem cum Ciconia belligerantem depingebant. Scribit autem Plinius Naturalis Historiæ Lib. X. Cap. XXIII. Ciconias esse Serpentum exitium, eaque de causâ tantum eis honoris haberi solitum, ut in Thessaliâ capitale

Eraf. in
Milit. Chrift.

Lipf. in Conf.

Perſius Satyr.
5.

Lib. de Spirit.
& Anim.

tales fuerit occidiſſe Ciconiam. Notamus verò & nos, cum Ægyptiis, per hoc Emblemata, affectuum cum Ratione prælium; quo nec periculofius aliud, quia occultum & domesticum; nec ſavius, quia cum plus quàm Cadmeis hoſtibus; nec unde major gloria, quia nobiſcum eſt. Etenim voluptatem viciſſe, voluptas maxima eſt, nec ulla major eſt victoria, quàm ea, quæ de cupiditatibus noſtris refertur. Qui hoſtem vicerit, illo fortior fuit; qui libidinem repreſſit, ſe ipſo fortior fuit. Porro nemini ignotum eſt, Hominem eſſe prodigioſum quoddam animal, conſtans duabus partibus, Animâ ſcilicet, & corpore, illâ velut numine quodam, hoc tanquam vili pecude. Siquidem corpore uſque adeò reliquo brutorum generi non præſtamus ut omnibus dotibus non inveniamur inferiores; Animâ verò, adeo divinitatis ſumus capaces, ut ipſas etiam Anglicas mentes liceat prætervolare. Iunctæ hæc inter ſe ſunt partes, ſed concordia quâdam diſcordiæ nec facile inter eas convenit, utique de imperio agitur, aut ſervitute; regere enim utraq; vult, & magis illa, quæ non debet. Terra attollere ſe ſupra ignem ſuum conatur, & cœnum hoc, ſupra cœlum. Anima generis ætherei memor, contra ſtat; *Et ſecretam gannit in aurem.* Hinc perplexa inter ſe tumultuantium ſeditio. Neque verò hanc diſcordiam, fabuloſus ille Poetarum Prometheus, nobis inferuit, adjunctâ menti noſtræ, de quoque auimante particulâ; ut ſenſit Horatius quum inquit,

*Fertur Prometheus addere principi
Limo coactus particulam undique
Diſſectam & inſani Leonis*

Vim ſtomacho appoſuiſſe noſtro;

Neque primitiva conditio hæc indidit; ſed peccatum, quod benè conditum erat, malè depravavit. Antea Mens corpori ſine negotio imperabat, illud verò promptiſſimè parebat; nunc inverſo ordine, quod parere debet, regere inſtituit, mirasque tragædias ac pugnas ciet. Quarum domitorem ſummus ille Imperator, dedit Rationem cui origo à Cœlo eſt; ut meritò ita magnificè eam Seneca celebrarit; Partem in homine divini ſpiritus merſam; Et Auguſtinus, Aſpectum mentis, qui bonum, malumq; diſcernit, virtutes eligit, Deum diligit. Hæc tanquam Regina ſupremam capitis arcem tenet, nihil ſordidum, nihil humile volvens;

Hanc

Hanc summâ capitis fundavit in arce

Mandatricem operum, prospectricemque laborum.

Claud.

Habetque, ita constitutus ille Dictator, sub se Rempublicam, constantem ex variis subditorum generibus. Quos Affectus licebit intelligas. Hi sunt Irascentia, quam procul à Ratione, ad domicilium cordis deduxerunt Filii Deorum, obsequique eam, & respondere in loco sapientiæ jusserunt; præterea Cupido, atque Appetitus, quos infernas abdominis sedes tenere, ut popinas quasdam, & latrinarum latebras diversoria nequitiae atque luxuriae, præceperunt; ideoque longius hos à sapientiâ relegatos voluerunt, ne importuna vicinitas Rationem constitutam cunctorum saluti; in ipsâ cogitationum utilitate turbaret. Quod si fiat (ut sæpissime per cuniculos tentant) illicet actum est, perimus. Quicumque enim rationem abjecerit, & hæc præsentia secutus, in humum se ipse prostraverit, ut desertor Domini, Imperatoris, & Patris sui punitur. Resistamus itaque huic hosti Ratione, quæ nos inseparabilis comes ad Deum sola perducet; &

Apul. lib. de
Dogmat. Plat.

Laëtant.

Dum spiritus hos reget artus

Virgil.

infatigabili militiâ Deo militemus. stationes vigiliasque celebremus. Congrediamur cum hoste quem novimus fortiter ut victores, ac devicto adversario triumphantes, præmium Virtutis, quod ipse promisit, à Deo consequamur.

In

In miserrimam Tyrannorum vitam.

E M B L E M A X X V I.



*Miser Tyrannus, cujus ensis imminet
 Dependulus cervicibus;
 Mediis in undis aret & plumæ leves
 Non elaborant somnulum.
 Mentis tumultus submovere turbidos,
 Non gaza, nec licetor valet.*

C O M M E N T A R I U S.

Tul. Tuf.
 cul. lib. 5.

Dionyfius Tyrannus, olim aliquo admirante fœlicitatem
 regiam, & copias, opes, majestatem illius dominatus
 prædicante: aureum lectum sterni curavit, & in eo
 ho-

hominem poni; abacosque complures ornavit argento, auroque cœlato, tum ad mensam eximiâ formâ pueros delectos jussit consistere, aderant unguenta, coronæ, incendebantur odores, mensæ conquiritissimis epulis instruebantur: Fortunatus sibi Damocles videbatur. In hoc medio apparatu fulgentem gladium è lacunari, setâ equinâ appensum, dimitti jussit, ut impenderet illius beati cervicibus. Ille nec pulchros illos administratores adspiciebat, nec plenum artis argentum, nec manum porrigebat in mensam: jam ipsæ desuebant coronæ, denique exoravit Tyrannum, ut abire liceret, quod jam beatus nolle esse. De quo sic Persius,

Et magis auratis pendens laquearibus ensis

Satyr.

Purpureas subter cervices terruit:

Et Horat.

Districtus ensis cui super impiâ

Cervice pendet, non Sicula dapes

Dulcem elaborabunt soporem,

Non avium citharaque cantus

Somnum reducent, somnus agrestium

Lenis virorum.

Hoc pacto docuit Tyrannus quàm misera, quamque omnibus periculis exposita sit Tyrannorum vita; quorum si mentes (ut Tacitus inquit) recludantur, possent aspici laniatus & ictus; si quidem ad omnes suspensiones pavidi sunt, ut qui

Claud.

Muniti gladiis vivunt septique venenis.

Hanc ob rem suis similes esse Tyrannos Ælianus scribit, quas si quis tetigerit, protinus clamare incipiunt, mortem scilicet somniantes, cum nec vellera habeant, nec lac, nec aliud quicquam præter carnes: Sic Tyranni omnia metuunt, scientes, quod sicuti sues, ita & ipsi omnibus vitam debeant. Dicebat ille, neminem tantæ futurum dementiæ, qui diadema humi projectum tolleret, si sciret quantum curarum agmen secum traheret. Asserit hoc Seneca Trag.

O Regnorum magnis fallax

Fortuna bonis in præcipiti

Dubioque nimis excelsa loco,

Nunquam placidam Sceptra quietem

Certumve sui tenuere diem,

L

Alia

*Alia ex aliis cura fatigat,
Vexatque animos nova tempestas,
Non sic Lybicus Syrtibus aquor
Fuerit alternos volvere fluctus;
Vt precipites Regum casus
Fortuna rotat. Metui cupiunt
Metuique timent. Non nox illis
Alma recessus præbet tutos,
Non curarum somnus domitor
Pectora solvit.*

Et idem in Oedipo,

*Quisquamne regno gaudet? O fallax bonum,
Quantum malorum fronte quàm blandâ tegis?
Vt alta ventos semper excipiunt juga:
Imperia sic excelsa Fortuna subjacent.*

Perf.

Ad dicat aliquis; Pulchrum est monstrari, & dicier *Hic est*, stipari servis, vehi aureâ leâticâ, gentibus denique omnibus Fortunam dare: O miser, nescis quantum illa bona, per omnes terras fulgentia, sudoris habenti exprimant, quantum occultarum sollicitudinum tegant. Bonus Rex (ut dicebat ille) servus publicus est. Cumque omnium occupatio sit misera, Regum tamen est miserrima, utpote qui non modò suis occupationibus laborant, sed ad alienam quoque servitutem excubant. Stipantur à servis, hominibus ut plurimum infidis, qui, quia eos timent, etiam oderunt:

Seneca.

Seneca.

*Tu quicumque es qui sceptrâ tenes,
Licet omne tuâ vulgus in aulâ
Centum pariter limina pulset,
Cum tot populis stipatus eas,
In tot populis vix una fides.*

In Trinummo.

Boët. lib. 2.
de Conf. Ph.

Meritoria salutatio eis adfertur à clientibus, purpuræ cultoribus, et ulciscuntur comitantibus, siccum Regem destituentibus. Accedunt eos fallaces parasiti, qui (ut Plautus ait) illos intrâ dentes conclusos gerunt. Timentur à subditis, sed hos interea etiam timent. Ita enim natura constituit; ut quicquid alieno metu magnum est, à suo non vacet. Quæ autem est hæc potestas, quæ sollicitudinum morsus, formidinumque aculeos vitare nequit? Vellet Rex securus vivere, sed nequit. An verò potentem censet,

cenſes, quem vides velle, quod non poteſt efficere? qui ſatellite
latus cingit? qui, quos terret, plus ipſe temet? qui ut potens eſſe
videatur, in ſervientium manu ſitus eſt? Hæc Regnantium pluri-
mi adverſerunt, inter quos Alexander, qui eximius Monarcha
ad Diogenem, doliarem vitam agentem, ita dixiſſe fertur: Niſi
Alexander eſſem, Diogenes eſſe vellem:

Juvenalis
Satyr. 14.

Senſit Alexander teſtâ cum vidit in illa

Magnum habitatorem, quantò ſælicior hic qui

Nil cuperet, quam qui totum ſibi poſceret orbem.

Vidit & hoc Tiberius, cum diceret, experiendo ſe didiciſſe, quàm
arduum, quamque Fortunæ ſubjectum eſſet regendi onus. Di-
vus Auguſtus, cui Dii plura quàm ulli præſtiterunt, non deſiit
quietem ſibi precari, vacationem à Repub. petere. Omnis ejus
ſermo ad hoc ſemper revolutus eſt, ut ſibi ſperaret otium. Quod
illi, tam eximia res, viſum fuit, ut, quia uſu non poterat, cogitatio-
ne præſumeret.

Seneca de
brevit. vit.
cap. 5.

O vita tuta facultas

*Pauperis, anguſtique laris! O munera nondum
Intellecta Deûm.*

Lucan. lib. 5.

Semper pueri.

EMBLEMA XXVII.



*Rixantur pueri, si quis lapidesve nuceſve
 Auferat, & ſemper vilia quæque ſtupent;
 Nos etiam pueri, qui, donec vita ſuperſtes,
 Propter opes luteas digladiamur humi.*

COMMENTARIUS.

V Eriſimè Seneca inquit, Non bis pueri ſumus, ut vulgò dicitur, ſed ſemper, verùm hoc intereſt quod majora nos ludimus. Majora? immò minus ferenda. Quis enim poſt juventam, graveſque annos, tantam animi cœcitatem, & dementiam, quantam circumferimus, in nobis toleret? Quis non naturæ monſtra, pueròs cum rugis & canis, nos appellet?
 Pueris

Pueris crepundiorum, talorum, nucum, & æris minuti avarita est, pro his levibus inter sese quàm gravissimas iras gerunt. Quapropter? quia enim qui eos gubernat animus infirmum gerunt: Itidem nos pro auro argentoque maximum sæpe bellum suscipimus. Hæc vires nostras atque opes vocamus, hæc sunt quæ nos senescere cogunt, opinione nostrâ cara, pretio suo vilia. Subito enim, si bene expendimus, effluunt, repenti dilabuntur, nullo in loco, nullâ in personâ stabilibus nixa radicibus consistunt. Hæc sunt quæ in aliena littora impingunt, quæ nos mittunt ad longinqua loca, & errantia, cum possimus fœlicitatem domi promere. Ergo par pueris, longiusque progressis, sed in aliis, majoribusque error est. Sic rerum versâ conditio est, ut nos divinum, merito Rationis, animal, non aliter nobis splendere, nisi inanimatâ supellectilis possessione videamur. Aurum argentumque, & propter ista nunquam pacem agens ferrum, quæ naturæ conditor Deus, tanquam malè nobis committeret, abscondidit, nos in lucem proferimus, certissima auctoramenta nostrarum servitutum, nec erubescimus summa apud nos habere, quæ ima terrarum fuerant. Ah quàm non intelligimus quantam Conditori nostro faciamus injuriam? Ille genus humanum terrenis omnibus præstare voluit, nos dignitatem nostram infrâ quæque infima detrudimus. Quique cœli amore fœdè professi sumus, tanto tamque peregrino fasce gravamur, ut dum in altum niti volumus, incurvemur, & pro cœlo terra nobis sit. I nunc, & præclaram opum mortaliū beatitudinem dicas, quam cum adeptus fueris, immortaliū fœlicitatem amittis. Quin potius intende oculos mentis, ut appareat quæ bona, quæ mala sint. Sepone reginam mundi stultitiam, cui familiare est, ut quarum rerum minor est fructus, earum & cupiditas, & delectatio sit major. Ut verè dixerit Socrates; Ridere semper Deos, cum vana hæc cupiditatum inspicunt.


Boëtius.

Seneca.

Boëtius.

Mora nocet.

E M B L E M A XXVIII.



*Natura Echinitalis est, ut indies
 Differre tentet horridum partus diem,
 Tandemque spinis prolis excrescentibus
 Magno gravique cum dolore parturit :
 Ignava mens mortalium & cœli sui
 Oblita; differt indies vitam suam,
 Sibi que semper blandiens, malis mala
 Coacervat, & sic pressa diffidit sibi,
 Aut cum labore maximo sese explicat.*

COMMENTARIUS.

A Junt Echinum terrestrem simulatâ alvo remorari par- Auctor Sui-
das.
tum, deinde jam asperiore ac duriore facto fœtu morâ
temporis, majora cum cruciatu parere. Huic animali non
abfimilis est humani ingenii perversitas, & voluntarius
furor, qui quamvis sit brevis vitæ, & ipsa brevitæ semper incerta,
indies tamen pœnitentiam (quam divus Augustinus definit, quan-
dam dolentis vindictam, punientem in se quod dolet commisisse)
differt, semperque peccata peccatis accumulât, adjungens etiam
iis, quod plus quam conclamata nequitia est, patrociniâ defension-
is. Interea autem fit, ut hominem in iis senescentem, quando
jam peccare amplius non potest, peccata ipsum dimittant, non ipse
ipsa, & sic mors imparatum opprimat, aut innumero malorum nu-
mero gravatus, desperet, aut ægerrimè cum Echino sese exoneret
& explicet.

*Facilis (enim) descensus Averni,
Sed revocare gradum, superasque evadere ad auras
Hoc opus, hic labor est.*

Virgil.

Benè Augustinus infert, Ex voluntate perversâ est libido, & dum
servimus libidini, fit consuetudo, consuetudo autem cui non resi-
stitur fit necessitas, quibus quasi ansulis sibimet connexis instar
catenæ, tenet nos dura servitus. Quam tamen, ut idem monet,
excutere debemus. Quia pejus est nunquam, quam ad vespèram
expergisci. & quicquid male differtur, pejus omittitur. Ultimum
autem malorum omnium est desperatio, ad quam nemo nisi ante
tempus accessit. Nullum est tam magnum peccatum, quin major
sit misericordia Dei:

Seneca, *Quem pœnitet peccasse, pœnè est innocens,
Nam serâ nunquam est ad bonos mores via.*

Ovid. *Numen confessis aliquod patet.*

Lib. 10. Me-
tamorph.

Principiis autem obstare Sapientis est.

Ovid. *Vtile propositum est savas extinguere flammæ,
Nec servum vitiis pectus habere suum:
Principiis obsta, serò medicina paratur,
Cum mala per longas invaluere moras.
Sed propera, nec te venturas differ in horas,
Qui non est hodie, cras minus aptus erit.*

De Rem.
Am.

Potest.

Alio tortum
Emblema.

Potest & hoc Emblema ad omnes humanas actiones torqueri, in quibus, præterquam in ira (secundum Senecam) nimia mora damnoſa eſt, contrà maturitas utiliſſima. Alexander interrogatus, quo pacto tam brevi ſpatio orbem ſubegiffet, rectè reſpondit

ὅυδ' ἐν ἀναβαλλόμενῳ, id eſt,

Plutarch. in
Cæſ.

Nihil cunctando, aut differendo. Audendo, atque agendo Romani res ſuas auxerunt. Cæſarem diſjunctiſſimas terras citius victoriis ſuis illuſtraſſe legimus, quàm cujuſquam paſſibus peragrari potuiſſent. Unde illud de ſe ſummo jure proſitetur; Veni, vidi, vici. Hic, cum Pompejus inſtructam aciem apud Pharfaliam inibi conſiſtere, & hoſtem operiri juſſiſſet; dixit, illum erraſſe, qui vim, impetum, ac divinum afflatum animorum, ad incurſionem paratorum, morâ relaxaſſet. Scivit ſcilicet illud Lucani,

Tolle moras, nocuit ſemper diſſerre paratis :

lib 4.
Aſtron.

Et Manilii,

Mora ſepè malorum


Dat cauſas.

Et capitur Sagunthus dum Romanus ſedendo tempus terit.

Vivi-

Vivitur ingenio.

E M B L E M A X X I X



*Regna cadunt, urbes pereunt, nec quæ fuit olim
 Roma manet, præter nomen inane, nihil.
 Sola tamen rerum, doctis quæsita libellis,
 Effugiunt structos Fama decusque rogos.*

C O M M E N T A R I U S.

O Vidijs quodam loco inquit,
 Tabida consumit ferrum lapidesque Vetustas,
 Nullaque res majus tempore robur habet,
 Scripta ferunt annos, scriptis Agamemnonna nosti,
 Et quisquis contra vel simul arma tulit.

*Fit vivax scriptis virtus expersque sepulchri
Notitiam sera posteritatis habet.*

Quibus versibus indicatur, cum omnium humanorum operum confectrix sit Vetustas, cum Oppida, Respublicas, Regna evertat; ferrum denique, lapides, atque adeò ipsum adamantam, quem durissimum perhibent, & in quo Fatalia Parcarum decreta, propter summum rigorem ejus, incisa esse perhibent Poëtæ, consumat; solam tamen Eruditionem, omnium annorum ac Libitinæ Domitricem, esse immortalem. Quod quàm verum sit, re auctore patebit. Nonne sepem illa Miracula, & si qua his mirabiliora sequentium annorum extruxit ambitio, sola æquata sunt, nonne tam mortalia fuerunt, quàm ii qui ea fecerunt? Negari certè non potest; quin etiam memoria eorum penitus ex animis delera fuisset, si per scripta, humanarum actionum, & omnium sæculorum conservatricia, licuisset. Illa ipsa Terrarum Dea, gentiumque Roma, & falsò Æterna Urbs, ubi est? obruta, diruta, incensa; & ambitiosè hodie quæritur nec invenitur in suo solo, solum autem nomen & majestatem suam in solis scriptis tueretur. His veteris Ægypti Thebas, his centum Crææ urbes cognoscimus. Quis, ut Theocritus inquit, unquam optimates Lyciorum, quis Priami filios, aut Cyncum novisset, nisi superiora bella cecinissent Poëtæ. Neque verò Ulysses post errores decem annorum, per omnium ferè hominum urbes vagatus, etiam ad inferos profectus vivus, tot denique periculis perfunctus, atque ex antro Cyclopiis salvus reversus, diuturnam laudem consecutus esset: Tum subulcus Eumæus silentio præteritus.

*Paulum (enim) sepulta distat inertia
Celata virtus.*

Litteræ Themistoclem, qui de Brevitate vitæ conquerebatur, litteræ Alexandrum immortalitate donarunt, aliquando alioqui perituros, nisi illæ famæ & æternitatis artes obstitissent. Nam ut Pindarus inquit, sermo factis diutius vivit, quem cum Gratiis volentibus lingua extulerit è profunda mente. Quamobrem Eudamidas rogatus à quodam, quam ob causam Lacedæmonii, priusquam irent in prælium, Musis immolarent, cum Musis nihil videretur cum Marte esse commercii; ut rebus, inquit, fortiter gestis contingat honesta commemoratio.

Enim-

Seneca.

Lipf. in
Const.

Horat.

Horat.

Enimverò, *Non incisa notis marmora publicis*
Per qua spiritus & vita redivit bonis
Post mortem Ducibus: non celeres fuga
Rejēctaque retrorsum Hannibalis mīna
Non incendia Carthagini impie,
Ejus qui domita nomen ab Africā
Lucratus rediit, clarius indicant
Laudes, quam Calābra Pierides; neque
Si charta fileant, quod bene feceris
Mercedem iuleris. Quid foret Ilia
Mavortisque Puer, si taciturnitas
Obstaret meritis invida Romuli.
Ereptum stygiis fluctibus Æacum
Virtus, & favor, & lingua potentium
Vatum divitisbus consecrat insulis.
Dignum laude virum Musa vetat mori,
Cælo Musa beat.

Quod & Pindarus, gregiè, Nem. Carm. septimo, innuit, hoc modo; Magnæ corporis vires, magnæque animi virtutes, ab hymnis & laudationibus derelictæ, densis tenebris circumfunduntur. Unicum est autem rerum fortiter gestarum speculum, quo videlicet illæ posteritati prodantur, atque immortalitati commendentur & consecrentur, carmen à docto aliquo Poëta conscriptum, quod illarum rerum laudes, tanquam laborum præmia, complectatur. Idcirco elate & magnificè, sed tamen verè, hic idem Poëta, Statuarium se esse negat, qui mutas tantum statuas edoler, unâ defixas in b si, sed quos ipse cantibus suis celebret, eorum famam terrâ marique spargi, ac disseminari.

Tibull.

Quem referent Musa, vivet, dum robora tellus,
Dum calum stellas, dum vehet amnis aquas.


Videat Lector etiam se merito jactitantem Ovidium in fine Metamorphoseos, & Horatium in Odis,

Exegi monumentum ære perennius
Regaliq; situ Pyramidum altius
Quod non imber edax, aut Aquilo impotens
Possit d'ruiere, aut innumerabilis
Annorum series, & fuga temporum.
Non omnis moriar, multaque pars mei

*Vitabit Libitinam. usque ego posterâ
Crescam laude recens dum Capitolium
Scandet cum tacitâ Virgine Pontifex.
Dicar quod violens obstrepat Ausidus,
Et quâ pauper aqua Daunus agrestium
Regnator populorum, ex humili potens
Princeps Æolium carmen ad Italos
Deduxisse modos, sume superbiam
Quasitam meritis, & mihi Delphicâ
Lauro cinge volens Melpomene comam.*

Iactura utilis.

EMBLEMA XXX.



*Cum Tigrium catulos Venator repperit, unum
 Projicit, ut matrem detinuisse queat ;
 Dum rapit hunc mater, nidumque revisit anghela ,
 Interea pedibus consulit ille sibi :
 Damna hominem quandoque juvant, dum copia rerum
 Causa est latroni cur struat insidias.*

COMMENTARIUS.

Plinius Naturalis Historiæ Lib. VIII. Cap. XVIII. refert ,
 eos qui Tigrium catulos venantur, totum fœtum, qui sem-
 per numerosus est, rapere, deinde maximè perniciose quo-
 M 3 abire.

abire. At ubi vacuum cubile repperit fœta (matibus enim cura sobolis non est) fertur præceps, odore vestigans. Raptor appropinquante fremitu abjicit unum è catulis. Tollit illa mortu, & turbine ocyoracta, remeat, iterumque insequitur, tandem ubi nulla spes recuperandæ prolis affulget, irrita feritate sævit in littore. Et sic raptor, qui alioqui cum omnibus catulis periisset, unico objecto, salvus evadit. Quo facto monemur, urgente necessitate, non magni esse ducendum nummorum jacturam, dummodo vitæ hoc pacto consuli possit. Quia pecuniam in loco negligere, maximum interdum est lucrum. Fecit hoc Aristippus, qui quum in eadem navi, sese cum pyratibus versari, cognovisset, omnes suos nummos in mare projecit. præviderat enim propter ipsos se à pyratibus in mare projiciendum. Idem legimus apud Iuvenalem fecisse Catullum quendam, qui ingruente tempestate, omnium ferè bonorum faciebat jacturam. Versus sic sonant,

Satyra 12.

*Accidit & nostro similis Fortuna Catullo,
Cum plenus fluctu medius foret alveus, & jam
Arboris incerta nullam prudentia cani
Rectorum conferret opem, decidere jactu
Cæpit cum ventis; imitatus Castora qui se
Eunuchum ipse facit cupiens evadere damno
Testiculorum, aded medicatum intelligit inguen.*

Labor

Labor Amoris domitor.

E M B L E M A XXXI.



*Omnia parve Puer, Veneris justissima proles,
 Telorum duro cum premis imperio,
 Sola Diana tamen vestri vim despicit arcus,
 Dum sequitur fortes fortior illa feras:
 Otia si tollas, periit vesana Libido,
 Quam labor assiduus, duraque vita domat.*

C O M M E N T A R I U S.

A Poëtis memoriæ proditum est, Cupidinem, quum omnes Deos Deasque sub jugum suum mittat, & blandissimam illam vim, quæ nobis paulatim per pectora concu-

concurritur, sentire faciat, in solam tamen Dianam assidius venationibus intentam, nihil posse: Quo figmento homines acutissimi nihil aliud indicare voluerunt quàm perpetuis laboribus, vitæque asperitate, amorem & libidinem domari; otio autem, molliæ atque luxu eas animi passiones nutriri. Quare poëta Lucanus Lib. i. inquit,

Variam dant otia mentem.

Exemplum quærendi Sardanapalus Rex, quàm maximum dabit, qui dum sese otio devovit, usque adeò à blandà illâ pellice, Libidine victus est, ut inter imbellissimas fœminas neret. Et,

Quæritur Agisthus quare sit factus adulter?

In promptu causa est, desidiosus erat.

Otium (denique) Reges prius, & beatas

Perdidit urbes.

Hoc animadvertens Lycurgus, leges tulit, quibus juventutem ab otio ad labores, ad venandum, currendum, natandum, esuriendum, sitiendum, algendum, & æstuandum instigare; Quia

Cum semel hæc animum cepit mulcere voluptas,

Debilibus pennis irritus exit amor,

Vel tu venandi studium pete, sæpe recessit

Turpiter à Phœbi victa Sorore Venus.

Seneca in Octavia;

Vis magna mentis blandus atque animi calor

Amor est, juvenat gignitur, luxu, otio

Nutritur, inter lata Fortuna bona,

Quem si fovere, atque alere desistas, cadit,

Brevique vires perdit exinctus suas.

Post victoriam Cannensem si Hannibal rectâ petiisset Romam, poterat in Capitolio prandere, sed frui, quàm uti victoriâ maluit, Campaniam ac Tarentum pergarans, ubi mox & ipse, & exercitus ardor adeò elanguit, ut verissimè dictum sit, Capuam Hannibali fuisse Cannas. Siquidem invictum Alpibus, indomitum armis virum, Campania sole, & Baiæ fontibus calidis tepentes subegerunt. Appium Claudium etiam sæpe solitum dicere accepimus, negotium populo Romano melius, quàm otium committi, non quod ignoraret quam jucundus tranquillitatis status esset, sed quod animadverteret, præpotentia imperia, agita-

Ovid.

Catull.

Florus.

tatione rerum, ad virtutem capeffendam excitati, nimia quiete in defidiam refolvi. Et fanè negotium nomine horridum, imperii illius mores in fuo ftatu continuit, blandæ appellationis quies plurimis vitiis reſperſit. Quid furores ſæpius intra mœnia, provincias, & regna peperit, quàm nimia fœlicitas, nimisque diuturnum otium? Afferit hoc Romanis ſuis Romanus ſcriptor; Syria prima nos victa corruptit, mox Aſiatica Pergameni Regis hæreditas. Illæ opes atque divitiæ afflixere ſeculi noſtri mores, merſamque vitiis ſuis, quaſi ſentinâ, Rempublicam peſſundedere. Naſica, quibuſdam dicentibus, res Romanas in tuto eſſe, extinctis Carthagenſibus, & Græcis in ſervitutem redactis, immò, inquit, nunc demum in ſummo periculo ſumus, poſtquam nulli ſuperſunt vel quos timeamus, vel revereamur: Sentiens inimicos per occaſionem nobis utiles eſſe, per quos non licet impunè ſecurèque eſſe negligentibus.

*Quisquis ſecundis rebus exultat nimis,
Fluitque luxu, ſemper inſolita appetens,
Hunc illa magna dira fortuna comes
Sequitur Libido, non placent ſueta dapes,
Non teſta ſani moris, aut vilis cibus.*

*Cur in penates tenues rarius ſubit
Hæc delicatas eligens peſtis domos?
Cur ſancta parvis habitat in teſtis Venus
Mediumque ſanos vulgus affectus tenet?*

Ideo ſcilicet, quia improbum iſtum amorem, & libidinem, per improbum laborem excludit,

πίνω δ' ἀγερτὴν μέγ' ἐφ' ἑκάδ', id eſt,

Phocylides.

Labor virtutem valdè juvat. Cæterum talem laborem non requiram, qualeſcibet Horatius in Lib. Epod.

*Nullum à labore me reclinat otium,
Urget diem nox, & dies noctem, neque eſt
Levare tenta ſpiritus præcordia:*

Scimus illud Ovidii veriſſimum eſſe;

*Cernis ut in duris (& quid bove firmius?) arvis
Fortia taurorum corpora frangat opus,
Quæ nunquam vacuo ſolita eſt ceſſare novali,
Fructibus aſiduus laſſa ſeneſcit humus,*

Lib. r. De
Ponto.

*Occidet, ad Circi si quis certamina semper
 Non intermissis cursibus ibit equus,
 Firma sit illa licet, solvetur in aqore navis,
 Qua nunquam liquidis sicca carebit aquis.
 Me quoque debilitat series immensa laborum,
 Ante meum tempus cogor & esse senex.
 Ocia corpus alunt, animus quoque pascitur istis;
 Immodicus contrà carpit utrumque labor.*

Senecæ lo-
 cus de Tran-
 quill. Anim.

Atque hæc de moderato otio dicta sint, quo usi sunt etiam viri illi præstantissimi Scipio, & Lælius, qui rerumpublicarum curâ defessi, conchas & umbelicos, ad Cajetam & Lucrinum legere, & ad omnem animi remissionem, ludamque descendere consueverunt. Idque benè: Non enim in eâdem intentione æqualiter retinenda mens est, sed ad jocos revocanda. Cum pueris Socrates ludere non erubescerebat: & Cato vino laxabat animum, curis publicis fatigatum. Ut fertilibus agris non est imperandum; cito enim exhauriet illos nunquam intermissa fecunditas: ita animorum imperus, assiduus labor franget: vires recipient paulum resoluti & remissi. Nascitur ex assiduitate laborum, animorum hebetatio quædam, & languor. Legum conditores festos instituerunt dies, ut ad hilaritatem homines publicè cogerentur, tanquam necessarium laboribus interponentes temperamentum. Lycurgus, quanquam alioqui severis rationibus institueret cives suos, tamen liberales lusus, & jocos, non solum illis permisit, sed etiam præcepit. Instituit enim exercitamenti genus, quod *λέως* appellabat, ad quod conveniebant seniores, jam à publicis functionibus emeriti, lepidis dictis, liberalibusque jocis tempus transmittentes, sed quæ vel ad honesti laudem, vel ad vitiorum vituperationem conducerebant. Quin & signum collocavit *ῥέλωπ* Deo, id est Risui: Quod utilissimum judicaret modestis facetiis animorum vigorem recreari, & ad honestos labores alacres reddi; quandoquidem in rebus humanis

Quod caret alternâ requie durabile non est.

Verè ille olim dixit; Vegetæ & strenuæ mentes, quo plus recessus sumunt, hoc vehementiores imperus edunt. Quamobrem Pythagoras animum citharâ excitare solebat, ubi evigilasset; quod scilicet esset ad functiones obeundas, ac diuturna munia expediri; & quum somnum peteret, rursus testudine mentem leniebat, quod

quò affectus redderet sedatiores. Dicebat Socrates, otium possessionum omnium optimum esse; otium autem sensit, non ignaviam, sed à tumultuosis negotiis, & cupiditatibus, animi tranquillitatem vitiantibus remissionem. Scipio etiam dicere solebat, se nunquam minus otiosum, quàm quum esset otiosus, nunquam minus solum, quàm quem esset solus: Innuens se cum animo semper plurima loqui solitum. Hoc est aptè otio & solitudine uti, hoc est otio multorum vincere negotia. Contra (ut prudenter Ennius inquit)

Otio qui nescit uti, plus negotii habet,

Quàm quum est negotium in negotio :

Nam cui quid agat institutum, nullo negotio

Id agit, studet ibi, mentemque animumque delectat suum

Otioso initio animus nescit quid velit,

Hoc idem est, neque domi nos, neque militia sumus,

Imus huc, hinc illuc : cum illuc ventum est, ire illuc libet,

Incertè errat animus prater propter vitam vivitur.

Impotens malitia.

EMBLEMA XXXII.



*Tempore brumali si calcibus urseris anguem,
 Non nocet, at mens est prona nocere tamen :
 Si multos videas homines tali indole, qui non
 Sunt animo, sed vi deficiente, boni.*

COMMENTARIUS.

Serpentes hyberno tempore velut mortui sunt; ita ut, si premantur, immoti jaceant. Non autem defunt illis venena, sed torpent. Narrant Porphyrium Serpentem, venenum quidem habere, sed quoniam edentulus est, sibi tantum habere: Ita quidem homines mala quidem meditantur, & animo volvunt, sed quia defunt facultates, non nocent, eas autem

autem adepti, omne virus suum evomunt. In hanc sententiam sic Epist. 42.
Seneca : Multorum quia imbecilli sunt, latent vitia, non minus ausura quum illis vires suæ placuerint, quàm illa, quæ jam felicitas aperuit. Et paulò post : Multorum crudelitas, ambitio, & luxuria, ne paria pessimis audeat, Fortunæ favore destituitur : Eadem velle eos cognosces, da posse quantum volunt. Sapienter itaque unusquisque sibi ab illis cavebit, ut eorum insidias evitando, gaudendi materiam eis eripiat. Hoc pacto fiet, ut ipsa malitia maximam partem veneni sui absorptura, & ut basiliscus vitrum speculatus, virus suum in se retortura sit.

Gloria

Gloria post obitum major.

E M B L E M A XXXIII.



*Sapè comes radios per Solis euntibus umbra est,
 Hæc etiam nostræ dux aliquando viæ:
 Gloria viventes etiam sectatur, at illa
 Major ab exequiis semper in ora venit.*

C O M M E N T A R I U S.

Seneca Philosophus in Epistolis suis inquit; Gloria umbra virtutis est, etiam invitos comitabitur: Sed quemadmodum aliquando umbra antecedit, aliquando sequitur; ita Gloria aliquando ante nos est, visendamque se præbet, aliquando in adverso est, majorque quò serior, ubi invidia cessit.

cessit. Quamdiu videbatur furere Domocritus? Vix recepit Socratem fama. Quamdiu Catonem civitas ignoravit, respuit, nec intellexit nisi cum perdidit. Enimvero sic sunt homines, præsentia invidiâ, præterita veneratione prosequuntur. Quod & Lyricus asserit,

Virtutem incolumem odimus,

Sublatam ex oculis querimus invidi.

Vivos interdum Fortuna, sæpè invidia fati fatigat, ubi anima naturæ cessit, demptis obtrectationibus, ipsa se virtus magis magisque extollit.

— *Diram qui contudit Hydram*

Notaque fatali portenta labore subegit,

Comperit invidiam supremo fine domari;

dum scilicet igni Græcanico cælum assequeretur. Ita certè est, Lippus Livor longinqua non aspicit, præsentia obliquè intuetur;

— *Nos nostraque lividus odit,*

— *Et nisi qui terris summotus, suisque*

Temporibus defuncta videt, fastidit & odit :

eique tantum homines magni sunt (ut Poëta loquitur) propter mille annos. Attamen viros illos illustres, & in exemplum natos, ab heroico suo proposito movere non debet, sed potius ὁλοῦ ποδὶ, id est toto pede, adversus illum standum est; ne tanquam Scarabæi umbra (ut est in Adagio) nos terreat parum attentos. Sciat quilibet, nullum rectè factum in hac vitâ præmio carere, cuius (sapientibus placet) vel uberrimus fructus est, fecisse, & in silentiò meminisse; Quia

— *Virtus pretium sibi, solaque latè*

Fortunæ secunda nitet, nec fascibus ullis

Erigitur, plausuque petit clarescere vulgi,

Nil opis externæ cupiens, nil indiga laudis,

Divitiis animosa suis, immotaque cunctis

Casibus, ex altâ mortalia despicit arce.

Mima illa apud Horatium, contempto multitudinis contemptu, satis habebat equitem sibi plaudere. Et alte ac generose ille exclamat: Satis mihi pauci lectores, satis est unus, satis nullus. Volebat hic cordatissimus vir, gloriam sequi, non appeti; nec, si casu aliquo non sequeretur, idcirco quod gloriam meruerat, minus

Horatius.

Claud.


Seneca.

minus pulchrum ducebat, suo scilicet sibi placens theatro. Omnibus nimirum ad multa annorum millia respiciendum est, etiam si cunctis tecum viventibus silentium livor indixerit, venient tamen, qui sine offensâ, sine gratiâ judicent.

In

In malos Causidicos.

E M B L E M A XXXIV.



*Forenses Rabulas vocavit ille
Togatos benè Vultures ; sed illud
Inter hos tamem interest, & illos,
Quòd cadavera Vultures morentur,
Hi vivis quoque detrahunt cruorem.*

C O M M E N T A R I U S .

Vulturum, ut Plinius testatur, ea est Natura, ut triduo ante aut biduo, eò advolent, ubi cadavera futura sunt. Natural. Hist. Lib. 10 Cap. 6.
Hinc Dinarchus Adolescens apud Plautum,
Vide ut jam quasi Vulturii triduo
O

Prius In Truculent.
to.

*Prius prædivinant, quo die efuri fient,
Illum inbiant omnes.*

His avibus similes dicit esse Apulejus perfidos caufidicos, quos appellat vultures togatos; homines illos; non modò infultos & à Minervâ alienos, verum vel maximè lingulaces, & à rabie non malè dictos rabulas. Eo autem pacto vulturibus sæviores sunt, quod hi cadavera expectent, illi vivos homines excoriant. Unde eorum studium Columella caninum appellat; & haud temere quispiam confessum latrocinium dixit. Si naribus eorum afflaverit aura marfupii cujusdam, confestim illos videbis perjuria Laomedontis: Ulyffes argutias, Simonis fallacias, & pietatem Pygmalionis adhibere, cumque non adest medulla sensuum, audies illos abundare spumâ verborum. In tantum denique apud illos fames habendi incanduit, ut dialecticæ mutua fit subtilitas, Rethoricæ languefcant civilitas ubi nummorum perorat pluritas. Hæc movere Columellam, ut diceret, sine caufidicis tatis fœlices fuiffe, & futuras urbes: idque verè, Legibus enim fundatas civitates legibus everrunt. Conqueritur hoc etiam Plautus,

Lib. I.

In Trinummio

*Mores leges perduxerunt jam in potestatem suam,
Magis quæti sunt obnoxiosi, quam parentes liberis,
Ea misera etiam ad parietem sunt fixa clavis ferreis
Vbi malos mores affligi nimio fuerat æquius.*

Atque hæc de rabulis, in fas nefasque iras suas, ac verba locantibus: Veri autem Patroni & Caufidici reverendi, atque suspicendi sunt: Testatur hoc gravissimus Philosophus, τὸ βουλευέσθαι τῶν πρὸς τῶν ἀνθρώπων θρόνων ἐστὶ, id est consiliare, eorum quæ inter homines sunt, divinissimum est. Et Plato, ἱερὸν ἀληθῶς ἐστὶν ἡ συμβουλία, id est, quiddam sacrum profecto est consultatio. Hi quoque urbibus maximè necessarii, periclitantem enim innocentiam præsidio suo sublevant, & ambigua causarum fata dirimunt, nec minus provident humano generi, quàm si manu militari patriam defenderent. Hi suo jure dicere possunt, quod apud Ennium inquit ille Pythius Apollo;

Arist. Rhet.
ad Alex.

*Se esse eos unde sibi non populi & Reges, at omnes sui
Cives consilium expectant,
Suarum rerum incerti, quos ego meâ ope ex*

In-

*Incertis, certos, compotesque consilii**Dimitto, ut ne res temere tractant turbidas*

Est enim sine dubio domus Jureconsulti, totius oraculum civitatis. Quare Salustius ad Cæsarem inquit; Ego ita comperi, omnia regna, civitates, nationes, usque eò prosperum imperium habuisse, dum apud eos vera valuerunt consilia.

O 2

Lubri-

Lubricum Iuventutis

EMBLEMA XXXV.



Dum tener, & nondum fundarat in orbe columnas,
 Monstraque delerat Amphytrioniades,
 Apparent illi virtus hinc, inde Voluptas,
 Et studet in partes flectere quæquæ suas.
 Blanda voluptatis, Virtutis dura videtur
 Semita, dum primo limine quamque notat,
 Hanc tamen invictæ subiens certamine mentis
 Ad Superos tandem vi sibi stravit iter :

Alcidæ

*Alcidae similes homines sunt, dum levis ætas,
 Et peragit cursus cæca iuventa suos;
 Felix qui rectum potuit servare tenorem
 Integer, & nullo crimine tactus obit.*

C O M M E N T A R I U S .

HAc Herculis Fabulâ, quam eleganter Libro decimoquin-
 to descripsit Silius Italicus, & Xenophon sub nomine
 Prodicî Philosophi, Libro secundo Memorabilium So-
 cratis, nihil aliud innuitur, quàm Iuvenes in trivio &
 flexu vitæ positos, de eâ instituenda laborare, magnoque esse in
 periculo, ne à voluptatum blanditiis decepti, & à recto itinere
 abducti, in vada & scopulos deferantur, in quos cum impege-
 rint, non sit receptui locus. Etenim qui ætate illâ in omnia præ-
 cipiti non labitur, spes est illum, inoffenso deinde cursu, per-
 tingere posse ad Candidam metam. Hujus rei utile exemplar,
 Sapientiæ ille adumbrator Ulysses, nobis proposuit,

*Qui domitor Troja multorum providus urbes
 Et mores hominum inspexit, latumque per aquor,
 Dum sibi cum sociis reditum parat, aspera multa
 Pertulit, adversis rerum immersabilis undis.
 Sirenum voces, & Circes pocula nosti.*

*Qua si cum sociis stultus cupidusque bibisset,
 Sub domina meretrice fuisset turpis & excors,
 Vixisset canis immundus, vel amica luto fus.*

Quapropter parentibus nihil prius, aut antiquius esse debet,
 quàm ut religiosè caveant, ne quod deliquium morum pueri-
 lium integritas patiatur: Ineuntis enim ætatis inscitia, senum
 constituenda & regenda prudentiâ est; qui tanquam alter Or-
 pheus, vocem illam, quæ rupes mora que trahit; explicent, hoc
 est, salutaria præcepta cercis illorum mentibus præponant, quæ
 illi sequentes, per labores innumeros, aureum illud vellus, id est,
 virtutem cum immortalî gloriâ consequantur. Fœlices ter &
 amplius si audiant, si viriorum omnium inimici exactum vitæ iter
 inspiciant, & tanquam Alphæus mare Siculum subterlabi dicitur,

sine mixtione undarum, ad suam Aethusam; sic per mundanas hasce vanitates, ad eas virtutes tendant, quibus omnem vitam tueri possint. Rarum hoc ceriè, sed magnum exemplum continentiae, quæ etiam in Liberi Patris sacris (ut Aristippus, in purpurâ saltare coactus, referente Laërtio, dixisse fertur) non corrumpitur;

Cui mens circumflua Luxu

Noverat intactum vitio servare vigorem.

At quàm multum intereà, aut suo, aliorum vitio, ad pejora inclinant: Suo scilicet, dum vitæ habere modum ignari, se totos otio & voluptatibus devovent, quæ ubi animos illorum, ad magna alioqui surgentes, velut pestilenti quodam sidere afflarunt, capti sunt, periëre; iam inter meretrices, illecebras (ut Comicus ait) argentarias, sepulchrum suum habent, totamque meliorem ætatem comburunt. Itaque re cum pulvisculo perditâ, nihil aliud illis restat, nisi ut fiant miseri; non secus ac ille conclamata vitæ adolescens Lesbonicus apud Plautum, qui cum amicè ab imico in hunc modum admoneretur,

Nisi me ascultas, atque hoc, ut dico, facis,

Tute pone te latebis, facile ne inveniat te Honor,

In occulto jacebis, cum te maximè clarum voles:

Ita respondit,

Sciebam ut esse me deceret, facere non quibam miser:

Ita vi Veneris vincetus, otio captus in fraudem incidi.

Juvenalis.

Sic, dum juvenilis ætas adest, absque labore nitidi victitant, cum labore squallidi senectam ætatem transigunt; anteaكتورum eos pudet, agendorum onus haud sustinent; jucundis in juventute cursu quasi peragratis, in senectutem molesta reservant. Accedunt ad hoc parasi, communis perniciës adolescentum, qui ita se comparant, ut omnia assententur, qui exulceratas istas mentes, si suâ sponte non satis insaniant, improbâ arte, quâ illas tractant, magis magisque instigant, ita ut ipsa si cupiat Salus servare prorsus non possit. Venio ad parentes, qui sæpè etiam suo exemplo peccant, librosque malè agendo malè agere docent,

Xenophon.

Si (Enim) damnosa senem juvat alea, ludit & hæres

Bullatus, patrioque eadem movet arma fritillo.

Aut vehementes in utrumque partem sunt, largitate nimîa, aut parsi-

parcimoniâ, & sic in eandem fraudem ex hâc re atque illâ incidunt. Si enim nimis contentè liberos habeant, nec ea que fert adolescentia iis indulgeant, ut est ingenium humanum, semper nitentur in vetitum, omnesque artes advocabunt ut id consequantur. Si nimis laxè & lautè, idem erit. Nam qui adolescenti nimium indulget, sive pecuniæ, aut alterius rei, is febricitanti ministrat vinum, bilioso mel, cœliacis obsonia. Hinc Megarides senex apud Plautum,

Dedisti me hoc pacto ei gladium qui se occideret?

Quid secus est, aut quid interest dare te in manus


Argentum amanti homini adolescenti, animi impoti

Qui exedificaret suam inchoatam ignaviam?

Itaque præceptum hoc Philosophorum hic valeat, μηδ' ἐν ἄγαν id est, ne quid nimis, & modus teneatur, qui est sal & anima virtutum.

Sapientiæ decepatrix Avaritia.

E M B L E M A XXXVI.



*Cautalicet sis Diva, tamen te cautior, arctos
In casses Ratio tinnula sæpè trahit.*

C O M M E N T A R I U S.

Pausanias Corinthiacus memoriæ prodidit: Acrisium consulto de liberis masculis, si quos filia sua pareret oraculo, responsum tulisse, se ab eo, qui è filiâ suâ nasceretur, interfectum iri. Hoc igitur metuens, extracto sub terrâ æreo thalamo, Danaen acerrimâ custodiâ septam tenuit. Verumtamen Iuppiter in aurum conversus, per inpluvium in sinum Danaes influxisse, atque ita cum eâ rem habuisse fertur. De quo Horatius Lib. tertii Ode XVI. & Ovid. Lib. 1. Amor. Eleg. 7.

Iup-

*Iupiter admonitus nihil esse potentius auro ,
Corrupta pretium virginis ipse fuit .
Dum merces aberat, durus Pater, ipsa severa:
Ærati postes, ferrea turris erat.
Sed postquam sapiens in munere venit adulter ,
Præbuit ipsa sinks, & dare iussa dedit.*

Quo figmento adumbratur, Nihil esse tam sanctum, quod non Cicero. violari; nihil tam munitum, quod non expugnari; nihil tam providum, quod non decipi à pecuniâ possit. Si dubitas, quotidianam experientiam, ipsasque Historias tibi auctores dabo. Hæ Philippum oraculo fidentem, non ferreis, sed argentatis hastis Græciam subegisse testabuntur, bellumque (ut Ennius loquitur) cauponatum fuisse; iis scilicet corrupendis, locupletandis, atque ornandis, qui in singulis urbibus, summæ rei præerant. Quid Lacedæmonii? nonne primi omnium hosti munera dare cœperunt, belliche victoriam auro vanalem effecerunt? Idcirco M. Tullius, Offic. secundo, scribit, Cajum Pontium Samnitum, optare solitum, ut ad illa tempora se Fortuna servasset, & tunc esset natus, quando Romani Dona accipere cœpissent, non fuisse passurum, eos diutius imperare. Adeo scilicet humana cupiditas, ad istas utriusque materiæ laminas caligat, quibus tamen terra ut noxiis rebus, maloque gentium in medium prodituris, toto pondere incubuit. Resistit quis, aut obloquitur? os illi argento verbera, obstruetur, & lucripetam istum, legirupam efficies; ignarum scilicet hoc pauxillum lucri quantum illi damni adportet. Demeſtr. Pausan. Seneca de Benef.

Nec minor in campo furor est, emptique Quirites

Petron.

Ad prædam, strepitumque lucri suffragia vertunt.

Porro cum sacra hæc auri fames ubique pernicioſa sit, omnium tamen malorum comprimis radix est, si iudicium animis inhæreat. Quod tamen aliquando fit, ut ubi dos in linguâ est, ibi consilia corripantur, lucroque Sapiencia etiam irretiatur. Probos non tango, in quorum numero mihi Aleamenes ille; qui quodam rogante, cur à Messeniis oblata munera recusasset: Quoniam si recepissem, inquit, cum legibus pacem habere non poteram. O mentem regno dignam! quæ magno obvioque lucro, legum auctoritatem anteposuit. Quid ille egregius vir, cui cum Cæsar ducenta donaret, id est quinque millia Philippicorum, Iustin. Novell. ut præſid. absque ulla dar. pecun. ad offic. mitt. Parag. Tametsi enim Const. 8. Seneca.

rum, an non ridens rejecit? ingenti ore efferens; Si tentare me constituerat, toto illi fui experiendus imperio. Quasi dicat, nec dato quidem illo, se cessurum illis decretis, & vitâ. Et cur? Cum omnes cinis æquet, sola autem Virtus distinguat?

Nos homunculi

Plant.

*Salillum anima qui cum extemplò amisimus,
Æquo mendicus, atque ille opulentissimus
Censetur censu ad Acheruntem mortuus.*

Vitium

Vitium Virtutis specie citius fallit.

E M B L E M A XXXVII.



*Blandius arridet pellaci flore Cicuta,
 Et tamen interius, quo perimamur, habet.
 Cum vitium specie sese Virtutis obumbrat,
 Promptius in casses pectora nostra rapit.*

C O M M E N T A R I U S.

DUO sunt, inquit Seneca, propter quæ delinquimus; Aut Epist. 4.
 inest animo pravis opinionibus malitia contracta, aut
 etiam si non est falsis occupatus, ad falsa tamen proclivis
 est, & citò specie, quo non oportet trahente, corrup-
 pitur. Sic nulla vitia velocius citiusque obrepunt animo, aut
 majorem

maiores afferunt perniciem, quàm quæ Virtutis specie fucantur,

Fallit enim vitium specie Virtutis & Umbrâ.

Horum de genere sunt Ambitio, quæ virtutem mentitur, ejusque nomen usurpans, honestâ quodammodo prætextâ ornata, oculis mortalium sese ingerit. Hinc ille Vates,

—— *Habitat sub pectore caso*

Ambitio, & morbum virtutis nomine jactat.

Superbia libertatis loco ducitur. Sitis inexplibilis habendi vocatur providentia. Livor honesti Zelo personatur. Maledicentia fucat morbum titulo libertatis. Adulatio pro humilitate sese insinuat. Et tam callidè; & blandè hæc imponunt, ut internosci nisi difficulter non queant. Porro quemadmodum venenum quò dulcius, eò periculosius est: sic hæc mala periculosissima sunt, cum delectant. Tum enim, quia amamus, defendimus, & malum excusare, quàm excutere. Tandem eò insanix devenimus, ut laudemus, & gloriemur iis, quibus erubescere oportebat. Et quod unum habebamus in malis bonum, perdimus peccandi verecundiam. Benè ille, Miserum est peccare, miserius delectari, miserimum excusare, & tum demum consummata amentia est, quum ad studium malum, opinio quædam honestatis accesserit. Medici nullum morborum genus putant formidabilius, quàm quod ægrotis mali sensum eripit. At hujusmodi ferè sunt omnes animorum morbi. Quo quisque gravius ægrotat, hoc minus admittit oppem medicantis. Nec ægrotus de suis potest judicare malis, quibus laborat, propterea quod ægrotet ea pars, cujus erat judicare. Nunquam autem sanatur, nisi excusso hoc irrationali motu, putâ Opinione, Rationem, quæ exultantes affectus temperet, & in angustiores gyrum ducat, sibi adfiscat. Ut enim

Boët. lib. 1.
Met. 7.

*Nubibus atris
Conditâ nullum
Fundere possunt
Sidera lumen:
Sic quoque si vis
Lumine claro
Cernere verum,*

Hanc

Hanc Bonæ mentis peturbatricem Opinionem disjice: quia

Nubila mens est

Vinctaque frenis

Hæc ubi regnat.

Iraque ex præcepto Horatii

— te ipsum,

Concute, num qua tibi vitiorum in se veris olim

Natura, aut etiam consuetudo mala; Namque

Neglectis urenda filix innascitur agris.

Malum consilium consultori pessimum.

E M B L E M A XXXVIII.



*Consilium auctori prævum nocet: Hoc benè quondam
Monstrasti exemplo sæve Perille tuo.*

COMMENTARIUS.

Perillus Atheniensium faber ingeniosissimus, olim Phalaridi, Agrigentinorum Tyranno, taurum ex ære fabricavit, cui januam in latere posuit, ut cum inclusus reus subjectis ignibus torqueretur, mugitum, non hominis vocem videretur emittere: quo invento, cum munus & præmium à crudelissimo Tyranno, qui novis hominum tormentis delectabatur, postulare, in eo ipso, ut eam pœnam primus experiretur, includi jussus, ac suppositis ignibus exustus est. Vide Ovid Plin. Lib. 34.

Lib.34. Cap.8. Quo exemplo monemur, malum consilium consultori esse pessimum.


— *Neque (enim) lex aequior ulla est*

Quam necis artifices arte perire sua.

Polypus dum Conchæ carnem captat, ipse capitur, ac tenetur. Et Basiliscus dum speculum inspicit, suo ipsius veneno, à speculo percusso, necatur. Sic semper malitia maximam partem veneni sui bibit. Græci dicunt *ἰερόν ἢ βυλὴ*, id est, sacra quædam res est consilium. Atque ut est libenter accipiendum, ita est religiosè citraque fraudem dandum, si quis egeat. Alioqui non defuturum est Numen aliquod, quod pœnas reperat ab eo, qui rem sacram perfidiâ violarit. Exstat in hanc sententiam Apologus Græcus non inuenustus, qui sic habet: Leonem ob senectam ægrotantem, & eâ de causâ in lustrò se continentem, cætera quidem animantia officii causâ, visebant, exceptâ Vulpe. Proinde Lupus, nactus oportunitatem, accusavit Vulpem, apud Leonem læsæ Majestatis, ut quæ pro nihilo haberet eum, penes quem rerum erat summa; nec ob contemptum ad visendum accessisset. Intrereâ autem intervenit in Lupi fabulâ Vulpes, & extremam sermonis partem audivit. Itaque Leo, conspectâ Vulpe, protinus adversus eam infremuit; at illa postulato ad purgandum sese spatio: Et quis, inquit, omnium qui huc convenerunt, tantum tibi profuit, quantum ego? quæ quoquo versum circumcursitavi, tibi que morbi remedium à medicis reperi. Cumque Leo protinus edixisset, ut remedium aperiret, si vivum inquit Lupum excories, & illius pellem induas, convalesces. Leo credulus, continuo Lupum invasit, & interemit. Quo extincto, risit astuta Vulpes calumniatoris malum consilium in ipsius recidisse caput, ipsumque exedisse quicquid mali intraverat.

Diffidendum.

EMBLEMA XXXIX.



*Aspiciens hominem lachrymas Crocodilus acerbè
Fundit, & in casses fugiendo ducere tentat,
Huc ubi perduxit, conantem cedere retrò
Invadit, rostroque illum discerpit avaro:
Nusquam tuta fides, hosti diffidito semper,
Nam nihil utilius quàm diffidentia prudens.*

COMMENTARIUS.

Pessimi hominum nunquam terribiliores sunt, quàm dum voce,
& gestu sese lenissimos ostendunt. Publ. Mimius

Malus ubi se bonum fingit, tunc est pessimus.

Quod inprimis de Domitiano Principe lectum est, Bassianus
etiam

etiam imperator (ut est apud Ælium Spartianum) lacrymabatur, quoties aut mentio fieret, aut magnos videret Getæ fratres, quem occiderat. Aranea (ut ajunt) antequam feriat titillat, Auceps, & mulier quem fallere vult, delinit. Polypus quem demergit, amplectitur. Hyena vocem humanam imitatur, & nomen alicujus ediscit, quem postea devoret. Crocodilus denique Nili animal, vid. Plinium Lib. 8. Cap. terrâ pariter ac flumine infestum, quem dilacerare statuit, infrequentem fugit, fugientem sequitur: Sunt qui scribunt eum etiam lacrymas emittere, conspecto homine. Unde in Adagio est, *Crocodili lacchrymæ*. Quibus exemplis monemur, nihil credere, atque omnia suspecta habere. Exclamat Tragicus,

In Hyppolito.

O vita fallax abditos sensus geris.

Multis simulationum involucris, & quasi velis obtenditur uniuscujusque natura. Frons, oculi, vultus persæpè mentiuntur, oratio verò sæpissimè. Quod expertus est ille, cum inquit; *O amici*, Cic. Ad Q. Frat. Epist. 1. *nemo amicus*. Itaque merito nobis occinit Epicharmus; *νᾶφε, ἢ μέμνασο ἀπιστεῖν, ἀρεθεῖς δὲ πάντα τῶν φρενῶν*, id est, Sobrius esto, & memor sis ne quid credas, nervi hi sunt sapientiæ. Occurrit & illud Euripidis;

σὺ φρονεῖς δὲ ἀπιστίας

ἃ δ' ἐστὶν ἄλλο χρησιμώτερον βροτοῖς, id est,

Sapiente diffidentia non aliud utilius est mortalibus,

Præcipue adversus hostis insidias. Quoniam nulli citius opprimuntur, quàm qui nihil timent. Et frequentissimum initium calamitatis, est securitas. Nil itaque in hoste contemnendum, sed cogitandum, sub omni lapide dormire Scorpionem. Frequenter jam fusa acies, dispersos, ac passim sequentes reparatis viribus interemit. Narrat Cornelius Nepos in Thraſybulò, eum, cum Phylem confugisset, quod est castellum in Attica munitissimum, non plus habuisse secum, quàm triginta de suis. Hoc initium fuit salutis Atticorum, hoc robur libertatis clarissimæ civitatis. Contemptus enim est primò a Tyrannis, atque ejus solitudo; quæ quidem res & ipsis contemnentibus pernicipi, & huic despecto saluti fuit. Hæc enim illos ad persequendum segnes, hos aurem, tempore ad comparandum dato, robustiores fecit. Quo magis præceptum illud, omnium in animis esse debet; Nihil in bello oportere contemni; Nec sine causa dicitur, Matrem timidi flere non solere.

Veget. lib. 3. cap. 25.

Q

Mo-

Morosis cedendum.

E M B L E M A X L.



*Cedit morosis, nam quo magè concutis ignem,
Hoc magis attollit mota favilla jubar.*

C O M M E N T A R I U S.

IN Adagio est; Ignem gladio ne fodito. Quo monemur, potentum & ferocium iracundiam, non esse convitiis exagitantam, propterea quod flamma, quo magis commoveretur, hoc magis magisque invalescat; cum contra, si quiescat, sopiatur, Plautus Amphitruone;

*Bacche bacchanti si velis adversarier,
Ex insanâ insaniorem facies, feriet sapius,
Si obsequare, unâ resolves plagâ.*

Fulminis & procellæ eadem ferè est vis; validissima quæque, ac
reni-

renitentia sternunt, & evertunt. Contrâ arundinem contumacem adversus sævientium nimborum impetus, domitricemque ruentis cœli videmus; nec aliis armis, quàm patientia quadam tutam. Sic quisquis majoribus suis cedit cedendo, ut arundo, vincit. Prætercâ nihil ita confusionem parit ingerenti mala, sicut fortis tolerantia patientis, & neque verbo, neque opere reddere vindictam. Quod quid aliud, quàm illum sævientem in adiutorium tui, pudore victum convertere? Hoc certè vindictæ genus est maximum, Seneca. scilicet, non commoveri. Prudenter Philosophus; Si magnanimus fueris, nunquam judicabis tibi contumeliam fieri. De inimico dices, non nocuit mihi, sed animum nocendi habuit. Et cum illum in potestate tuâ videris, vindictam putabis, vindicare potuisse. Sciro magnum & honestum vindictæ genus esse, ignoscere. Maximam autem factæ injuriæ pœnam fecisse, nec quenquam gravius affici, quam qui ad supplicium pœnitentiæ traditur. Socrates, cum in viâ quidam per lasciviam illi calcem impegisset, admirantibus aliis, quod id pateretur; Quid facerem inquit? illis hortantibus uti vocaret ipsum in jus: Ridiculum, inquit, si quis asinus me calce percussisset, decretis mihi, voca illum in jus? Nihil scilicet patientissimus vir interesse putabat, inter asinum & hominem brutum. Idem alias percussus, nihil aliud respondit, quam, miserum esse, quod homines nescirent, quando cum galeâ esset prodeundum. Quid Cato? cum illi in foro causam dicenti Lentulus attractâ pingui saliva, in mediam frontem, quantum poterat expuisset; absterfit Cato faciem, ac dixit, Affirmabo omnibus, Lentule falli eos, qui te negant habere os. Atque hic subsistens, carmen aliquod, ex 2. Libro variorum meorum Carminum, quo aliquando Amicum ad patientiam cohortatus sum, addo, Ignosce, quisquis hæc leges:

*Ne te plus oculis meis amarem
Dilectissime - - - non monerem
Te tam sollicitè, quid & nocivum,
Et quid utile sit tibi futurum,
Dum ver floridulum juvena carpit.
Te nuper monui, monebo rursus,
Ne (quod pectora concoquit bonorum)
Vt soles tremulo Patri resistas.*

Est morosior, est avariorque,
Sed hos canities, petita cunctis,
Adducit comites perenne secum.
Qualis qualis erit, tamen ferendus
Est tibi, potius modestus ipsum
Quam perversus, & obstinatus audi.
Si auro fueris molestus idem,
Nihil proficies, resuscitatur,
Sed non repprimitur premendo, serpens.
Palpanti nihil asperum ferumve est:
Vnda liberius vagans per alveum
Tranquillo pede labitur, fluitque;
Ast hac, si lapides, trabesve cursum
Rapacem impedian, sonat furitque;
Et cum murmure bulliens sonoro
Pugnantes lapides trabesque quassat.
Omnis hoc habet ira, sevensque
Indignatio, crescit in dolores
Et tormenta sui, jugumque nullum est
Quod non durius urgeat morantem,
Quam qui subsequitur ducem paratus.
Vnum est tristibus in malis levamen,
Pati leniter. Et necessitati
(Vt virum decet) obsequi libenter..

Sapiens supervacanea bona negligit.

E M B L E M A X L I.



*Diogenes quosdam cernens haurire liquorem
 Manu puellos limpidum,
 Abjecit cyathum, palmas in pocula vertens,
 Quis usus est impofterum.
 Præcidit remoras Sapiens ; quo promtius altam
 Virtutis Ædem transeat.*

C O M M E N T A R I U S.

Nihil aliud olim Diogenes, quàm peram, pallium, & scipum circumtulit, & *ῥαυτὴν*, id est, doliarem vitam agere solitus fuit. Ad hunc Alexander Magnus ita ali-

quando locutus fertur : Adsum, O Diogenes, tibi subventurus : cui Diogenes, uter nostrum pluribus eger, ego qui ultra peram, & pallium nihil desidero, an tu, qui non contentus patrio regno, tot periculis temet objicis, ut latius imperes, adeo ut vix totus orbis tuæ cupiditati videatur satis futurus ? Hæc ad Alexandrum : Memor scilicet illius Apulei in Apologiâ sententiæ ; Pauperem me vis ? prius avarum esse doceas necesse est. Quod si nihil in animo deest, de rebus extraneis quantum desit non laboro. Aliquando etiam, cum videret quosdam pueros manu suâ aquam haurientes, & bibentes, indignabundus cyathum suum, tanquam, supervacaneum, abiecit : innuere volens, superfluis istis divitiis exclusis, habituram latius nobiscum quietem, & tranquillitatem : quibus eò amplius loci erit, quod Fortunæ minus. Democritus olim etiam divitias abiecit, onus illas bonæ mentis existimans. Poterat & Thales habere opes, sed multò altius putavit contemnere ; doctus scilicet, habere & Virtutem suas illecebras, quas gustare & ruminare cum cœperimus, alias magnopere non requiramus. Enim verò viri illi in exemplum nati, omnia, ut sciperent, contempserunt, & ad Bonam Mentem magno cursu, ac totis viribus contenderunt, præcidentes ea, quæ tenere, ac remorari possent : divitias dico, quæ multis ad Philosophandum obstitere, cum contra paupertas expedita sit, & ad Philosophiam, absque viatico, pervenire liceat. Sapiens ille Bias, cum quidam patriam cepisset hostis, cæterique ita fugerent, ut multa de suis rebus asportarent, cumque esset admonitus à quodam, ut ipse idem faceret, Ego vero, inquit, facio, nam omnia mea mecum porto. Cordatus vir hæc Fortunæ ludibria, ne sua quidem putabat, quæ nos appellamus etiam bona nostra ; quæ quæsitum difficilia, custoditu anxia, & amissu nobis flebilia sunt. Illi contra quibus recta placent, securi & liberi nihil petunt, & tota Fortunæ comitia prætereunt. Dant se Philosophiæ, almæ animorum nutrici, satis habentes, si non algeant, non esuriant ; cumque Lucano si exclamant,

— O prodiga rerum

*Luxuries, nunquam parvo contenta paratu,
Et quæstorum terrâ, pelagoque ciborum
Ambitiosa fames, & lauta gloria mensæ,*

Discite

Cic. in Paradoxis.

Lib. 4.

*Discite quam parvo liceat producere vitam,
Et quantum Natura petat. Non erigit agros
Nobilis ignoto diffusus Consule Bacchus
Non auro Myrrhaeque bibunt, sed gurgite puro
Vita redivit: satis est populis fluviusque Ceresque.*

Et profecto


*Vt quisque minimo contentus fuit,
Ita fortunatam vitam duxit maxime.*

Turgil.

In

In Avaros.

E M B L E M A X L I I.



Immunda pecudes Sues, pigroque
Semper implicitæ luto ac sepulta,
Non prosunt nisi carnibus peremptæ;
Sic queis pectora fascinauit aurum
Æternum modo grunniunt suosque
Acervos tennes nimis queruntur,
Donec post sua fata dignioris
Heredis foveant, alantque luxum.

C O M-

C O M M E N T A R I U S.

Publius Mimus ait, Avarus, nisi quum moritur, nihil rectè facit: Non secus ac Sus, immundum illud pecus, quod perpetuo suo luto immersum, inter ingentem glandium copiam, semper grunnit & queritur, nullique, nisi interemptum & macatum, suo lardo prodest. Sic etiam turpilucricupidi (ut cum Plauto loquar) avari, magnas inter opes inopes sunt Tantali; queruntur perpetuò, &

Patulis rimantur faucibus aurum:

Idque non solum in terrâ, ex mercibus suis ex Oriente & Occidente petitis, sed etiam sub terram, inque fodinas descendunt, quo eos uberrimus Fortunæ rivus inauret. Conquestus hoc est jam olim Poëta Ovidius,

Itum est in viscera terra,

Quasque recondiderat, Stygiisque admoberat umbris,

Effodiuntur opes irritamenta malorum.

In Metam.

Hos tales olim Regina Carum Semiramis sic lussit: Monumento, quod sibi pararat, hæc inscribi jussit, Quisquis Rex pecuniâ egerit, aperto monumento, quod voluerit capiat. Darius potitus eâ civitate, titulo credens, saxum ingens, quo claudebatur monumentum, vix amolitus, nihil quidem invenit pecuniarum, sed ex altero saxilatre hoc inscriptum repperit: Ni vir malus esses, & pecuniâ inexplibilis, haudquaquam mortuorum loculos moveres. Hoc pacto turpissimus avarus spe suâ cecidit, & irrisus abiit. S. Bernardus super Cant. Sermon. xxxviii. ait, currum Avaritiæ quatuor vitiorum rotis vehi, quæ sunt, Pusillanimitas, Inhumanitas, Contemptus Dei, & mortis Oblivio. Quæ verba si examinemus, verissima esse comperiemus. Primò Pusillanimitatem Avaritiæ adesse, ex eo patet, quod infra terram sese demittat, dum aurum argentumque, vilissimas terræ glebas eruit;

Hoc quicquid placet, excitatque mentes

Infimis tellus aluit cavernis.

Boëtius.

Hinc est quod Plutonium præfecerit divitiis Antiquitas; quod ex imis terræ visceribus, immò ab ipsis inferis petantur opes. Seneca de Beneficiis: video ferrum ex iisdem tenebris esse prolatum, quibus aurum & argentum, ne aut instrumentum in

cædes mutuas deesset, aut pretium. Porro, secundum Cicero-
nem, nihil tam parvi, tamque angusti animi, quàm amare divitias.
Dicebat ille, avaros ita facultatum suarum curam gerere, quasi es-
sent propriæ; rursus ex iisdem nihil capere utilitatis, quasi essent
alienæ. Quod quid aliud, quàm pusillanimitas? Sapientius Ho-
rati-
us,

Mihi res, non me rebus submittere conor.

Secundò Inhumanitatem avaris inesse, testatur Seneca; In nullum
Avarus bonus est, in se pessimus; Idem etiam in Euclyone oculis
subjicit Plautus. Appositè illum hydropi comparat Horatius,
quia ut illi

Quò plus sunt potæ, plus sitiuntur aquæ;

Claud.

Sic, *Semper inops quicumque cupit.*

Scilicet improba

Horat.

Crescunt divitiæ, tamen

Curta nescio quid semper abest rei.

Ut Indicæ formicæ, aurum è cavernis erutum, servant tantum,
non fruuntur: ita dives avarus, non fruitur ipse suis opibus, & aliis
invidet illarum usum, multasque parasse divitias, non ei finis est
miseriarum, sed initium. Nam adhuc quærendo (qui mos est a-
ro) cupiditas crescit, & paupertas cupiendo. Dicebat ob id Epi-
ctetus, non est quod avaris opes augeas, sed tollas cupiditatem.
Omnis enim cupido acquirendi ex opinione inopiæ venit, nec re-
fert quam magnum sit, quod tibi minimum est. Non habuit tan-
tam rem familiarem Philus quantam Lælius, nec Lælius quantam
Scipio, nec Scipio quantam Crassus dives. At enim nec Crassus
quantam volebat. Ita cum omnes superaret, à suâmet avaritia su-
peratus est; omnibusque potius dives visus est, quàm sibi. Restat
tertium vitium, Contemptus Dei. Dicit hoc tibi Juvenalis,

Apul. A-
pol.r.

Falsus erit testis, vendet perjuriam summâ

Exiguâ, Cereris tangens aramque pedemque.

Et quartum, (blivio Mortis; Quia ut nunquam moriturus,
quo minus viæ restat, eo plus viatici sibi quærit, ut Horatius
inquit; °

Secunda marmora

Locat sub ipsum fumus, & sepulchri

Immemor struit domos.

His au-

His autem hominibus quid aliud impreceris, quàm quod Juvenalis Pacuvio;

*Vincat Pacuvius quaso vel Nestora totum,
Possideat quantum rapuit Nero, montibus aurum
Exaquet, nec amet quenquam, nec ametur ab ullo.*

R 2

Cæcus

Cæcus amor sui.

E M B L E M A. XLIII.



*Dum sua subjectis Narcissus spectat in undis
 Corpora, & in facie deperit ipse sua,
 Spernitur à Nymphis, subitoque in pectore motu
 Ipse sui est factus flos Hyacinthus amans :
 Fabula narratur mutato nomine de te ,
 Qui reliquos spernis cæcus amore tui.*

C O M M E N T A R I V S.

Suidas inquit Nymphas à Narcisso spretas dixisse, πολλοὶ σέ τε
 μισῶσιν ἂν σταυρὸν φιλήῃς, id est, Et multi te oderint si te ipsum
 ames. Quod ut ad Emblema nostrum torqueamus, sciendum

dum est eas Nymphas hîc intelligi, quas Sapientiæ præsidēs Anti-
 quitas esse voluit, quæ elatum pectus fugiunt, humile verò am-
 plectuntur, & exosculantur. Est autem in hominibus quidam cæ-
 cus amor sui, quem φιλαυτία vocant: Hoc morbo licet plurimi
 laborent, nunquam tamen de remedio quærendo cogitant, sem-
 per sibi patrocinantur, semper blandiuntur. Omnes nobis vide-
 mur esse belli, festivi, sâperdæ, cum simus καῖργοι. Nescio quâs Chi-
 mæras, quæ monstra nobis fingamus; interea autem auras, & nu-
 bes, pro Junone, captamus miseri Ixiones. Usque adeo nihil ma-
 gis officit progressibus nostris, ac falsa opinio; Quicquid enim
 hæc præoccupavit, nunquam assequitur industria. Idcirco Sapi-
 ens huic vitio bellum indicat, non aquâ & igni, sed toto suo pecto-
 re. Porro quia Narcissum, in aqua, tanquam speculo, se contem-
 plantem, hoc Emblemata repræsentat, pauca de speculis, quæ huc
 facere videbuntur, addam. Plautus in Epidico sic inquit,

*Non oris causâ modò homines aquum fuit
 Sibi habere speculum, ubi os contemplarent suum,
 Sed quî perspicere possent cor sapientiæ.
 Vbi id inspexissent, cogitarent postea,
 Vitam ut vixissent olim in adolescentia.*

Inventa sunt specula (ait Seneca) ut homo ipse se nosceret: Mul-
 ti ex hoc consequuntur, primo sui notitiam, mox & consilium
 quoddam: Formosus ut vitet infamiam, ne corporis dignitatem,
 morum dehonestamento polluat: Deformis, ut ingenio corpo-
 ris damna rependat, & virtutibus redimat quicquid corpori
 deest. Amplius, ut Juvenis flore ætatis admoneretur; illud tem-
 pus esse discendi, senex, ut indecora canis deponeret, & de morte
 aliquid cogitaret, admoveri sibi lineas sentiens.

Vergo.

Natural.
quæst. lib. 5.

Mors introitus ad Vitam.

EMBLEMA XLIV.



*Confectus senio Phœnix se mittit in ignem,
 Ut propriis iterum pullulet exequiis:
 Discite mortales Parcarum spernere fila:
 Nam, quo vivamus, vivere desinimus.*

COMMENTARIUS.

Vide Plinium
 Lib. 10.
 Cap.

DE Phœnice sic Claudianus;
*Hic neque concepto fœtu, nec semine surgit,
 Sed pater est prolesque sui, nulloque creante
 Emeritos artus secundâ morte reformat,
 Et petit alternam totidem per funera vitam.*

Huic avi nos Christiani, æquiparandi sumus, cum ille dies quem
 impii

impīi tanquam extremum timent, nobis æterni natalis sit. Quamquam hoc neget Ethnicus Poëta, cum inquit,

*Soles occidere, & redire possunt,
Nobis cum semel occidit brevis lux
Nox est perpetuū una dormienda.*

Catull.

Sanius dux ad Eloquentiam Cicero; Supremus ille dies, non Lib. I. Tusc. Quæst.

Si à Deo denunciatum videatur, ut è vitâ exeamus, læti, & agentes gratias, pareamus, emittique nos è custodia, atque levare vinculis arbitremur. Si autem nihil denunciatum fuerit, eo tamen sumus animo, ut illum horribilem diem aliis, nobis faustum putemus: nihil in malis ducamus, quod vel à Diis immortalibus, vel à Naturâ parente omnium, constitutum. Non enim temere & fortuito facti & creati sumus, sed profecto fuit quædam vis, quæ generi consuleret humano, ne id gigneret inter cætera, quod cum exantlavisset omnes labores, in mortis malum incideret sempiternum. Paratum nobis perfugium potius putemus, quo utinam passis velis tendere liceat. Matthæus Cap. 13. *Tunc iusti fulgebunt sicut sol, in regno patris sui.* Fœlices, mehercules, & ter beatos illos, qui vitæ præcedentis innocentia, fideque meruerunt tam præclarum de cælo patrociniū, ut renati inter astra micare possint. Imaginemur, quæso, Seneca, quantus ille sit fulgor, tot sideribus inter se lumen miscentibus. Nulla serenum umbra turbabit, æqualiter splendet omne cœli latus. O quam habebit tunc animus noster, quod gratuletur sibi cum emissus his tenebris, in quibus assiduo volutatur, totus illam lucem aspexerit, quam nunc per angustissimas oculorum vias obscure intuetur; & tamen illam procul admiratur! Hæc cum perpendimus, quis mortem temporalem metuat, cum æterna ante oculos vita sit? quis labores carnis timeat, cum se in requie æternâ noverit collocandum? Audi iterum Cicero-nem; Pro dii immortales, quam optabiliter iter illud ineundum est, quo confecto, nulla reliqua cura, nulla sollicitudo futura est? Legitur non-nemo in libris quæstionum Tusculanarum, cum Platonis libros de immortalitate animorum legisset, mox sese è præcipite muro, in mare abjecisse. ut æterno illi Cœlitum concilio adscriberetur. Refert Val. Maximus; Thraces olim natales hominum flebiliter, exequias cum hilaritate celebrasse;

brasse; gnari scilicet, sine ullis Doctorum præceptis, veræ nostræ conditionis: ideoque, inquit, merito sibi sapientiæ laudem vindicarunt. Et certè, si istæ plus quàm aniles ineptiæ pellantur, quid in morte miseriarum invenias? At amaram esse dices. Respondet Orator; Habes somnum imaginem mortis, cumque quotidie induis, & dubitas quin sensus in morte nullus? cum in ejus simulacro videas esse nullum? Diogenes interrogatus num quid mali esset mors? Quo inquit, pacto malum, cum præsentem non sentiamus? quod autem abest nulli malum est. Dum sentit homo, vivit, nondum igitur adest mors, quæ si adsit, abest sensus. Malum autem non est, quod non sentitur. Hanc ratiocinationem quidam tribuunt Epicuro; Mors quidem mala non est, sed iter ad mortem. Id si metuimus, totâ virâ metuendum est, quid enim hæc aliud, quàm iter ad mortem? Cunctos itaque Boëtii verbis alloquor


Lib. 3. Met.
13.

*Huc omnes pariter venite capti,
Quos fallax ligat improbis catenis
Terrenas habitans libido mentes;
Hic erit vobis requies laborum,
Hic portus placidâ manens quiete,
Hic patens unum miseris asylum.*

E parvis

E parvis citò magnus.

E M B L E M A X L V .



*Quosquos ex humili salire cernes
 Ad fastigia dignitatis altæ,
 Crocodilo habeas pares, ab ovo
 Qui crescit minimo brevî stupendus.
 Parte hæc dissimiles tamen vocabis,
 Quòd hic perpetuo angeatur, illi
 In summo positi ruant ad imum.*

C O M M E N T A R I U S .

NArrat Pierius, in hieroglyphicis suis, Crocodilum è minimis initiis maximum cito capere incrementum; Et Plinius

Nat. Hist. lib.
2. cap. 25.

refert eum, quomdiu vivit, crescere. Huic animali Pierius homines, qui ex infimo, & humillimo loco ad summas dignitates emergunt, æquiparat: Hâc parte ego tamen eos dissimiles arbitror, quod, cum Crocodilus (secundum Plinium) perpetuo crescat, illi contra, ubi ad fastigia pervenerint, ad ima tendant. Non secus ac stellæ, quæ subito natæ, subito evanescunt. Et naturalis ratio est, ut quibus viis fiunt, crescuntque omnia, iisdem faciliè resolvantur. Hinc Ulpianus Lib. 48. ad Sabinum; Nihil tam naturale est, quam eo genere quidque dissolvi, quo colligatum est. Exemplo nobis sit, unum instar omnium, Romanum imperium, quod è pastorali (ut ita dicam) tugurio, tantum ultra reliquas urbes caput extrulit,

Tit. de Divers.
Regul. Iuris.

Virgil. Ecl. 1.

Quantum lenta solent inter viburna cupressi.

Lib. 2.

Ita ut sub Principe Augusto magnitudine & felicitàte suâ laborarit. Meruit quæ tandem triumphati orbis caput dici. Iam verò non amplius gaudii materia est, sed humanæ fragilitatis, & Fortunæ variantis indicium. Certè hoc imperium tale fuit (ut Vell. Paterculus de Bruto, & Cassio loquitur) quod prona Fortuna comitata est, & veluti fatigata maturè destituit.

A teneris afuescendum.

EMBLEMA XLVI.



*Frustrà, operam perdis, potuisset virga moveri
Cum nondum staret viribus aucta suis.
Nunc robur mora longa dedit, citiusque fatiscet
Quàm queat in formam flectier illa novam.*

COMMENTARIUS.

Ingeniosissimus Poëtarum Ovidius inquit,
*Qua præbet latas arbor spaciantibus umbras,
Quo posita est primum tempore, virga fuit,
Tunc poterat manibus summa tellure revelli,
Nunc stat in immensum viribus aucta suis.*

Quo elegantissimo simili nos docet, præcipuum jam inde à

In lib de
Rem. An. or.

teneris, liberorum correctioni impendendum esse laborem. Tractanda est cera, dum molliſſima eſt. Virga ſi curva ſit, virga flexenda eſt in eam formam, quam ei perpetuam eſſe velimus, alioqui frangas citius, quàm corrigas, cum jam in pravam induruerit; Et

Horat.

Naturam expellas furcâ tamen uſque recurret.

Fingenda eſt argilla etiamnum uda, imbuenda liquoribus optimis teſta eſt, dum rudis; tingenda lana, dum à fullone nivea venit; nulliſque maculis contaminata. Idem in tenerâ liberorum ætate obſervandum eſt: quorum natura, licet in pravam inclinare videatur, ſuperabilis tamen eſt. Efficax quidem res eſt natura, ſed hanc vincit efficacior inſtitutio. Themistocles mirantibus aliis, in adoleſcente quopiam, qui feroci, pravoque ingenio videbatur, mutatos eſſe mores, dicebat, aſperos & indomitos pullos in optimos equos evadere, ſi quis illis diſciplinam & maturam inſtitutionem adhibuerit: maturam dico, quia ſera ne hilum proficit. Aniſthenes, cum filium cujuſdam ſuſcepiffet erudiendum, rogatus à parente quibus rebus opus eſſet, libro inquit novo, novo ſtylo, novâ tabellâ. Rudem nimirum, & vacuum animum requirebat Philoſophus. Nam ut ceræ vacuæ quidlibet imprimas, litteris autem exarata, parum, aut nihil: ſic etiam animo. Porro, quia vicina eſt lapſibus adoleſcentia, &

Juvenalis.

———— *Dociles imitandis*

Turpibus & pravis omnes ſumus;

Lib. 2. de ira. Ideò maximam diligentiam in educatione requiremus, Hæc enim bona, bonos efficit, mala malos. Teſtatur hoc Seneca; Nihil magis fecit iracundos quàm educatio molliſ & blanda, ideò unicis quo plus indulgetur, pupilliſque quo plus licet, eo corruptior eſt animus. Non reſiſtet offeſſis, cui nihil unquam negatum eſt, cui lachrymas ſollicita ſemper mater abſterſit. Denique, ut Terentius inquit;

Licentiâ omnes reddimur deteriores.

Ne itaque liberis fenestra ad nequitiam aperiamus, celandus eſt iis paternus animus: Nam

Fæptiſt. Mant.

Sit licet in natos facies auſtera parentum,

Æqua tamen ſemper mens eſt, & amica voluntas.

Ænium Græcum, quo tractatur durius, ſœlicius creſcit, ſic etiam
li-

liberi, quo habentur contentius, meliores sunt. Sed modus in omnibus servandus est, & (quod apprimè in vita est utile) ne quid nimis. Olim apud veteres, puer abs quopiam castigatus, si quere- lam ad patrem detulisset, turpe erat patri, si hoc audito non ite- rum filium emendasset. Si quidem; ex institutione majorum, ha- bebant hanc de se mutuo fiduciam, ut crederent, neminem esse, qui cujusquam liberis quicquam imperaret inhonesti. Sic omni- bus senioribus eadem erat auctoritas, quæ patribus :

Verba quis auderet coram Sene digna rubore

Ovid,

Dicere ? censuram longa senectæ dabat.

Prætercà (ut Juvenalis Satyra 14. testatur.)

Credebant hoc grande nefas, & morte piandum

Si juvenis vetulo non assurrexerat, & si


Barbato cuicumque puer ; licet ipse videret

Plura domi sarra, & majores glandis acervos :

Tam venerabile erat precedere quattuor annis.

Voluptatis præmium.

EMBLEMA XLVII.



*Cum coit, & dulci Veneris jacet ebria motu
 Vipera, contruncat insidiosa marem :
 Hoc Venus omnis habet, primo sua gaudia fundit,
 Postmodò sed stimulis corda fruentis agit.*

COMMENTARIUS.

Plinius Lib. 10. Cap. 62. inquit, Viperae marem, caput inserere in os feminae, quod illa voluptatis dulcedine abrodit. Confirmat & hoc Orus Apollo, in sacris suis sculpturis. Nihil autem aliud per hoc notamus, quam certissimam Voluptatis comitem esse Pœnitentiam, Boëtius Lib. 3. Met. 7.
Habet hoc Voluptas omnis

*Stimulus agit fruentes,
 Apiumque par volantum,
 Vbi grata mella fudit,
 Fugit & nimis tenaci
 Ferit ista corda morfu :*

Quam sententiam liberâ oratione sic locupletavit : Quid autem de corporis Voluptatibus loquar ? quarum appetitus quidem plenus est anxietatis, satietas verò pœnitentiæ. Quantos illæ morbos, quam intolerabiles dolores, quasi quendam fructum nequitiae, fruendum solent referre corporibus ? quarum motus quid habeat jucunditatis ignoro. Tristes verò esse Voluptatum exitus, quisquis reminisci volet libidinum suarum, intelliget : O pulchra & apposita verba ! Reverà enim sic est Voluptas, tunc cum maximè delectat, extingitur, nec multum loci habet, itaque citò implet, & post primum impetum marcer, Statimque (ut Homericum illud habet)

τὴν δ' αἶμα χάρμα καὶ ἄλγος ἔλε φρένα, id est,

Odys. T.

Lætitia huic mærorque simul præcordia cœpit : Lætitiam dico, sed falsam, veram enim scio Voluptati opponi, utpote quæ alta, & ex alto veniens : cum contrà Voluptas talis sit, quæ terrenis & fragilibus innititur, quæ adventitio læta est, quamque tum maximè, cum exultat, sollicita subit cogitatio. Ad quod alludens aliquis, dixit voluptatem ore suo mel gerere, corde fel, & in dorso anxios morsus. Quæ contraria simul esse, forte aliquis miretur ; quare Socratis fabulam, fidei faciendæ gratiâ hîc adducam : Quo tempore Saturno exacto, & cœlestibus regnis pulso, Iuppiter imperium constituere cœperat, ferunt coram eo adfuisse *Voluptatem & Dolorem*, cum gravissimis postulationibus, & criminibus, quibus se mutuò inessebant. Iuppiter ratus ex usu maximè esse & suo & Reipub. inimicitia & odia deleri, operam dedit, ut in gratiam litigantes redigeret ; sed frustra expertus omnia : tandem reluctantes adamantinâ quâdam catenâ, inter sese copulavit, ut quamvis inter se dissiderent, nihilominus necessariò simul, & unâ essent, manerentque perpetuò.

Plato in Phædone.

Hinc *Ita comparatum est in ætate hominum,*

Plaut. in Amph.

Ita Dis placitum, Voluptati ut Mæror comes consequatur.

Utroque itaque catendum est, quia qui unum, habet & alterum ; ubi enim uber, ibi & tuber, ubi mel, ibi fel. Et Apes idèò

Apul. Florid. L. 3.

pungunt.

Macrobi. lib. 1.
in somnium
Scip.

Plaut.


Ambros.

August. de
contrit. cor-
dis. Cap. 4.

pungunt, quia ubicunque dulce est, ibi & acidum invenies. Quod intelligentes prisca Romani, duas *Divas* semper colebant, *Angeroniam*, atque *Volupiam*, alteram ab Angoribus dictam, alteram à Voluptate. Et *Angeronia* simulachrum in Arâ *Volupia* fuit collocatum. Quo innuebant, extrema Gaudii possidere Mœrorem. Hæc cum veris veriora sint, quis non stultissimos illos vener eos nepotulos judicet; qui dum maximè suæ Helenæ inhiant, dum loca Ædilem metuentia adeunt, ut masculum illum spiritum, in febriculosa alicujus meretriculæ amplexibus, essent, tandem id referunt, ut hamum vorent: Quo suo malo, in consuetudinem adducto, impofterum catere non possunt. Nihil enim prodigæ satis est Voluptati, semper famem sui patitur. Ergo, ut globus in altum missus non sistitur; ita illi, ubi semel à rectis deerrarunt in vitia, à vitiis in prava, à pravis in præcipitia perveniunt. Quod Christianæ religionis vexilliferum Augustinû non latuit, cum ita exclamaret: O Voluptates quam faciles aditus habetis, dum suadetis, quam verò difficiles habetis exitus? Dum suadetis inungitis, sed postquam suaseritis, usque ad mortem animæ pungitis. Scitè olim sed malo suo edoctus, Lyfimachus dicebat; Dii Boni quam brevis Voluptatis causâ, quantam deposui Voluptatem? Coactus enim fuerat se ob sitim dare Schytis, ut frigidam aquam biberet quâ auream illam Libertatem vendiderat. O utinam & multi id cogitent, dum perpetuum illud pœnitere, tum cito periturâ Voluptate emunt; quæ tamen, si ad illud conferatur nulla est. Quid enim istud me juvet, si paulisper lucem videam in arctiorem mox carcerem compingendus? Irritat hæc externa delectatio in nobis fluctum illum cupidinum, non aufert. Quapropter (ut monet Aristoteles) Voluptatem non venientem, sed abeuntem aspicientes, & latentem illam Syænis caudam, fallacem illum Sino-nem in oculis habentes, induremus animum, & blandimentis Voluptatum procul abstrahamus, ut majore illo animi gaudio, illâ *voluptate* fruamur; quam ubi adepti erimus, tum demum intelligemus, miserimos esse voluptuosos, & Voluptatem capiemus maximam: quod hâc Voluptate non capiamur.

In Alcumistas.

E M B L E M A XLVIII.



*Dum certis incerta sequor, rem prodigus omnem
Converti in fumos, & miseros cineres.*

COMMENTARIUS.

Alcumistica, amabilis illa infania, certæ egestatis, & casti laboris comes, curiosis ingeniis familiaris, quantæ vanitatis sit, ex eo ipso facile apparet, quod polliceatur, quæ natura nullo modo pati nec attingere potest, dum rerum vertere species tentat, ac benedictum quendam Philosophorum (ut vocant) lapidem fabricare præsumit, quo, Midaæ instar, contacta omnia corpora, ilicò in aurum, argentumve permurentur. Quin etiam è summis, inaccessisque cœlis, quintam quandam essentiam depromere nititur, quæ præter infi-

T

nitas

nitas opes, etiam reviviscentiam adfert. Sed quod maxime ridiculum, quibus ipsi spondent aurum, ab his aurum petunt.

Nugipolyloquides (ut ait Comicus) *argenti extenebronides*,

Technipolyloquides, *nummorum expalponides*,

Quod semel arripides, nunquam possea eripides.

Fingunt sibi nescio quæ monstra, Leonem viridem, Cervum fugitivum, Aquilam volantem, Stultum saltantem, Draconem caudam suam vorantem, Bufonem inflatum, & similes innumeras nugas. Hæc illorum mysteria sunt, his ducibus opus peragitur. Emuntur ollæ, vitra, carbones, metalla, & succi in abditis fornacibus recoquuntur, ut ex argento vivo, concretum & ductile, ad cudendam monetam efficiatur, & admirabilem abditarum naturæ rerum massam conflando, purum inde aurum efficiatur. Cum verò jam expectatur fœtus aureus, ne mica quidem auri provenit, ea tamen ipsis perstat infania, ut quo plus impensum est, eo minus libeat desistere.

Ovid, lib. 1.
de art.

Pers.

Sic ne perdiderit, non cessat perdere lufor,

Et revocat cupidas alea sæpè manus.

Tandem deceptus & expses

Ne quicquam fundo suspirat nummus in imo.

Miser Alcumista, qui jam ætatem omnem inter experimenta consumpsit, mercibus, patrimoniisque omnibus decoctis, & in cinerem fumumque conversis, annosus, pannosus, esuriens, semper sulfur olens, &, ex assiduâ argenti-vivi contrectatione, paralyticus, nihil præter pœnitere, gemere & dolere sibi reportat, utpote cujus errori damnum, damno labor, & labori pudor accreverit. Sunt tamen quibus, nihil præ mirabili arte æstimantibus, est etiam quædam paupertatis, in hoc studio, suavitas, ne gratis in Naturæ secreta pervaserint. Ridiculus hic morbus etiam Poëtam Augurellum tenuit, qui videns, eam curam inani voto susceptam, ingenium ab irritâ spe, ad faciendanda carmina convertit. In hunc sensum Latomus;

Refert P. u-
lus Iovius
in Elegiis.

Iocum vetustum refricans Aurelius,

Dum sperat aurum, luditur carbonibus,

Adbuc Leoni scribit auri prodigo,


Iam certus artis, nempe Chrysopæiam,

Vt quod minus collegit è carbonibus

Avidi Leonis eriperet è dentibus.

Bona conscientia in malis est secura.

E M B L E M A XLIX.



*Alcedo medio quieta ponto
Ova parturit, incubansque pullos
Excludit teneros, fovetque, donec
Nisus insolitos sciant volandi :
Que is mens integra, criminisq; pura est,
Exsultant medios vel inter hostes ;
Ex sese quia gaudium perenne
Habent, atque animi vigentis arcet,
Ad quam non datur hostibus venire.*

COMMENTARIUS.

vid. Plin.
lib. 10. c. p.
32.

Alciones, five Alcedines, in medio mari nidum faciunt, idque mediâ Hyeme, quo tempore maximè ventorum impetu mare tempestuosum est. Sed tum venti se remittunt, cum alcedo septem diebus incubat, excludit enim pullos totidem, qui cum cibum appetunt, septem alios dies, ad pullorum incrementum, minutissimo animali elargitur Deus. Omnes itaque, qui se mari committunt, id observant, eosque dies Alcionios vocant.

Plautus, *Aicionia nunc apud forum sunt;*
ubi de Justitio loquitur. Et in Pænulo,

*Iam hercle tu peristi, nisi illam mihi tam tranquillam facis,
Quam mare est olim, cum ibi Alcedo pullos educit suos.*

His autem avibus simillima est bona conscientia, quæ pari fastigio, eodemque vultu, inter amicos & hostes suos stat. Non secus ac in medio mari edita, ac altissimis defixa radicibus rupes, cujus summa fluctus ne attingunt quidem, infima sic verberant, non ut eam commoveant, sed ut ipsi frangantur. Narrant Poëtæ, Olympi cacumen semper esse quietum, propterea, quod altius sit, quam ut eò vis ventorum, tempestatumque perveniat: sic etiam hæc est sublimior, & excelsior, quam ut istas iniquissimorum hominum calumnias sentiat. Socratis animum triginta Tyranni infringere non potuerunt. Papinianus interrito vultu à Tyranno, cæsus est, cujus securis nobis securitatem imprimere debet, pro justitia benè moriendi. Regulus luminibus in perpetuam vigiliam expansis, periculis undique imminetibus, catenis circumfrenentibus, non abscondidit virtutem, sed magis magisque exeruit, suosque gemitus sub tortore devoravit,

*Regium hoc ipsum putans
Adversa capere, quoque sit dubius magis,
Status, & cadentis imperi moles labet,
Hoc stare presso certius fortem gradu:
Haud est virile, terga Fortuna dare.*

Constituerunt, scilicet, hi viri, cum Antisthene, muros in animi suisensibus, nullâ vi, nullis machinis expugnabiles. Habebant
altum

altum illud gaudium, & ex alto veniens, quietem nimirum mentis, & conscientiæ in tuto collocatæ; quæ non aliter ac Nepentes, ab Homero prædicata, addita poculis, omnem convivii tristitiam discutit; ita omnem, malorum sollicitudinem illis abolebat. Et certe necessario sequitur, Ubicunque pura mens est, ibi Deus est, ubicunque Deus est, ibi paradísus, ibi cœlum, ibi fælicitas vera; ubi hæc est, ibi verum gaudium.

*Hic murus athenus esto
Nil conscire sibi, nullâ pallefcere culpâ.*

Horat,

T 3

Amor

Amor filiorum.

EMBLEMA L.



*Cum videt insontes Pelicanus fervere pullos
 Ignibus, ardentibus insilit ipse rogos,
 Et pius ad pulchram mavult contendere mortem,
 Prolibus infelix quàm superesse suis.
 Non te sparsa pudet natorum sanguine mater
 Ingenium brutis mitius esse feris?*

COMMENTARIUS.

ORus Apollo in Sacris suis Sculpturis refert, Pelicanum,
 cum cæterarum avium more possit in editioribus locis
 ova reponere, id tamen non facere, sed potius defossâ
 terrâ,

terrâ, pullos ibi collocare. Quod ubi deprehenderent homines, locum illum arido bovis stercore circumlinunt, cui & ignem subji-
ciant: Pelicanus autem conspecto fumo, dum alis suis vult ignem
extinguere, è contrario earum agitatione accendit, quo quum
conflagrent ejus alæ, facile in ignem decedit, & ab aucupibus ca-
pitur. Quam ob causam, non consentaneum existimarunt Sacer-
dotes, eo vesci, cum omnino pro pullis in discrimen sese conji-
ciat. Adde quod hæc avis centum & viginti diebus quibus in pro-
lis educatione detinetur, nunquam ad prædam longius provoler,
uni illi curæ assiduo intenta, ne pullos deferat. Quod si nihil aliud
quicquam suggeratur occurratve; quod iis in alimentum paret,
ipse suis femoribus, rostro vellicatis sanguinem ciet, quem pullis
exugendum præbet. Monet nos hæc volucris, natos, qui pars no-
stri & sanguis sunt, omni curâ fovere, ac diligere. Jubet hoc jus il-
lud naturale, quod natura omnia animantia docuit: Inst. Lib. r.
Tit. 2. §. 1. Quanta cura ac sedulitate Ciconia pullos nutrit? Del-
phinus, conspecto hostili pisce, prolem suam ingurgitat, deinde
extrâ periculi aleam positus, eam reddit ex alvo. Palumbes sæ-
vientie frigore nidificans, & partum excludens, sibi plumas haud
gravatur evellere, ut parvuli mollius cubent, quo fit, ut ipsa sæpè
mater gelu contabescat. Omnia denique animalia pro suo partu
ita propugnant, ut nullos impetus, nullos ictus reformident. At
proh dolor, immane quantum sæpè homines rationales, ab hac
brutorum irrationalium natura degenerant? Dum sua pignora re-
linquere non verentur, & in prædam canibus objicere non ex-
horrent? Dum sua ipsius viscera eviscerant, dum nascentium
animas diabolicis suis medicamentis disturbant? dum fructum
hominis, qui in semine est, hominem denique ipsum perdunt?
Hæc monstra Ovid. sic infectatur;

Quæ prima instituit teneros avellere sætus,

Militiâ fuerat digna perire suâ.

Si mors antiquis placuisset matribus olim,

Genus hominum vitio deperitura fuit.

Quid plenam fraudas vitem crescentibus uvis?

Pomaque crudeli vellis acerba manu?

Sponte fluent matura suâ: sine crescere nata,

Est pretium parva non leve vita mora.

Vestra:

Vestra quid effoditis subjectis viscera telis?

Et nondem natis dira venena datis?

Colchida dispersam puerorum sanguine culpant,

Atque sua casum matre queruntur Ityn;

Discite quis Tereus, quis vos irritet Iason

Figere sollicitâ corpora vestra manu?

Hac neque in Armenis Tigres fecere latebris;


Perdere nec fœtus ausa Leana suos.

Perdere? Immo pueros sæpe à matre relictos ipsæ Leænæ, Tigres, & Lupæ uberibus suis aluerunt; cujus rei testes sunt historiæ, cum Græcorum, tum etiam Romanorum; Nullum denique animantum genus est, quod non alat suos fœtus; & homines suos abiciunt? Quid obsecro crudelius iis, qui prolem educationis rædio exponunt? An non in tales competere videtur Græcorum etymologia, qui μητρε dici putant à μη τηρεν, id est, à non servando? Reclamat certè in os ipsa Natura, quæ fœminis duos turgidos illos in pectore fonticulos dedit, sponte suâ post patrum fluentes, ut in lucem editos fœtus, delectabili illo succo alant. Monet & hoc terra, quæ ideo omnium parens dicitur, non quod gignat tantum, sed quod nutriet etiam ea, quæ genuit. Quia autem hæc naturæ Lex, à sceleratis hominibus aliquandò violatur, ideo jura civilia eam confirmarunt, vide L. 5. Si quis à liberis. ff. de Agnoscendis Liberis, L. Si competenti judici, C. de Alend. Liberis.

Justa

Iusta ultio.

E M B L E M A L I .



*Vipera quæ coiens occiderat ante maritum ,
 A sobole hoc idem supplicium patitur :
 Tarda licet Nemesis pœnam differre videtur ,
 Attamen à tergo dura flagella quatit .*

C O M M E N T A R I U S .

Diximus Emblemate XLVII. Viperam coeuntem, maris caput, ori suo insertum, amputare, quod nefas proles tandem ulciscitur, dum, matris alvum perrodens, erumpit. Docet autem nos hoc Emblemata differri, aliquando pœnom, non auferri, nec crimen quenquam in pectore gestare, qui non idem Nemesein tergo. Sequitur enim illa Dea silenter

& lento pede. Plutarchus in Problematis scribit, Tyriis fuisse morem, ut Deorum statuis vincula injicerent; quod Ænigma innuit, Deos ad scelerum ultionem lente quidem procedere, sed tamen aliquando de malefactis pœnam sumere, vel inopinato. Horatius,

Raro antecedentem scelestum

Deseruit pede pœna claudo.

Lib. 1

Vall. Max. Lento quidem gradu ira divina ad vindictam procedit, sed tarditatem supplicii gravitate pœnæ compenfat. Vidit hoc Homerus, quamvis oculis captus, cum inquit,

liad. 8.

Quamquam non punit Iuppiter ilicò fontem,

At faciet tamen, & lueris sua crimina magno.

Theocritus in Idyll. decimo,

Εὕρε θεὸς τὸ ἀλιτρεῖν, ἔχδς πάλαι ὦν ἐπιθύμεις. id est,

Invenit Deus impium, habes quæ olim cupiebas.

Enimvero consueverunt Dii immortales quo gravius homines ex rerum commutatione doleant, quos pro sceleribus ulcisci volunt, his secundiores interdum res, & diuturniorem impunitatem concedere, ita tamen ut tandem τὸ ἀλιτρεῖν inveniant;

Claud.

—— *Tolluntur in altum*

Ut lapsu graviore ruant.

Lipſin Conſt.

Quod quamquam aliquando non, aut tardius fieri videatur, tamen non fit, & idcirco de eo non querendum est. Quis tragœdiam ſi ſpectet, indignetur, ſi Atreus ille, aut Thyeſtes in primo alterove actu ſublimes per ſcœnam, & elati pauliſper incedant? Regnent, iminentur, imperent, Scœna hæc mox ſanguine diſſluet, & volvantur in eâ purpureæ aureæque veſtes.

—— *Improba nunquam*

Spes lataſta diu eſt.

Semper enim impii aut internè, aut externè puniuntur. Internè, quia pœnam ſemper antè oculos verſari putant, qui peccaverunt; eumque non in publico tribunali, ſed in arcano peſtoris ſinu experiuntur. Hic eos inſectantur furix, non ardentibus facibus, ut in fabulis eſt, ſed angore conſcientiæ;

—— *Habitant ſub peſtore manes*

Vltricesque Deæ

Et Prima eſt hæc ultio, quod ſe


Judice nocens absolvitur improba quamvis

Gratia fallaci Prætoris viceris urnâ

Verissimè Plato ἀνθρώπου τὸ ἀδίκιον ἢ ἡμωσίαν, id est, cognatum, immò innatum omni sceleri sceleris supplicium. Iussisti Domine Lib. I. Cor. (inquit Augustinus) & sic est, ut pœna sit omnis inordinatus anifess.
mus. Quis autem eam solum punitionem censeat, quæ incurrit in oculos, quam corpusculum hoc subit? Non est; Externa Lip. in Conf.
ista omnia leviter nec in longum nos angunt. Ut gravius ægrotare judicantur, qui tæbe aut marcore laborant, quàm qui inflammatione aliquâ, aut feбри, & tamen hæc magis apparent: sic in graviore pœna improbi, qui lento illo passu ducuntur ad æternam illam mortem. Novi sunt Titii, jecur renascens semper suæ tortrici aliti suppeditant, quod ita feritur, ut sentiant se mori: O miserum qui huic judici traditur; qui toties moritur, & non moritur.

Sapiens in omnibus providus.

ENBLEMA LII.



*Ingredior lentè, & prætenfis cornibus omne
Exploro; Sapiens providet id quod agit.*

COMMENTARIUS.

DOcemur hoc Emblemate in omnibus esse providi, & lentè festinare; quod innuit hæc Limax, quæ quamvis tarda sit, tamen ad optatam suam metam fœliciter sæpissimè pervenit. Veteres olim Delphinum anchoram complectentem depingebant, quo hieroglyphico significabant in consultando moram, in conficiendo celeritatem oportere dominari, alterumque altero debere temperari, quò videlicet ejusmodi quidam animi habitus existat, qualem Plato con-
flari

flari putat, ex Musicâ Gymnasticâque, si pariter exerçantur. Sciebant scilicet divini viri illud Sophoclis verissimum,

Periculosam esse prapropere sapientiam,

In Oedipi
Tyranno.

Et eum qui plus satis festinat initio, serius ad finem pervenire. Canis dum nimium properat, cæcos ejicit catulos. Prudenter itaque Terentius,

Vide ne nimium calidum hoc sit modo.

Potro quam singularis virtus sit temperata illa maturitas, probavit cunctator ille Fabius, qui Romanam cunctanda restituit rem. Doctus ni fallor illud Mimi; Diu, scilicet, apparandum esse bellum, ut vincas celerius Ammianus de Constantino: Hinc & deinde nec itinera, nec flumina transire posse, sine præsidio putans, erat providus, & cunctator, quod præcipuum bonum in magnis ductoribus, opem ferre solet exercitibus & salutem. Et Pallas Iliad. æ. à tergo adstat Achilli, jamque manum admoventem gladio coercet; docens violentos illos animi motus comprimendos esse, alioqui talis festinationis comites esse errorem & pœnitentiam. Testatur hoc Græcus ille versiculus;

Περὶ τὰ πλοῖα ἐστὶν αἰτία κακῶν, id est,

Multis malorum est causa præcipitantia. Scivit hoc versipellis ille Ulysses, eum contra Ajacem hæc efferret,

— *Tibi dextera bello*

Vtilis, ingenium est quod eget moderamine nostro,

Tu vires sine mente geris, mihi cura futuri est,

Tu pugnare potes, pugnandi tempore mecum

Eligit Atrides, tu tantum corpore prodes,

Nos animo;

Seneca; Si prudens fuerit animus tuus, tribus temporibus dispensetur; præterita cogita, præsentia ordina, futura prævide. Ergo, ut dicitur, omnia pedetentim perficienda sunt. Terentius in Phormione;

Dii bene vortant quod agis, pedetentim tamen.

Quoniam (ut Plautus in Perfa)

Si quam rem accures sobrie ac frugaliter,


Solet illa recte sub manu succedere, atque ad epol

Ferre ut quisque rem accurrat suam, sic ei procredit.

Metamorph.
Lib. 13.

In Adulatores.

EMBLEMATA LIII.



*Dum mentitur avem, dum Vespertilio murem,
 Mustelas geminas callida ludificat:
 Doctus Adulator pro vento carbasa vertens,
 Temporibus servit sedulus usque suis.*

I lia. lib. 10.
 cap. 61.

Vespertilio tale est animal, quod an avis, an mus sit, non abs re dubites; Sola enim volucrum parit, eique uni membraceæ sunt pinnæ; eadem sola lacte nutrit pullos, ubera iis admovens. Hoc animal cum tale sit, Mustelas, domesticis animalibus, iisque alitibus infestissimæ sunt, & ad internecionum usque persequuntur, ludit, dum nunc
 avis,

avis, nunc mus videtur. Qua de causâ Pierius in hieroglyphicis suis refert, Ægyptios eam solere adulatori æquiparare, qui, quemadmodum aqua præterfluens nullo certo colore est, sed semper colorem subjecti soli refert: ita etiam sui dissimilis est, pro re nata sese adaptans. Gubernatores navium pro vento sinus suos obliquant: Idem ab adulatoribus fit,

Vicunque in alto ventus est, exin velum vortitur.

Horum ingenia ita describit Terent.

*Est genus hominum qui esse primos sese omnium rerum volunt,
Nec sunt, hos confector, hisce ego non paro me ut arrideant,
Sed his ultro arrideo, & eorum ingenia admiror simul,
Quicquid dicunt laudo, id rursus si negant, laudo id quoque,
Negat quis? nego, ait, ajo:
Postremo imperavi egomet mihi
Omnia assentari: is questus nunc est multò uberrimus.*

Hæc homines incertissimi, quos bonæ mentis pœnitet, faciunt, ut caput unctius referant, ut emungant argento heros.

*Cum (enim) odor culinae dimissis pedibus in cælum evolat, Plaut.
Parasiti oculis venaturam faciunt, atque aucupium naso suo,
Semperque eis decempes umbra est gratissima.*

Idem in Captivis duobus,

*Cum res (verò) prolata sunt, cum rus homines eunt,
Simul prolata res sunt nostris dentibus,
Quasi cum caletur, cochlea in occulto latent,
Suo sibi succo vivunt, ros si non cadit;
Idem parasiti rebus prolatis latent,
In occulto miseri visitant succo suo.*

De horum arte sic Seneca Epist. XLV. Adulatio quam similis est amicitia? non imitatur tantum illam, verum etiam vincit, & præterit; apertis & propitiis auribus recipitur; in præcordia ima descendit; eo ipso gratiosa, quo lædit; Unde eorum sermonem non temere quidam *πνεύρων τῶν φρενῶν* appellavit. Bias interrogatus quod esset animal omnium maxime noxium: Si de feris, inquit, percunctaris, Tyrannus; si de mitibus, adulator. Constantinus Imperator assentatores, tineas, soricesq; imperii nuncupabat; quos si

Prin-

Iliad. r.

Principes suâ aulâ ejicerent, næ illi Augiæ stabulum purgarent & cum Hercule monstrorum domitores dici possent. Satius esse dicebat Antisthenes εἰς κέρεικας ἢ κόλακας, id est, in corvos quàm adulatores incidere; nam corvi non comedunt nisi mortuos, adulatores adhuc viventes excoriant. Quare ille apud Homerum sic ait: Exosus ille mihi velut inferni portæ, qui aliud quidem occultum habet in mentibus, aliud verò ore profert;

Qui composita dicta pectore evoluit suo,

Quæ cum componas, dicta factis discrepant.

Persii adhortatione hæc concludo,


*Vos O patricius sanguis, quos vivere par est
Occipiti caco, postica occurrite sanna.*

Et ibidem

———— *Examenque improbum in illâ
Castiges trutinâ. Nec te quasiveris extrâ.*

Exitus acta probat.

E M B L E M A L I V.



*Distento petulans lac quod dedit ubere Capra,
 Calcibus invertens mulctra refundit humi:
 Sunt similes Capræ, qui turpi crimine vitæ
 Postmodò denigrant quæ benè cœpta prius.*

COMMENTARIUS.

SI extremus ille actus in fabulis poscit palmam, & honorificum illud Plaudere meretur, certè vitæ in honore peractæ hoc debetur quàm maximè; si scilicet in fine, qui (secundum Sacras literas) coronatur, non inclinet, sed æquabili cursu ad candidam illam metam decurrat. Paucis verò raro cœli favore hoc concessum est, nisi

— *Quos æquus amavit*

Iuppiter, aut ardens evexit ad æthera Virtus.

Multorum quidem fervida vota ad laudem & gloriam, ad confu-
lares fasces pleno gradu contendunt; hæc autem ubi adepti sunt,
egregius ille impetus detepescit, naturam ac virtutem securi dedi-
scunt, nec debitum sibi gloriæ præmium ulterius expectant. Qui
certè non aliter mihi facere videntur, quàm qui ex alto aliquo pu-
teo aquam hauriunt, ubi magno molimine situlam propè ad os
putei evexerunt, si paulum modò funem laxaverint, it situla, &
deorsum concitatissimo lapsu provolvitur, sic illis de antea acta vi-
tâ plurimum remittentibus, pessum it quicquid adepti erant,

Longique perit labor irritus anni.

Hujus autem rei duas statuo causas; Primam, ingenium huma-
num, quod à labore proclive est ad otium; Secundam, Honorem
& potentiam, quæ sæpè impotentiam creant, & à veteri illâ viâ &
vitâ seducunt. Sicut cæli inferiores à supèro illo abripiuntur, &
quamquam contranitentes tamen obsecundant: sic infirmitas
humana plerumque ab istis. Privatis hominibus omissis, publicos
tantum in medium adducam. Testis in re Romanâ Nero, qui
hoc Trajani elogium de sese meruit; Omnes etiam optimos
Principes, longè à quinquennio Neronis abesse: hic ut magnus
initio Princeps, ita magnum postea monstrum fuit; dum matri-
cida, fratricida, cinædus, citharædus, auriga, histrio, & incendia-
rius, imperium Romanum miseris modis divexaret. Quid Lucu-
lus? egregius hercle imperator, & quo meliores haud multos in-
venias, tamen deliciis & luxu universum decus & nominis sui lu-
men extinxit; ita ut non hominem, sed divitias peccasse dicas.
Huic annumerari potest Metellus Pius, qui cætero vitæ tempore
continentissimus, ad extremum jam senex, in Hispaniâ Consul,
fædis indulsit voluptatibus, taleque morum passus est deliquium,
ut si quis omnem vitam ejus, cum attentiore comparatione apud
animum perpendere velit, duos in uno homine Metellos fuisse
crediderit, eximium adolescentem, & senem turpissimum. Tan-
tæ scilicet virtutis est, cum fœlicitate luctari; tantæ fœlicitatis à
fœlicitate non vinci.

Justè fiunt quæ à Deo.

E M B L E M A L F .



*Cur Iovis adsestrix Themis est ? quod iusta putanda
Quæ Divina Dei mens rata cunque velit.*

COMMENTARIUS.

Veteres ideò Jovi Themis affidere volebant, quod, quicquid faceret, id eum iuste facere crederent. Fuerunt tamen quidam, qui aut Deos nullos esse asserabant, aut de iustitiâ eorum dubitabant; & sic quos non capiebant, carpebant: cum scilicet malis benè, bonis autem malè esse sæpissimè animadverterent. Tragicus

Τολμῶ κατὰ πᾶν, μὴ πῦρ ἐκ εἰσὶ θεοί
κακοὶ γὰρ εὐτυχῶντες ἀπολήττισί με.

id est; Audeo profari, sunt ne, vel regnant Dei ?

Namque improborum me attonat felicitas.

Lucianus, ἐστὶ τίς θεός, ἢ ἀδράσῃα ἢ τὰ τοιαῦτα ὀρεῖ; Et Timon apud eundem, ad Jovem; Quid enim faciat? ubi tu perinde ac sub mandragorâ stertis, qui neque pejerantes exaudias, neque eorum, qui flagitia committunt, respectum geras? Diogenes Cynicus etiam dixit, Harpalum, qui temporibus illis prædo felix habebatur, contra Deos testimonium dicere, quòd in illâ Fortunâ tam diu viveret. Claudianus quoque hîc graviter dubitat;

In R. finium.

*Sape mihi dubiam traxit sententia mentem
Curarent superi terras, an nullus inesset
Rector, & incerto fluerent mortalia casu;
Nam quum dispositi quæsissem fœdera mundi
Præscriptosque maris fines, annique meatus,
Et lucis noctisque vices, tunc omnia rebar
Consilio firmata Dei.*

Addit,

*Sed cum res hominum tantâ caligine volvi
Aspicerem, latosque diu florere nocentes,
Vexarique pios, rursus labefacta cadebat
Religio:*

Tandem tamen ad saniozem mentem redit, cum inquit,

*Abstulit hunc tandem Ruffini pœna tumultum,
Absolvitque Deos; Iam non ad culmina rerum
Injustos crevisse queror; tolluntur in altum
Vt lapsu graviore ruant.*

Boëtius etiam hoc proponit Lib. I. Metro v. sed huic etiam Philosophia consolatrix aptissimè respondet Lib. I. Prosa VI. & Lib. IV. Prosa II. Homines scilicet rerum fines ignorare, ideoque scelestos & nefarios, potentes fœlicesque arbitrari, cum contrâ, si personata illa fœlicitas detegatur, infœlicissimi apparerent. Undique enim terror & minæ illos circumfremunt, ubique suos manes patiuntur,

Occultum quatiente animo tortore flagellum.

Videntur quidem lascivire, videntur gaudere, sed videntur tantum; idque ad tempus; Deum enim ultrix necessitas semper & ubique comitatur, eorum, qui à sacra Lege discesserunt, vindex futura. Quam vindictam, quia meruerunt, semper expectant. Alteram dubitationem, quare scilicet boni severius sæpè habeantur,

tur, optimè tollit Seneca, qui sic ait; Inter bonos viros & Deum amicitia est, conciliante virtute; amicitiam dico? immò etiam necessitudo & similitudo, quoniam quidem bonus, ipso tempore à Deo tantum differt. Discipulus ejus, æmulatorque ac vera progenies est, quam parens ille magnificus, virtutum non lenis exactor, sicuti severi patres, durius educat. Itaque cum bonos viros exaceri, malos lascivire vides, cogita filiorum nos modestiâ delectari, vernularum licentiâ illos disciplina tristiori contineri, horum ali audaciam. In eundem sensum sic Lactantius Lib. v. Cap. xxi. Deus homines pro liberis habet, sed corruptos ac vitiosos luxuriosè ac delicatè patitur vivere, quia non putat emendatione suâ dignos. Ideoque temporalia bona, non solum bonis dat, ne putent mali propter ea Deum colendum. Rursus si malis solis auferrentur, ea sola putaretur esse pœna. Homerus,

Iuppiter emetitur opes mortalibus, ipsi

Sic visum ut fuerit cuicumque bonove malove.

Fingamus itaque Deum dicere: Quid habetis, quod de me queri possitis, vos quibus recta placuerunt? Aliis bona falsa circumdedi, auro illos, argento & ebore ornavi; Intus boni nihil est. Vestra sola solida & sincera est fœlicitas. Jam ad malorum pœnam quod attinet, non illos præterit, sed differt, at cum sænore soluturos. Quia nemo unquam supremo huic creditori decoquit: Atque hæc de Deo summè justo. Quoniam autem, de eo etiam vera dicere periculosum est, terram legimus, similes aquaticæ testudini, quæ dum fretum tranare cupit, stupore cogitatus obsidetur. Euclides olim interrogatus multa de Diis, percommodè respondit: Cæterea quidem nescio, illud scio, quod odere curiosos. Itaque definimus, certi si non statim, tandem tamen molere Deorum molas.

Lib. Cur
bon. viris
mala fiant.

Animus nobilitat.

EMBLEMA LVI.



*Parvus in astrigeram Scarabæus subvolat æthram,
 Nec timet armigero bellamovere Iovis,
 Nam quod iniqua illi robur Natura negavit,
 Hoc animi supplet nobilitate sui:
 Surgite degeneres, quid adhuc terrestria cordi?
 Surgite, vosque animis esse putate Deos.
 Spernit humum, longèque supra mortalia tendens,
 Se modò submittit mens generosa Deo.*

C O M M E N T A R I U S.

Scarabæus animal est ex insectorum genere; Græci *καὶ σκαρὰ* dicunt: Nascitur ex incrementis animantium, aspectu tetrum est, odore tetrius, sonitu terribilissimum. Huic animalculo tantum est audaciæ, tam heroica mentis vis, ut non dubitaverit, cum ave multo pugnacissimâ, Aquilâ scilicet, bellum suscipere, ipsamque Homericam muscam vincere. Cum enim aliquandò Scarabæus, ab Aquilâ gravi injuriâ esset affectus, omnes artes dolosque in pectus advocavit. Cum itaque bis terve Aquilæ ova è nido deturbasset, aquila in sinu Jovis ova sua reposuit, cumque necdum iræ Scarabæi satisfactum esset, ad ipsam Jovis arcem invictus subvolat. Pastillum in hunc usum è stercoribus paratum, in sinum illius demittit. Juppiter ut est sordium insolens, quippe in purissimâ mundi parte habitans, dum offensus terribilissimo odore, finem è sinu studet excutere, aquilæ ova dejicit imprudens, quæ ex alto delapsa perierunt. Monemur autem hâc fabulâ duo: Imprimis nullam hostem, quamvis vilissimum, contemnendum esse, nam & Leo minutarium avium cibus sit, &

Parva necat morsu spaciosum vipera taurum.

Sic Sartorius parvis initiis crevit, & cum antea sperneretur, postea à Metello, & Cn. Pompejo vix superari potuit. Spartacus Romanum imperium conquassavit. Viriatus ex pastore tandem ductus, Lusitaniam occupavit. Nemo denique facilius opprimitur, quàm qui nihil timet; & frequentissimum initium calamitatis est securitas. Alterum est quod Scarabæus nos monet; Neminem Vell. Paterc. quamvis vilissimis parentibus procreatum desperare debere, sed potius summâ vi, ad pulcherrima quæque contendere; patet enim omnibus honoris & gloriæ campus: ex hoc quisque quod cupit petat, & affectus sibi debeat. Neminem, facillima Diva, Virtus rejicit. Et omnes, si ad primam originem revocentur, à Diis sunt. Plato ait; Nullum Regem non ex servis esse oriundum, nullum non servum ex regibus omnia ista longa varietas miscet. Erigamus itaque animos, & quicquid in medio sordidi jacet, transiliamus, expectat nos in summo magna nobilitas. Audi Poëtam,

Seneca locus.

— *Exsurge, & te quoque dignum
 Inge Deo.*

Sobrie—

Sobrietate Venus superatur.

E M B L E M A LVII.



*Vipera jejunis hominum conspersa salivis
 Exspirat: medicis si sit habenda fides:
 Sic lasciva Caro, si traëtes durius illam,
 Concidet, & Mentis sub juga colla dabit.*

C O M M E N T A R I U S.

Lib. 28.
 Cap. 4.

Vipera salivâ jejuni hominis in fauces, & ad interiora penetrante, occiditur; Testes Plinius, Galenus *ἡ ΕΛΛΗΓΙΩΤΗΣ* tertio, Alexander Aphrodisius, Pierius in Serpente, & Lucret. Libro 4. de Natur. rerum:

*Est itaque ut serpens hominis contacta salivis
 Disperit, ac sese mandendo conficit ipsa.*

Nec

Nec secus recalcitrosus illud jumentum Caro, quod durius & jejunijs exceptum, domino suo & Rectori parer, mollius tractatum, plurimum ei exhibet negotii, (ut Virg. inquit)

Non audit habenas.

Idcirco nihil potest esse efficacius ad domandum illud, modico jejunio, cujus vi vitia carnis extinguenda sunt, non ipsa caro. Hujus observantia appropinquamus Deo, & resistentes Diabolo, vitia blanda superamus. Semper enim virtuti cibus jejunium fuit. Hinc procedunt castæ cogitationes, rationabiles voluntates, quibus carnis appetitus enecantur, Spiritus vigor renovatur. Audi Augustinum; Jejunium purgat mentem, sublevat sensum, carnem Spiritui subjicit, nebulas cordis dispargit, libidinum ardores extinguit; castitatis verò lumen accendit. Adde quòd

Parcis victibus impedita corda

Prud.

Infusum melius Deum receptent.

Contrà nihil sic inflammat corpora, & titillat membra genitalia, sicut immodicus cibus potusque, seminaria certissima voluptatis. Ait enim non falsus vates

Vt vino est accensa Venus.

Admonere solet Socrates, quod apud alios diceretur edere, aut convivari, id apud Atheniensis dici *ἐσθίσαι*; quâ voce dicebat nos admoneri, eo temperamento sumendum cibum, ut nec corpus, nec animus prægraveretur. Dicebat etiam multos in hoc vivere, ut ederent, biberentque, quibus (secundum Satyricum)

In solo vivendi causa palato est;

qui, ut Mathematici omnia centro ac spatio, ita omnem voluptatem ventre circumscribunt; se autem ob id edere & bibere dicebat, ut viveret; quòd his rebus non ad voluptatem, sed ad necessitatem uteretur. Sed plerumque cum salutis causæ sint, edere & bibere, adjungit se tanquam pedissequa; periculosa quædam jucunditas, quæ sub necessitatis causa sic latitat ut vix eam, nisi perfectus quisque, discernat. Nam dum solum debitum necessitas petit, voluptas explere desiderium flagitat, & hoc gula securius in præceptis ruit, quò sub honestiore pallio sese collegit. Hinc luxuries

Quæ sibi totos

αἷμα cibus
& addito
ne sacrina
justo gravior
imponetur
corpori.

Ponit apros, animal propter convivium natum,

Juvenal.
Satyr. 2.

quæ lixa, coxa, & bis terve condita sibi apparat, quæ tantas struices concinnat patinarias, cum tamen natura paucis sit contenta, &

Y

perin-

perinde si quid accipiat venter, perditurus quicquid acceperit. Ab his autem quid expectes præter molliem & libidines? Vegetius inquit; Corpus assuetum tunicæ, lorice onus non sustinet, caput opertum linteo, galeam recusat, mollem otio manum durus exasperat capulus: sic etiam corpus cibo potuque suffertum, pius respuit meditationes, pœnitentiæ duritiem, & severitatem non sustinet. Maximas denique Virtutes jacere necesse est Voluptate dominante.

Absti-

Abstinendum à potentioribus.

E M B L E M A L V I I I.



Conqueritur Sonipes longæ de pondere caudæ,
 Utque levet quemvis voce precante rogat,
 Dum rudis hanc tollit, ferratis calcibus ictus
 Concidit, & pretium triste laboris habet.
 In magnis non tuta fides, prælustria vites,
 Vive tibi, & paribus jungere te studeas:
 Nam miserum est tali socio se jungere, de quo,
 Si noceat, nunquam sit tibi posse queri.

C O M M E N T A R I U S.

QUàm lubricum, quantisque casibus obnoxium sit, cum magnis benè versari, hoc Emblemate adumbratur. Ad quod interpretandum, paucula hæc quæ adferam viro-
rum magnorum exempla dictaq; non minimū facient.

Vide Paul Iovium in Elogiis virorum doctior.

Polyb. lib. 7.

Polyb.

Expertus est hoc illustre illud Britanniae lumen Thomas Morus, qui dum Regis Henrici octavi, in repudiandâ uxore, scēmina (ut fertur) innocentissima, consilio subscribere noller, illud canitie venerandum caput securi submittere coactus fuit. Ita ut cum Arato dicere potuerit; O Cephale, hæc sunt præmia regalis amicitiae. Magno etiam stetit hæc Hermeæ, qui auctoritate plurimum in aulâ apud Antiochum valens, tandem in oculis Regis, ipso eo probante interemptus est. Quid de Sejano dicam? qui in tam flagranti gratia apud Tiberium fuit, ut pro Collega (si Tacito credimus) in imperio habitus sit, tandem tamen hoc reportavit, ut ultimo capitis supplicio plecteretur. Illudque Plutarchi verum esse comprobavit, nimirum ut Arithmeticorum calculi aliquandò valent multis millibus, aliquandò nihil: sic Regum amicos aliquandò quidvis posse, rursus mutata in fastidium gratia, nihil. Enimverò ille est Magnatum talium animus, omnia sibi ignoscit, potentiam suam licentia meretur, parvo temporis intervallo homines in exelso fastigio collocat, & eosdem rursus ad extremam miseriam redigit. Quemadmodū in vulnere prius apparet sanguis, quàm plaga, & quemadmodum prius emicat fulgur, quam tonitrus audiatur: ita apud Principes prius erumpit condemnatio, quàm probatio; & periit delatus, priusquam coarguatur; ita ut meritò dubites, periculosiorne sit charitas eorum, an odium; propè par malum, nisi quòd odiū fugat amor ille simulatus & fucatus detinet. Lucianus his sequentibus coloribus Aulam potentum depingit; Nempe, Vestibulum sublime, & inauratum, abruptum, lubricum ita at plerumque, qui se ad summum pervenisse putant, præcipientes cervice fracta dejiciantur. Intus opulentiae, ostentatio, spes fallax, ambitio, æmulatio, invidia, derectatio, fumi, adulatores multæ manus, pauca corda, crapula, luxus, corruptiones, avaritia, eaque omnia speciosis fucis teguntur. Denique ut paucis dicam, Aulica vita, splendida miseria. Hæc cum ita sese habeant, benè me hercules sibi prospiciunt, qui procul à turbida aula

aula fugientes, & ut Diogenes dicebat, Πόρ' ῥ' ὦ Διός τε καὶ κεραυνῶ
id est, procul à Iove & à fulmine, intrà pelliculam suā sese conti-
nent; illud Adagium altè animo suo imprimentes, λάτρε βιώσας
quod Horatius sic expressit,

Audi etiam querentum Senecam in Octavia,

Nec vixit malè qui vivens moriensque fefellit.

Monet & hoc Ovidius, sed nimia credulitate, quæ ab Apulejo de-
ceptionum mater dicitur, illusit. Hæc autem ejus verba sunt ad
Amicum Eleg. 4. Trist. Lib. 3.

Vsibus edocto si quicquam credis amico,

Vive tibi, & longè nomina magna fuge.

Vive tibi, quantumque potes pralustria vita,

Savum pralustri fulmen ab arce venit,

&c.

Et paulò post,

Vive sine invidiâ, mollesque inglorius annos

Exige, amicitias & tibi junge pares.

Plautus in Euclione,

Venit hoc in mentem mihi Megadore, te esse hominem divitem,

Fastuosum, me item esse hominem pauperum pauperrimum,

Nunc si filiam locasim meam tibi, in mentem venit

Te bovem esse, & me esse asellum, ubi tecum conjunctus siem.

Vbi onus nequeam ferre pariter, jaceam ego asinus in luto,

Tu me bos magis haud respicias, notus quasi nunquam siem,

Et te utar iniquiore, & meus me ordo irrideat,

Neutri tibi habeam stabile stabulum, si quid divortii fuit;

Asini me mordicus scindant, boves incurserint cornibus,

Hoc magnum est periculum ab asinis ab boves transcendere.

Audi etiam querentem Senecam in Octavia,

Quid me potens Fortuna, fallaci mihi

Blandita vultu, sorte contentum meâ

Altè extulisti? gravius ut ruerem editâ.

Receptus arce, totque prospicerem metus?

Melius latebam procul ab invidia malis

Remotus inter Corsici rupes maris,

Vbi liber animus, & sui juris, mihi

Semper vacabat studia recolenti mea.

Hæc divinum illum virum pronuntiassè auguror cum jam aulicis
fluctibus immerfus, aureisque compedibus impeditus, instante &

urgente Nerone, se sibi vindicare non posset. Nimirum ut Indica Testudines, meridiano tempore blandiente, gaudent totæ dorso per tranquilla fluitare, donec oblitis sui, Solis calore siccetur cortex, ita ut mergi nequeant, & sic oportunæ venantium prædæ fiant; ita etiam Aulici, in splendidam illam miseriam se conjiciunt, unde postea se expedire nequeunt, sed perpetuò Protei esse coguntur; hæcque summa eorum est disciplina, observare tempora, ne quid intemptivius geratur, eaque non a bastris, cœlis, aut ephemeridibus captant, sed à vino, à prandio, à venatione, ab accubitu, dum exhilaratus est Principes,

Et quos alios aditus & tempore norunt.

Tum adsunt alloquuntur, adblandiantur, & arrident; sequentes illud Aristotelis, ad Calisthenem, consilium, hortantis, ut cum Rege aut nunquam, aut jucundissimè loqueretur. Si injuriæ eis inferantur, patienter ferre debent, ut quondam ille Senex, qui interrogatus, quomodò, rem in Aulâ rarissimam, Senectutem consecutus esset; responderet; Injurias ferendo, & gratias agendo. O miseram illam & tædiosam vitam, immò ut verius dicam, vitam non vitam. A naturâ libertate donati sunt, & ipse sese in voluntariam illam servitutem conjiciunt. Quod olim exprobatum Diogenes Aristoteli; dicens; Tu qui relicta Academiâ te aulis addixisti, cænas quandò Alexandro libet, at ego, quando Diogeni. Vindica itaque, vindica te in auream illam Libertatem, aut si eo loco res tuæ sint, ut ab aula divelli nequeas, salutariter hoc, ex sententia Alexandri Magni observabis; Nimirum ut in negotiis regalibus tanquam cum igne agas, à quo non abimus, ut illius, calore foveri nequeamus, neque ita appropinquamus, ut illius incendio conflagemus. Per me autem,

*Stet quicumque volet potens
Aula culmine lubrico,
Me dulcis saturet quies;
Obscuro positus loco
Leni persuar ocio.*

Sibi soli canere odiosum est.

EMBLEMA. LIX.



*Dum sibi concentus Aspendius edit, ubique
Spernitur, & populo displicet iste sonus:
Omnibus inservire decet; Prudentia vera est
Publica privatis præposuisse bonis.*

COMMENTARIUS.

Qui privati commodi impendiò studiosi sunt, ac ferè
quicquid rerum agunt, id omne ad domesticam refe-
runt utilitatem, ii proverbio, intus canere, & à Græcis,
Ἀσπένδιος κιθαρίσται, id est, Aspendii citharistæ dicuntur.

Quemadmodum enim hi tacita, levique modulatione, sinistra
contractis chordis, cantilenam peragebant, ita ut vox ad citha-
ræ

Eras. Chli. 28.
Cent. 1.

Lib. 3. Epist.
10.
Val. Max.

rædum duntaxat, aut proximum perveniret: sic hi homines sibi tantum nati domi suæ delitent, ac in occulto virtutem suam perdunt, in angulo & umbrâ culicis passus (ut ille dicebat) metientes: immemores illius Platonice sententiæ; quæ asserit non solum nos nobis natos esse, sed ortus nostri partem patriam, partem amicos sibi vindicare. Et certè quæ societas pulchrior, quo gravior, quàm quæ cum patriæ nostræ Repub. est. Nobilissimi civis est (inquit Cassiodorus) patriæ suæ augmenta cogitare. Olim apud Antiquos qui Curix limen intrabant, abjectâ privatâ caritate, publicam induebant: neglectis privatis commodis, publicis studebant. Testatur hoc Horatius Lib. 2. Ode XV. ubi primò queritur de temporis sui luxuriâ; cum inquit,

*Iam pauca aratro jugera regia
Moles relinquent, undique latius
Extenta visentur Lucrino
Stagna lacu, platanusque celebs
Evincit ulmos.*

Et paulò post antiquos mores citant, ait

*—— Non ita Romuli
Præscriptum, & intonsi Catonis
Auspicii, veterumque normâ,
Privatus illis census erat brevis,
Commune magnum nulla decempedis
Metata privatis opacam
Porticus excipiebat Arcton,
Nec fortuitum spernere cespitem
Leges sinebant, oppida publico
Sumptu jubentes, & Deorum
Templa novo decorare saxo.*

Hæc paulatim fati in pejus lapsa sunt, cœperuntque quidam Rempub. quæslui, & pro aurea messe habere, non secus ac quodam Stratocles & Dromoclidas tribunal suum. Quod (ut Cicero inquit) non modo turpe, sed sceleratum & nefarium. Cum è contrario nihil in rebus humanis præstantius, nihil in præclarior sit, quàm benè de patriâ suâ mereri. E publicis functionibus non locupletiores, sed laudatiores debemus discedere. In hoc demum verum & solidum decus positum est. Ideò tota mente in cura ea, cogitationeque persistendum est. Videmus ut illa


illa quæ supra nos sunt sidera, ætherem suum illustrent, pro radiis unaquæque suis: Terrestris quidam æther Respublica est, in quo tanquam sidera defixit nos homines Natura; exequamur munus nostrum, spargamus lumen, & irradiemus quisque pro fulgore nostro, indubitatè scientes, omnibus qui patriam conservaverint, adjuverint, auxerint, certum esse in cælo ac definitum locum, ubi beati sempiterno ævo fruuntur. Nihil enim Deo gratius, jucundiusque in terris est, quàm quod homines ipsius progenies parentis, quo ad ejus fieri possit, imitentur virtutem, atque probitatem, & derivatâ ad se parte aliquâ illius æternæ legis, ac gubernandæ Reip. rationis ac providentiæ, consilia sibi & conventus instituunt, coagmentent, ac vinculo illo Justitiæ copulent. Porro non is solum Reipub. præest qui candidatos extrahit, qui tuetur reos, & de pace belloque censet, sed etiam ille, qui juventutem à lineis aberrantem exhortatur; quales sunt Philosophi, qui in bonorum præceptorum inopiâ, virtutem ingerunt, qui ad avartitiam, aut luxuriam ruentes, retrahunt. Hi etsi domi morentur, in privato tamen publicum negotium gerunt. Quis Zenonem & Chrysippum minora egisse dicat, quâ si duxissent exercitus, gessissent honores, leges tulissent, quas non uni civitati, sed toto humano generi tulerunt? Nihil ergò est, quare tale otium non conveniat bono viro, per quod futura sæcula ordinet, nec apud paucos concionetur, sed apud omnes omnium gentium homines, qui que sunt, quique erunt. Dicebat Pythagoras vitam humanam esse similem Panegyri, hoc est, solemnium hominum conventui: ad quem alii conveniunt certaturi, alii negotiari, nonnulli spectatores modo futuri; ac cæteros quidem esse sollicitos omnes, solum spectatorem securum frui celebritate: hunc spectatorem ajebat esse Philosophum, qui non ob aliud in hoc mundi theatrum prodisset, quam ut naturas rerum, ac mores hominum contemplaretur, ac emendaret.

Cic. in
Somn. Scip.

Seneca de
vit. beata.

Sis memor utriusque fortunæ.

EMBLEMA LX.



Ecce triumphali Capitolia celsa petentem
 Axe Duce[m], ut reddat vota precesque Iovi;
 Præcedit captiva cohors victique Tyranni
 Victor, & audaces aureus urget equos,
 Hunc aliquis sequitur qui tintinnabula pulsans,
 Admonet à lætis rebus abesse fidem.
 Fortunam reverenter habe; nam vitrea tota est,
 Cumque nihil statuis firmitus esse, ruit.

COMMENTARIUS.

R Omani Imperatores, si quando de victis hostibus triumpharent, Capitolium eburneo curru intrabant, hunc præcedebant captivi pedibus constrictis, ipsi autem curru adhærebat flagellum, & à latere aliquis sequebatur cum tintinnabulo, admonens ipsum Imperatorem utriusque Fortunæ. Sciebant scilicet homines sapientissimi, facilius adversas res ferri moderatè, quam secundas prudenter. Illæ enim ob metum futuri sollicitos reddunt, hæc ob præteritam sælicitatem, impellunt ad rerum omnium contemptum.

Virgil. *Nescia mens hominum Fati, sortisque futura.*

Et servare modum rebus sublata secundis.

Hinc disputat Boëtius Lib. 2. Prof. 8. quæ fortuna præferenda sit. Hæc autem ejus sunt verba; Etenim plus reor hominibus adversam, quàm prosperam prodesse Fortunam; Illa enim specie sælicitatis cum videtur blanda, mentitur; hæc semper vera est, cum se instabilem mutatione demonstrat. Illa fallit, hæc instruit. Illa specie bonorum mendacium, fruentium mentes ligat, hæc cognitione fragilis sælicitatis, absolvit: Itaque illam videas ventosam, suique semper ignaram, hanc sobriam, succinctamque, ac ipsius adversitatis exercitatione prudentem. Et certè, quotocuique obtrigit, prosperâ sælicitate uti, & sapere? Raro cum Fortunâ bonâ, mens quoque bono homini data est.

Centum doctum hominum consilia hæc una devincit Dea.

Plaut.

Luxuriant animi rebus plerumque secundis,

Ovid.

Nec facile est equâ commoda mente pati.

Prudenter itaque Horatius Europam monet,

— *Benè ferre magnam*

Disce Fortunam.

Tunc consilia salutaria advocanda sunt, cum nobis alludit vitæ prosperitas; & ut Terentius docet,

Omnes cum secunda res sunt, tum maxime

In Thorm.

Meditari secum oportet, quo pacto adversam arumnam ferant.

Fecit hoc Philippus Macedo, cui cum nuncium esset allatum, multas res sæliciter & prospere gestas esse, (nam eodem tempore Tethrippa vicerat in Olympiis, & Parmenio Dardanenses prælio fuderat, & Olympias ipsi masculum sætum erat enixa)

porrectis in cælum manibus; O Fortuna, inquit, pro tot tantisque bonis, levi quopiam malo me affice. Epaminondas, cum alias solitus esset uncto corpore, hilarique vultu, prodire in publicum, postride ejus diei, quo feliciter pugnatum esset in Leuctris, processit squalidus ac summissus; Amicis autem sciscitantibus ecquid ei molesti evenisset; Nihil inquit, sed heri sensi me plus æquo mihi placuisse, ejus gaudii intemperantiam hodie castigo. Vir cordatissimus suspectam habebat nimiam Fortunæ indulgentiam, cuius ingenium esse sciebat, ut quibusexitium molitur, his prius novâ rerum prosperitate blandiatur. Idcirco

Seneca.

Quo Fortuna altius

Evexit, ac levavit humanas opes

Hoc se magis suppressere sapientem decet.

Quia (ut Menander inquit) διέλωσ πίπρουν αἱ λαμπρὰ τύχαι, id est, facile cadunt splendidæ Fortunæ. Adstipulatur Plautinus ille,

In Captivis.

Fortuna humana fingit, arctatque ut lubet,


Me qui liber fueram servum fecit, ex summo infimum,

Qui imperare insueveram, alterius imperio obsequor.

Suum

Suum cuique pulchrum.

E M B L E M A L X I.



*En ut Simia parvulos catellos
 Præfert omnibus, omniumque formas
 Deridet, neque si videt misella
 Nudam podice, clunibusque calvam:
 Nævos alterius videmus omnes
 Lynceis oculis, suosque talpa
 Quisque præterit, & videre non vult
 Quid in tergorè Manticæ geratur.*

COMMENTARIUS.

DE Simiis hæc Plinius Lib. 8. Cap. 53. Simiarum quoque genera hominis figuræ proxima. Caudis inter se distinguuntur. Mirâ solertiâ visco eas inungi, laqueisque calcari, imitatione venantium tradunt. Huic generi præcipua erga fœtum est affectio: Gestant catulos: quos mansuefactæ intrâ domos peperêre, omnibusque demonstrant, tractarique gaudent. Hæc ille: Ridiculis autem istis bestiis, plerique hominum adsimiles sunt, qui, omnia dicta factaque sua, sine rivali unica amant, ac venerantur, & nescio quomodo magis in aliis cernunt, quam in semetipsis, si quid delinquatur. Omnia sibi ignoscunt, nihil aliis remittunt. Hinc est quod magis propriâ, quàm alienâ adulatione pereant. Quis enim eorum sibi verum dicere audet? Exclamat Satyricus,

*Quam nemo in sese tentat descendere, nemo,
Sed præcedenti spectatur Mantica tergo.*

Cui non abludit illud Catulli ad Varum;

*Nimirum idem omnes fallimur, neque est quisquam
Quem non in aliquâ re videre Suffenum
Possis. Suus cuique attributus est error;
Sed non videmus Mantica quod in tergo est.*

Quid autem per Manticam indicetur, patet ex Apologo illo Æsopico, qui extat huiusmodi apud Stobæum: Finxit Æsopus omnes mortales binas habere manticas, hoc est peras: alteram ante pectus, alteram à scapulis tergoque pendentem. Sed in priorem, inquit, aliena vitia immittimus, in posteriorem nostra. Hanc humani ingenii cæcam φιλαντία, non solam Poëtarum litteræ, verùm etiam Euangelicæ notarunt, sic enim Matthæus; Quid vides festucam in oculo fratris tui, trabem autem in tuo non vides. Horat.

*Cum tua pervideas oculis mala lippus inunctis,
Cur in amicorum vitiis tam cernis acutum,
Quàm aut Aquila aut serpens Epidaurius?*

In nos itaque descendamus, & malorum domesticorum recordatione, desinamus arrogantius insectari vitam alienam. Vitium enim illud (ut Sencæa inquit) de quo querimur, si diligentius excusserimus, in sinu nostro inveniemus. Idcirco sapienter

sapienter olim, ut testatur Plato in Charmide, præ foribus templi Delphici, ab Amphyctionibus hæc inscripta viscebantur, *γνώθι σεαυτόν*, Nosce teipsum : In quo dicto, à Deo emisso, aut immisso, modestiæ mediocritatisque commendatio est, ne nobis vel majora, vel indigna sequamur. Nam hinc omnis vitæ pestis oritur, quod sibi quisque blandiatur, & quantum aliis præter æquum detrahit, tantum sibi philautiæ vitio præter meritum tribuat.

Hoc de celo descendisse, inquit Juvenal.

Patien-

Patienter ferendum, quod necesse est.

EMBLEMA LXII.



*Pendulus è laqueo Sturnus, dum rumpere tentat
Vincla, laceßitos implicat usque pedes :
Perfer & obdura; Patientia plurima mollit,
Quæ nequit humanum corrigere ingenium.*

COMMENTARIUS.

S Eneca quodam loco in Epistolis inquit ; Omnis ira, omnis indignatio crescit in dolorem & tormentum sui, nulumque jugum est, quod non arctius premat refractarium, quam sponte sequentem. Benè profecto ; Videmus enim in omnibus humanis casibus hoc fieri, quos patientia mollit, impatientia crudelissimè exasperat. Vulnus quid tam crudum facit,

facit, quam ferendi impatientia? pisces hamo pendentes si se moveant aut quassent magis intrlicantur, aves visco aut plagis deciptæ si se explicare tentent, magis implicantur & oblinuntur, dumque

Pugnando vincula tentant

Ovid.

Rumpere . pugnantes fortius illa tenent.

Quibus exemplis monemur, casus nobis à Deo supervenientes, patienter ferre. Ceitè,

Durum, sed levius fit patientiâ,

Horat. Ode
24. lib. 1.

Quicquid corrigere est nefas.

Ovid. in Metam. de Philemone & Baucide,

Paupertatemque ferendo.

Effecere levem.

Virg. *Superanda omnis Fortuna ferundo est.*

Seneca: Libenter feras quod necesse est, dolor enim patientiâ vincitur. Et huic cognatum illud Tragici,

Patiens quisquis novit famulum

In Herc.
Cetæo.

Regemque pati, vultusque suos

Variare potest, pepulit vires

Pondusque mali, nec servit inops

Casus animo qui tulit aquo;

Scivit hoc ille Mitio Terentianus, cum Demea quærit;

Placet tibi factum Mitio? Mit. Non, si queam

In Adelph.

Mutare: nunc quum nequeo: aquo animo fero.

Ita vita est hominum quasi cum ludas tesseris,

Si illud quod est maximè opus jactu non cadit

Illud quod cecidit forte id arte ut corrigas.

Et Grudio apud Plaut. in Mostellaria,

Quid tu vis fieri? non omnes possunt olere unguenta exotica

Si tu oles, neque superior quàm herus accumbere,

Neque tam facietis quàm tu vivis victibus,

Tu tibi istos habe turtures, pisces, aves.

Sine me alliato fungi Fortunas meas;

Tu Fortunatus es, ego miser: patiunda sunt.

Prudenter ille; quid enim aliud est a qualiter se in adversis gere- Val. Max.
re, quàm sævientem Fortunam, in adiutorium sui, pudore victâ,

Senecæ locus
in lib. de vita
beata Cap. 15.

convertere ? contrà, magna est inscitia, adversus stimulum calcitrare. Vincamus itaque ratione præsentem calamitatem; sciamusque non casu delatam nobis, sed quasi delegatum. Bonus miles fert vulnera, enumerat cicatrices, & transverberatus telis, moriens amat eum pro quo cadit. Quisquis autem plorat, & queritur imperata facere, cogitur; Sic & nos

Ducunt volentes fata, nolentes trahunt.

Quæ autem dementia est, potius trahi, quam duci? & hoc sacramentum adacti sumus; ferre mortalia, nec perturbari his, quæ evitare nostræ potestatis non est. In regno nati sumus. Deo parere, vera est libertas. Euripides


In Phœniss.

Δεῖ φέρειν τὰ τῶν θεῶν.

Invidia

Invidia sibi pœna.

EMBLEMA LXIII.



Livorem refugæ ferunt sagittæ
 Σοφοὶ consimilem; sagitta si quid
 Collimet solidi, resultat, & non
 Scopum sed miserum ferit magistrum:
 Sic & pectore masculo, & cachinnis
 Spretus invidus, in suum retorquet
 Sagittas animum, sibi que pœna est;
 Quisquis invidiâ movetur, ille
 Scopum præbuit invidi sagittis.

COMMENTARIUS.

Diviniſſimus Philoſophorum Seneca, in Libro de Tranquillitate animi, effectum invidiæ ſtatuit, diſplicere ſibi. Hoc oritur ab intemperie animi, & cupiditatibus timidis, aut parum proſperis, ubi aut non audent miſſerimi homines quantum concupiſcunt, aut non conſequentur, & in ſpem toti prominent, ſemper inſtabiles mobilesque. Quod neceſſe eſt accidere pendentibus. Omni vitâ pendent, & inhoneſta ſe ac difficilia docent, coguntque, & ubi ſine præmio labor eſt, torquet illos irritum dedecus; & dolent ſe prava ſtra voluiſſe. Tunc illos & pœnitentia cœpti tenet & incipiendi timor, ſurrepitque illa luſtatio animi, non invenientis exitum; quia nec cupiditatibus ſuis imperare, nec obſequi poſſunt: & cunctatio vitæ parum ſe explicantis, & inter deſtituta vora torpentis animi ſitus. Quæ omnia graviora ſunt, ubi odio inſœlicitatis operoſæ, ad otium profugerunt, & ſecreta ſtudia, quæ pati non poteſt animus, naturâ inquietus, parum ſcilicet in ſe ſolatorum habens: ideoque detractis oblectationibus, quas ipſæ occupationes diſcurrentibus præbent, domum, ſolitudinem, parietes non fert, invitus aſpicit ſe ſibi relictum. Hinc illud eſt tædium, & diſplacencia ſui, & nuſquam reſidentis animi volutatio, & otii ſui triſtis atque ægra patientia, unque ubi cauſas fateri puder, tormenta introrſus egit verecundia, in anguſto incluſæ cupiditates ſine exitu ſeiſpæ ſtrangulant. Inde mœror marcorque, & mille fluctus mentis incertæ, quam inchoata habent ſuſpenſam, deplorata triſtem: inde ille affectus otium ſuum deteſtantium, querentiumque nihil ſe habere quod agant, & alienis incrementis inimiciſſima invidia. Alit enim livorem inſœlix inertia: & omnes deſtrui cupiunt, quia ſe non potuerunt provehere: & ex hac deinde averſatione alienorum proceſſum, & ſuorum deſperatione, obiraſcers Fortunæ animus, & de cœculo querens, & in angulos ſe retrahens, & pœnæ incubans ſuæ, dum tædet ſui pigetque. Hæc ille: Quibus eleganter originem cauſamque depingit invidiæ; quæ non tam aliis, quàm ſibi ipſi inimica eſt. Si enim bene rem excutimus, comperiemus invidiam ſibi ignominiam, illi autem cui invidet gloriam parere; quia dum perpetuò invidos illos oculos, in
illum

illum conjicit, atque in eum, quid agat, quomodo vivat, inquit, hæc illi honorifica incumbit necessitas, ut omnia dicta factaque sua ad normam recti componat, ne si ab illâ vel latum unguem discedat, invidiæ gaudendi materiam præbeat. Illi enim

*Risus abest, nisi quem visi movere dolores,
Et videt ingratos, intabescitque videndo
Successus hominum, carpitque & carpitur unâ,
Suppliciumque suum est.*

Ovid. in
Metam.

Expedi enim illi neminem videri egregium, quasi aliena virtus exprobratio illius vitiorum sit. Porro demens sit, qui spicula hujus monstri curet; cum genus ultionis sit, ei, qui invidet, invidiæ voluptatem contemnendo eripere. Stultus etiam, qui, ut invidio placeat, virtutes suas occulat & abscondat,

Hoc Ithacus velit, & magno mercentur Atrida.

Exercendi sunt oculi Nocturnæ clarâ lucem non ferentis, & ad honesta vadenti, contemnendus est iste invidorum contemptus. Audi Horatium,

*Invidiam placare paras Virtute relicta?
Contemnere miser vitanda est improba Siren
Desidia, aut quicquid vita meliore parasti
Ponendum a quo animo.*

Eleganter Demetrius dicere solebat, eodem loco sibi esse invidorum voces, quo ventre redditos crepitus; Quid enim, dicebat, mea refert, si visum illi an deorsum sonent. Et certè (secundum Senecam) nihil stultius est, homine verba metuente. Gemant invidi, & infœlicem linguam bonorum exerceant convitio. Insistent, commordeant, multo citius frangent dentes, quàm imprimant. Illustratur virtus nostra per ea ipsa, per quæ petitur. Produci enim illi & tentari expedit: nec ulli magis intelligunt quanta sit, quam qui vires ejus lacessendo senserunt. Duritia silicis nulli magis, quàm ferientibus nota est. Præbeamus nos, non aliter quàm rupes aliqua, in vadoso mari destituta, quàm fluctus non desinunt undecunque moti sunt, verberare: nec ideo aut loco eam movent, aut per tot ætates crebro in cursu suo consumunt. Assilite facite impetum, ferendo vos vincam. In ea quæ firma & insuperabilia sunt, quicquid incurrit, malo suo vim suam exercet. Proinde quærite mollem aliquam cedentemque materiam; in quam tela vestra figantur. Sic sic invidiæ tædium

Seneca de
Vir. Beata.

devoremus, sciamusque; ut flammam primùm emicantem multus comitatur fumus, qui evanescit jam invalescente & explicante sese flammâ, ita res egregias aggredientem, magnâ premi invidiâ, eaque tamen eum moveri non debere: Nam ut excors sit, qui adversis ventis jam diu navigans, & in altum provectus, otii tranquillitate portum petat: sic qui tum negotium relinquit, cum jam dudum cum invidiâ est luctatus, & citra eam impofterum vivere posset; ubi scilicet

Virgil.

*Per varios casus, per tot discrimina rerum
Venerit in Latium, sedes ubi fata quietas
Ostendunt :*

Claud.

Latium designo illam excelsam Virtutis Ædem, illud
*Meriti spatium, quod nulla furentis
Invidia mensura capit.*

Hic nobilis ille noster Athleta ventos ridebit & imbres, major jam omni invidiâ, quam suâ virtute extinxit: Non secus ac Sol si immineat hominis vertici, aut prorsus tollit umbram, aut minimam reddit. Videte nunc illustres animæ, quæ cum invidiâ luctamini, quam præstet esse invidiosum, quam miserabilem. Scivitis Astaphium Aneilla apud Plautum, cum inquit,

In Truculento.

*Mavelim mihi inimicos invidere, quàm me inimicis meis:
Nam invidere aliû bene esse, tibi malè esse, miseria est,
Qui invident egent, ille quibus invidetur rem habent.*

Verissima est vulgata illa sententia, unicam esse miseriam quæ careat invidiâ. Cui accedit arguta illi Poëtæ imprecatio.

Omnibus invidas, livide, nemo tibi.

In Sophistas.

E M B L E M A L X I V.



*Ingenti studio componit Aranea telam,
 Et tamen à cunctis spernitur illud opus.
 Sic magnas magno promissis molimine nugas,
 Dum vigilas studiis vane Sophista tuis.*

C O M M E N T A R I U S.

Apposite Aranearum telis vani Sophistarum Elenchi, & captionis æquiparantur, licet enim magno labore construuntur, nihil aliud tamen sunt quàm quisquilæ volantes, & venti spolia, & ut Origenes inquit, Ægyptiæ ranæ, quæ tametsi assidua ogganiant, oblatrentque prætereuntibus, & odiosam illam cantilenam *βγεκεκεκεξ κοαξ κοαξ*,
 ite-

Plutarch.

Seneca.

Idem.


Idem Ep. 89.

iterent sine, sine tamen nemo commoveretur, aut doctior red-
 ditur. Quemadmodum Bonsto cornua oneri sunt tantum, nulli
 auem usui, quia adeo in se sunt reflexa: sic illi suam habent Dia-
 lecticam, quâ tamen neminem, quia adeo intorta & intricata
 est, vincere possunt. Nihilominus tamen illi ἐκ πάγων σφοί,
 id est, barbæ tenuis sapientes, adeo nugis istis intenti sunt, ut
 propemodum cum Chrysippo præ fame mortantur. Hærent
 in verbis, & ætatem totam in adytis Philosophiæ terunt, pe-
 netralia nunquam vident. Rem illam magnificam Philoso-
 phiam ex majestate suâ, in magnas angustias detrudunt, vo-
 cando eam ad syllabas, quæ utinam non prosint tantum, sed
 maximè nocent. Commiuitur enim & debilitatur generosa
 indoles, in istas angustias coniecta. Ad hæc illi supercilia sub-
 ducunt, in hoc barbam demittunt, hæc tristes docent, & pal-
 lidi. Fugitivis clamoribus non ad calamos, sed ad obliuiofas
 aures semper certant. Risit hos tales olim lepidè Demonaëtes
 Philosophus, cum enim duos indoctos, inter se disputare videret
 & rixari, quorum alter absurda rogaret, alter nihil ad rem
 responderet; Non videtur vobis, inquit, amici, alter horum
 mulgere hircum, alter ei supponere cribrum? Innuens nihil
 aliud esse sophismata, quàm inanes nugas, quas tamen, quod est
 turpissimum atque ineptissimum, habent difficiles. Atque hæc
 de elenchis. Quorum tamen etiam prospiciendas statuo fallacia-
 cias, sed prospiciendas tantum, ne verba nobis dentur, & ne
 quid in illis magni secretique boni esse exstimemus. Venio ad
 veram illam Philosophiam, quam terris exulantem Socrates de
 cœlo revocare conatus est; hanc divinam plane judico. Scimus
 illam esse matrem omnium artium, donum & inventum Deo-
 rum quod ab animo, tanquam ab oculis, caliginem discutit, ut
 omnia supera, infera, prima, media, ultima videremus. Hæc est
 illa quæ de moribus quærit, quæ affectus temperat, quæ timori,
 quæ spei metam ponit, aut modum. Quæque (ut breviter Seneca
 verbis dicam) humano generi promittit consilium. Divina
 certè & ineffabilis vis, quæ utinam, quemadmodum universi
 mundi facies in conspectum venit, ita tota nobis posset occur-
 rere. Profecto omnes in admirationem sui raperet, relictis his
 quæ nunc magna, magnorum ignoratione credimus. Hanc au-
 tem nunquam satis laudatam scientiam, Sophisticæ abusus (ut
 ple-

plerumque vitia se associant virtutibus) malè audire fecit. Scilicet ut vinum, quo nihil salubrius, quibusdam venenum est; sic sophistis Philosophia, quâ abutuntur. Hinc est quò sanctissimi patres adeo in eam inveci sint. Gregorius Nazianzenus: In Ecclesiam, velut quædam Ægypticæ pestes, Philosophi irrepere. Tertullianus; Philosophi patriarchæ hæreticorum. Ambrosius Antistes; Phalerata magis, quàm vera sapientia, quæ aliena quærit, cum sua nesciat, cœli plagas scrutatur, Deum ignorat, quem solum nosse debebat. Hæc illi. Sanè primis illis Ecclesiæ temporibus, plurimi erant qui Christum assumerent ore, Platonem autem animo non exuerent. Hinc illæ Patrum in falsam Philosophiam calumniæ. Enimvero Scænicam illam meretriculam res suas sibi habere voluerunt, & à sacrosanctâ Theologiæ æde pedem referre, ut Siren usque in exitium dulcis, cantare, sive garrire desineret. Nobis autem qui Christum profiteamur, alia mens sit, navim nostram semper avertentes ab istis argutiarum salebris, velificationes nostras ad unum tranquillæ mentis portum dirigamus; Ad quam nos transfer O æterna æterni Patris Sapientia.

Indoctus ipse alios juvo.

E M B L E M A L X V .



*Sunt Asini cantare rudes, tamen ossa ministrant
 Quæ fistulis aptissima ;
 Sic quibus est res ampla domi, tenues studiosos
 Opibus juvare convenit.*

C O M M E N T A R I U S .

Nihil magis commendat divites, quàm sic divitias suas in laudabiles usus expendant, egenos scilicet iis sustentando, aut pauperculos studiosos, qui ad artes illas, quibus humanitas & eruditio paratur, non imbuti, sed à naturâ ficti videntur, iis fovendo, & adjuvando. Asini, rude illud & stupidum animal, ossa nobis ministrant, ex quibus fistulæ confi-

conficiuntur maximè sonoræ: sic & illi, qui alioqui (ut Papinianus dicebat) aurea mancipia, & secundum Diogenem χερσὶ μῆλα, id est, oves aureo vellere, appellari merebantur, tamen laudandi sunt, quod his, qui alias in pulvere suo & cœno hæssissent, manum præbeant, & illam animorum servitutem & tyrannidem, paupertatem dico, solvant. Exclamat Comicus in Adelphis, paupertatem esse onus miserum, & valdè grave: usque adeò, ut etiam nobilem ignobilem faciat. Et verum est illud Juvenalis,

*Haud facile emergunt, quorum virtutibus obstat
Res angusta domi;*

— *Minimè cantare sub antro*

*Pierio, Thyrsūve potest contingere sava
Paupertas. atque aris inops, quo, nocte dieque
Corpus eget. satur est cum dicit Horatius, Ohe.
Quòd si Virgilio puer, & tolerabile desit
Hospitium. caderent omnes à crinibus Hydri.
Surdia nihil gerneret grave buccina.*

Scimus quidem laboriosum illum & industrium Cleanthem, ex summâ paupertate, ad divinam illam Chryssippi Philosophiam adspirasse; sed quocumque tam heroica mentis vis? Plurimi incredibili eruditionis amore flagrant, sed quia cum summis colluctantur difficultatibus, ignea eorum ingenia humi deprimuntur, qui tamen, si tandem aliquo favoris Zephyro resuscitarentur, non pœnitendos se patriæ cives præberent. Horatius cum in sinu Mæcenatis sui requiesceret, illa æterni nominis carmina conscripsit. Hinc Martialis,

*Sint Macenates non deerunt Flacce Marones,
Virgiliumque tibi vel tua rura dabunt:*

Hic sine exemplo Poëta, cum ab Augusto Cæsare, qui magnitudine rerum suarum terræ totius habitabilis imperium complexus est præmiis & honore afficeretur, divinissimo Æneidos opere, id potissimum egit, ut Cæsares & Julios, à nobilissimo Æneæ Julique sanguine ortos, & jam inde ab infinitâ annorum serie, universo terrarum orbi administrando, per oracula, sortēsque antiquissimas destinatos ostenderet;

*At domus Æneæ cunctis dominabitur oris
Et nati natorum, & qui nascentur ab illis.*


Sic Augustus, alioqui fortasse futurus ignotus, fovendo Musam Virgilii, æternum nomen sibi peperit. Alexander Macedo, Achillem hoc uno se feliciorem & fortunatiorem fuisse dixit, quòd immortalì Homeri carmine celebratus, per totum terrarum orbem innotuisset. Etenim Heros bellicosissimus, æternitatem à principe Poëtarum accepit; Alexandri autem imperium, statim eo mortuo, in diversa regna fuit divisum atque distractum, quæ tamen omnia Romanis rerum dominis postcà cessere. Horat. Oda 9. Lib. 4.

*Vixere fortes ante Agamemnona
Multi, sed omnes illachrymabiles
Vrgentur, ignotique longâ
Nocte, carent, quia Vate sacro :
Paulum sepulta distat inertia
Celata Virtus.*

Princi-

Principiis mali obstandum.

E M B L E M A LXVI.



*Aspidis haud ullâ morsus curabitur arte
 Ense recidatur pars nisi lesa statim;
 Haud aliter si Seditio teterrima pestis
 Ingruat, & secum crimina multa trahat,
 Omnia sunt tentanda quidem, sed tollere præstat
 Vnum, ne totus grex malè dispareat.*

C O M M E N T A R I V S.

P Ræcipiunt medicorum filii morborum principiis semper
 obstare, ne

— Sed medicina pareatur
 Cum mala per longas invaluere moras.

Bb 3

Monet

Monet hoc Persius Satyra tertia,

Helleborum frustra quum jam cutis agra tumebit

Poscentes videas, venienti occurrito morbo.

Hoc idem requiritur in morbis ab Aspidē, qui nullo modo sanantur, nisi partes læsæ confestim amputentur. Monetur autem hoc Emblemate Princeps, seditiosos & conclamatae nequitiae cives, merita poena punire, & è Republica suâ ejicere; Nam

Ovid.

— *Immedicabile vulnus*

Ense recidendum est, ne pars sincera trahatur.

Apul. de
Philos.

Etenim ille, cui nec natura, nec industria rectè vivendi studium conciliare potest, è vita, secundum Platonem, est pellendus. Hæc ipsa clementia est, non esse hîc clementem Multos servamus dum unum tollimus. Et optimum misericordiæ genus est, occidere, non tam ut ipsi pereant, sed ut alios pereundo, deterreant. Melius enim est, ut pereat unus, quàm unitas, membrorum potius aliquod, quàm totum corpus intereat. Sed hæc omnia moderatè, & pro delicto. Nec enim prius ad ultima remedia deveniendum est, nisi cum depositæ salutis æger, nullis lenioribus auxiliis juvari potest. Quia ut Satyricus inquit,

Lipf. in Po-
lit.

Cicero Phi-
lipp. 9.

Nulla nunquam de morte hominis cunctatio longa est.

Claud.

*Qui fruitur poena ferus est, legumque videtur
Vindictam prestare sibi.*

Pau-

Paulatim.

E M B L E M A L X V I I .



*Qui studet phyalam replere lymphâ
 Stillando faciat; rebullit omnis,
 Hanc infunde si simul labores :
 Quisquis ingenium gravare multis,
 Et comprehendere cuncta vult, hebescit.*

C O M M E N T A R I U S .

DIverbium Italis in ore frequens est ;
Et tutto abbraccio, & nulla stringo :
 Quo innuunt , illos qui variis rebus simul animum occupant,
 sive

sive distrahunt, parum aut nihil proficere. Quemadmodum enim vasis angusti orificii, si magno impetu, & simul aquam infundas, eadem aqua ejicitur; si sensim instilles, recipitur: idem de ingenio nostro est, quod oneratur turba præceptorum, non instruitur, cuique satis est accensio velut incitamentum in materia, quo vis inveniendi & cupiditas incitetur. Androgyni sic utrosque imitantur, ut neutrum sint, nec mares, nec fœminæ: Ita quidam dum omnia esse volunt, à nullis agnoscuntur. Idcirco aptissimè à Polybio gulosis convivarum comparantur; nam ut illi omnia quæ apposita sunt gustantes, neque in præsentia verè fruuntur ullo ciborum, neque in posterum digerunt satis, aut utiliter iis nutriuntur; sibi delibant varia, sed sine alio fructu omnia cursim & prope-
rantes transmittunt. Ideoque satius est paucis se auctoribus dare, quàm per multos vagum & instabilem errare. Certis ingeniis immorari & innutrirì oportet, si velis aliquid trahere, quod in animo fideliter sedeat. Nusquam est qui ubique est. Non prodest cibus nec corpori accedit, qui statim sumptus emittitur. Nihil tam utile est quod in transitu proficit. Fastidientis stomachi est, multa degustare: quæ ubi varia sunt & diversa, inquinant, non alunt. Pauca itaque excerptenda sunt, quæ bene concoquamus, & in sanguinem ac succum redigamus.

Senec. in
Epist.

In

In corruptos Judices.

EMBLEMA LXVIII.



*Aranearum tela magnis rumpitur
 Muscis, minores strangulat;
 Rei potentes judicium sententiam
 Odore ducunt munerum;
 Qui nil habet quo torqueat Leges, miser
 In pelle pauper plectitur.*

COMMENTARIUS.

A Pophthegma est Anacharsidis, quo elusit studium Solonis in conscribendis legibus. Dicebat enim Leges aranearum telis adsimiles esse, propterea quod in illas si
 Plutarch. in vita Solonis.
 C c quid

quid levius, aut imbecillum incurreret, hæreat, sin majus aliquid, dissecet, ac fugiat. Huic succinit illa sententia, quæ apud Terentium in Phormione est,

*Quia non rete Accipitri tenditur, neque Milvio
Qui male faciunt nobis, illis qui nihil faciunt tenditur,
Quia enim in illis fructus est, in illis opera luditur.*

Et Juvenalis,

Dat veniam corvis, vexat censura columbas.

Diomedes pyrata captus ab Alexandro in hunc modum se purgabat, dicens, Ego quia unâ navi pyratricam exerceo, pyrata dicor, tu, quia toris classibus, imperator nuncuparis. Marcus Varro apud Nonium;

Natura humanis omnia sunt paria.

*Qui pote, plus urget, pisces ut sæpè minores
Magnus comest.*

Arist. in
Rhet.

Hæc autem sententiarum everfio, sive conniventia, unde, nisi à pecunia? cui πάντα ὄντια, id est, omnia venalia. Asserit Tibullus:

Auro pulsa fides, auro venalia jura,

Aurum lex sequitur, mox sine lege pudor.

Quævis castella hæc machina dejiciet, in quæ modò Asellus auro onustus possit ascendere. Ad summum

— *Divina humanaque pulchris*

Divitiis parent.

Horat.

Aurum per medios ire satellites

Et perrumpere amat saxa, potentius

Ictu fulmineo.

Verè ille

*χρυσὸν λαλῶντες πᾶς ἀπεικτεῖτω λόγος,
πείθειν γὰρ εἶδ' ἃ καὶ πέφυκε μὴ λέγων, id est,*

Auro loquente ratio quævis irrita est,

Suadere siquidem novit & loquens nihil.

Plautus in
Aulularia.

Nempe hominès cum tenis manibus, è genere Gerionaceo, hoc altè impressum animis habent

— *μηδὲν εἶναι σὺν κέρδι κακόν, id est,*

nihil esse cum lucro malum. Et sic cum Imperatore isto statuunt:

Juvenal.

Lucri bonus est odor, ex re

Qualibet,

Ergò

Ergo terram mari miscent, judicia confundunt, legesque torquent pro arbitrio. Quod sciens Pericles, cautè singulis annis, decem talenta Lacedæmonem mittebat, & præcipuos corrumpebat, ut moram Belli, quando opus erat, redimeret. Quapropter verissimè auri illam sacram famem (ut Poëta inquit) omnium virtutum vim quandam corruptricem dicas. Atque hæc de divitibus, in quâlibet causâ triumphantibus sufficiant. Nunc de pauperibus ubique jacentibus dicamus. Hi (ut inquit Comicus) dum nihil habent quod offerant in judicio, non solum non contemnuntur, sed etiam adversus veritatem sæpè opprimuntur. Nulluseis amicus, nullus qui suppetias ferat. Quia ut verè Pindarus inquit, *Οἷχεται πρὸ φίλων τατωμένω*

in Nemzis
Oda 10.

φῶτί.

Perit honor amicorum afflicto viro.

De hoc conquerentem ausculta Plautinum Menechmum.

Vt hoc utimur maxime more morum,

Molestoque multum, atque ut quique sunt

Optimi, maximi, morem habent hunc;

Clientes sibi omnes volunt esse multos;

Bonique an mali sint, id haud queritant,

Res magis quaritur, quam clientium

Fides quemadmodum clueat.

Si est pauper, atque haud malus, nequam habetur,

Sin dives malus est, is cliens frugi habetur,

Qui neque leges, neque æquum, neque bonum usquam

Colunt, sollicitos patronos habent.

Datum denegant quod datum est, litium

Pleni, rapaces, viri fraudulentis,

Qui aut fœnore, aut perjuriis habent rem

Partam. Mens est in querelis,

Iuris ubi dicitur dies, simul

Patronis dicitur, &c.

Hi aut lucro, aut favore, ad gratiam deliberationes & consilia flectunt, jacet pauper, & dum non habet in ære, plectitur in pelle. At quàm optandum foret, ut ii qui Reipub. præsent, Legum similes essent, quæ ad puniendum non lucro, favore, aut odio, sed æquitate ducuntur? Ubi enim hæc officiunt, haud facile animus verum pervidet. Præcipuè ubi avaritia dominatur;

Privatæ enim res semper offecere, officientque publicis consiliis;
 Livius l. 22. Et pessimum veri affectus, & judicii venenum, sua cuique utili-
 tas. Prudenter olim Areopagitæ nocturno tempore judicabant,
 Tacit. Hist. ut & rem benè excuterent, & nullius favore, aut gratia flecteren-
 tur. Cleon, postquam Reipub. administrationem in se suscipere
 destinasset, testatus est, se jam omnium amicitiarum vincula vel-
 le dissolvere. Olim etiam qui corruptus pecunia, male judicabat,
 Plutarch. amissa dignitate, vel cingulo, efficiebatur infamis, ut est in L. pe-
 nult. Cod. de pœnis jud. qui malè judic. Iustinianus etiam Lib. 4.
 Inst. Tit. xvii. inquit; Iudicis officium esse, non aliter judi-
 care, quam legibus, constitutionibus, aut moribus proditum est.
 Ac veteres quidem illi, paucissimis verbis iudicis officium conclu-
 debant, cum dicerent; Legem esse mutum iudicem, iudicem
 autem Legem loquentem. A bono enim iudice ita prorsus omnia
 judicari oportet, ut lex ipsa, si loqui posset, judicaret; atque ita
 legem & iudicem inter se conspirare, ut sit lex quasi anima iudi-
 cis, & iudex quasi vox legis: Et quemadmodum Aristoteles ait,
 Legem esse mentem cupiditatis expertem, ita oportet iudices,
 omni cupiditate spoliatos, mente tantum ac ratione, in disce-
 ptandis controversiis uti. Sed hæc oprare licet, sperare vix licet.

Civilis

Civilis discordia hostis victoria.

E M B L E M A L X I X.



Præda duos inter fuit olim splendida Sturnos,
 Hanc erat auxilio nactus uterque suo,
 Dividere hanc tentant, oritur discordia præceps,
 Quæ socios trahit ad bella gerenda animos;
 Milvius hæc spectans trepidantibus advolat alis,
 Cumque suâ prædâ victor utrumque rapit :
 Scilicet est hosti facilis victoria, quando
 Discordes populi civica bella movent.

COMMENTARIUS.

IN hoc Emblemate oculis subjicitur, quàm noxia, quamque pestifera res sit, civilis discordia, quæ nisi in herbâ opprimatur, necessario aut interitus consequitur, aut mutatio rerum: Hæc enim est quæ omnes faciles reddit occupantibus, & meliorum incuriosos. Omnia denique bellis civilibus misera sunt, sed nihil miserius quàm ipsa victoria. Proinde benè Homerus,

Αφείτωρ, ἀθέμις ὁ ἀνέστη ἐπὶν ἐκείνῳ
 Ὁς πολέμους ἐφάρτυ θηροδμήτῃς ὀκρυόεντος, id est.
 Ille nefarius, & sine gente tribuque mihi esto,
 Qui civile cupit ferum & execrabile bellum;

Tacitus.

Vegetius.

Verè execrabile, quia nihil hostibus præstare majus Fortuna potest, quàm adversariorum discordiam; atque inter eos discordiarum serere causas, sapientis est ducis. Nulla enim quamvis minima natio, potest ab adversariis suis perdeleri, nisi propriis simultatibus sese ipsa consumpserit. Quia, ut Sallustius inquit; Concordia res parvæ crescunt, discordia maximæ dilabuntur. Voluit scilicet hoc, istud Apophthegma Sciluri, qui quum, relictis maribus filiis octoginta, diem esset obiturus, sagittarum fascem cuique obtendens, ut illum confringeret jubebat, id autem singulis se posse negantibus, ipse singularim eductas facillimè confregit: Docens illos ubi unà esse perseverarent, firmos ac potentes fore: Imbecillos verò, si separarentur ac dissideant. Sciebat hoc etiam Micipsa moriens, qui ita apud Sallustium, ad filios loquitur; Regnum vobis trado firmum, si boni eritis, si mali, imbecillum; certus nimirum adversus consentientes nec regem quemquam satis validum, nec Tyrannum fore. Lepidè olim, Pytho Rhetor Byzantius, quum esset supra modum obeso corpore, prodissetque in concionem suasurus concordiam Byzantiis, statim populi risus obortus est ex ipso corporis habitu: At ille, ridetis inquit Cives? cum tale corpus habeam, uxorem habeo multo me obesiorem, & tamen concordēs quodvis grabatum capit ambos, discordes ne tota quidem domus. Lapidēs quidam insulæ Cycladiacæ (teste Plinio) integri supernatant, fracti concidunt in fundum: sic omne quod est, tam diu manet atque subsistit, quàm est unum, sed interit atque solvitur, quando

quando unum esse desit. Ego sic existimo, (inquit Sallustius de Repub. suâ) quoniam orta omnia intereunt, qua tempestate Urbis Romanæ fatum excidii adventarit, cives cum civibus manus confecturos, ita defessos atque exsangues regi prædæ futuros. Aliter non orbis terrarum, neque cunctæ gentes conglobatæ, movere aut contunderè queant hoc imperium. Illud autem postea evenit; Romani enim crebris victoriis, hoste superato inquieti, & bellorum amantes, inter sese bellum gerere, & ab hoste in sua viscera ferrum convertere cœperunt; ita, dum militiæ arma cessant, domi turbæ nascuntur, & ubi publicus hostis deest, cives cum civibus, duces cum ducibus, domestica jurgia, discordias ac similitates exercent; ut stante Carthagine, imperii æmulâ, Romani fœlices, deletâ miseri fuerint, & lorica illis fœlicior quam toga, campus securior quàm thalamus, tuba quàm tibia, Sol quàm umbra extiterit optabilior. Huc allusit Vates ille;

Nunc patimur longæ pacis mala, savior hostis

Luxuria incubuit, victumque ulciscitur orbem.

Statim enim non gradu, sed præcipiti cursu à virtute descitum, ad Vell. Patere. vitia transcursum, vetus disciplina deserta, nova inducta, in somnum à vigiliis, ab armis ad voluptates, à negotiis ad otium conversa civitas. Quod ne & nobis eveniat *θεῶν ἐν γένεσι κείτου*; Præsertim otioso hocce tempore, quod plerumque civilium furorum fons & origo. Præterea

In se magna ruunt; latè hunc Numina rebus

Crescendi posuere modum.

Lucanus.

Sed Deus, in cujus manu omnium corda sunt, uti voveo, avertet, dabitque ut ancipitis Fortuna temporis, matura virtute corrigatur, & divulgis prius animi paulatim coalescant. Refert Plinius Serpenti & Vulpi naturales inimicitias esse, & ob eas quotidie congregi, ast ubi aquila communis hostis adventat, inimiciis depositis conjuncta vi resistunt: Horum animalium exemplo similitates & odia inter finitimos deponantur, ac

— *Coeant in fœdera dextra*


Qua licet, ast armis concurrant arma cavete;

ne hostis inter sese digladiantes ex insidiis opprimat. Etenim cui bono hæc civilis discordia, nisi ut testa testæ (ut est in Adagio) collidatur? Mutua defensio tutissima est.

In

In ingratos.

EMBLEMA LXX.



*Devorat excussas glandes, nec suspicit unde
 Hæ sibi proveniant pigra propago Suum:
 Percipiunt homines summorum munera Divûm,
 Vix tamen his grates ore decente canunt.*

COMMENTARIUS.

Quanta sit Dei munificentia in humanum genus, ex eo potissimum apparet, quod, quæcunque mundi ambitus complectitur, homini, tanquam Regi, subjecerit regenda, utenda, & fruenda; id solummodo ἀνδρῶν expectans, ut quemadmodum nobis omnia parent, sic illi tanquam superiori identidem pareamus, meritaque pro tot ac tantis benefi-

beneficiis gratias agamus. Attamen quàm recalcitrosi & ingrati adversus tam munificum patrem filii sumus, dum divinis donis, tanquam nostro jure nobis debitis, ita abutimur? immemores à quo auctore nobis illa profisciscantur. Non secus ac Sues, quæ excussas è quercubus glandes quidem devorant, sed ne quidem ad illam arborem, fructus illius procreatricem, suspiciunt. Dicebat olim Themistocles se platanis esse similem, sub quarum umbram accurrunt homines afflicti tempestate, & easdem, simul ac rediit serenitas, amputant, vellunt, convitiisque petunt. Idem de Deo quis appositè dicat; Etenim si qua gravis necessitas prefferit, tunc Dei recordamur, si belli terror infremuerit, si morborum pestifera vis incubuerit, si alimenta frugibus longa siccitas denegarit, si tempestas, si grando ingruat, ad Deum confugitur, à Deo petitur auxilium. Si quis in mari vento faviente jactatur, hunc invocat, si ad extremam medicandi necessitatem deductus, victum precibus exposcit, Deum solum obtestatur, per ejus unicum atque divinum nomen hominum sibi misericordiam quaerit. Nunquam denique homines Dei meminerunt, nisi dum in malis sunt. Postquam metus deseruit, & pericula recesserunt, Deo, quem ante in sua necessitate imploraverant, ne verbo quidem gratias agunt. Ita ut verum sit illud Comici,

Laët. lib. 2.
Civia. lant.

μετὰ τὴν δόσιν τάχιστα μετῴκει χάρις, id est,

post dationem celerrimè senescit gratia. Cum tamen bruta, & omnis rationis expertia animalia aliud nos doceant. Canis hero suo offam ei objicienti, quàm ad blanditur; quàm amico latratu, motuque caudæ se gratum exhibet? Aves longo usu edoctæ avolant, & ad herum suum revolant, agnoscunt eum, nec se à gremio illius movent, sed circumsilientes modò huc, modò illuc, ad solum dominum usque pipitant. Ferocissima denique animalium usu cicuria, bene merentibus aliquod grati animi πεκμήλιον deferunt. Solus autem homo cui Ratio infusa, adversus Deum, & proximum ingratus existit. Quod animadvertentes Legislatores, homines veram, non simulatam Philosophiam proponentes, jura condiderunt, quibus ad ἀντίδωκεν teneremur. Patet hoc in L. Si remunerandi, ff. Mandati. L. Sed & si. ff. de Petit. hæredit. Et secundum Pindarum;

θεῶν δ' ἐφετμαῖσιν,
ἰξίονα φανήτωτα
βροτῶν λέγ' ἐν

πλεόνειπ τροχῶ
 πάντῃ κυλινδούμενον
 τὸν δ' ἐργέταν ἀθανάτῃς
 ἀμοιβαῖς
 ἐπιχομένους τίναδ' ἴδ' , id est ,


Sen. de Be-
 nef. lib. 1.
 cap. 3.

Deorum mandatis Ixionem ajunt hæc mortalibus dicere, dum in altâ rotâ circumquaque volutatur; Oportere mortales benefactorem placidis remunerationibus excipientes, debitam gratiam ei persolvere. Statuarii etiam veteres tres Gratias exprimere soliti sunt; Sorores, manibus implexis, ridentes, juvenes, virgines, solutâ ac pellucidâ veste: Quod interpretantur, unam esse, quæ det beneficium, alteram quæ accipiat, tertiam quæ reddat. Consertis manibus finguntur, ob hoc, quia ordo beneficii per manus transeuntes, nihilominus ad dantem revertitur, & totius speciem perdit, si usquam interruptus est: pulcherrimus si cohæsit, & vices servavit. Ideo ridentes; quia promerentium vultus hilares sunt. Juvenes, quia non debet beneficiorum memoria senescere. Virgines, quia incorrupta sunt benefacta, & sincera, & omnibus sancta, in quibus nihil esse alligati decet, nec astricti. Solutis itaque tunicis utuntur: pellucidis autem, quia beneficia conspici volunt. Hæc ille. Epicuri sententiam mantissæ loco addo; Non modò pulchrius est beneficio afficere, quàm affici, verùm etiam jucundius, Nam nulla res perinde parit gaudium, ut beneficentia.

Pestis

Pestis regni Rex, sine prudentiâ.

E M B L E M A L X X I.



*Privatus charo Polyphemus lumine, nullo
 Consilio errantes jactat ubique manus:
 Haud aliter Reges, ratio quos nulla gubernat,
 Omnia per verso turbine semper agunt.*

C O M M E N T A R I U S.

CUm omnibus magistratum obeuntibus & Reipubl. inservientibus necessaria sit prudentia, tum in nullo magis, quam in Rege requiritur, utpote quo neminem plura, vel meliora scire oportet, quia ejus doctrina omnibus subditis prodesse debet. Qualis Homericus ille Cyclops amisso oculo, talis rex cui abest lumen illud animi. Nemo navim

Cicero.

dirigat absque ferro, quod affricuit Siderites: sic nemo regnum sine mente, quam afflavit illa Diva Prudentia. Non viribus corporis, sed animi, res magnæ geruntur. Synesius Libro de regno administrando, ad Arcadium vel Theodosium juniorem scripto, negat in viribus solis positam fœlicitatem Principis, sed absolutam eam prædicat, quæ potentiam prudentiæ consociat, quæ res conjunctæ robur inexpugnabile conciliant, disjunctæ invalidum & inutile. Horat.

Vis consilii expers mole ruit suâ;

Illud est vinculum per quod Respub. cohæret, illud spiritus ille vitalis, quem tot millia trahunt, nihil ipsa per se futura, nisi onus & præda, si mens illa imperii subtrahatur. Porro quanquam esse possit

Eurip.

σοφὸς τί ἐγεννᾷ τὸ σφῶν ζῶνσις, id est,

Rex sapiens sapientium commercio, & assumere in partem cūrarum alios; tamen miserum tale regnum judico, quod alienâ mente administratur. Quia sæpissimè videmus eos esse Regum animos, ut quanquam inquit, tamen flecti nolint. Dicethoc Medea;

Seneca.

*Difficile quàm sit animum ab irâ flectere
Iam concitatum, quamque regale hoc putet,
Scepbris superbas quisquis admovit manus,
Quâ cepit ire, regiâ didici meâ.*

Et in Hippolyto,

*Nec me fugit, quàm durus & veri insolens
Ad recta flecti regius nolit tumor.*

Hinc illa regni confusio, & pestis, quæ ideò gravior, ut quæ à capite (ut medicorum filii de morbis loquuntur) diffunditur. Dum Palinurus dormit, in mare præcipitatur, ipsaque navis, sine rectore, à fluctibus propemodum absorbetur: Sic in hac hominum navi innumeræ animæ in occasum trahuntur, nisi publicus ille Palinurus evigilet. Benè itaque cum Xenophonte precabimur, ut sint πολλοὶ βασιλέως ὀφθαλμοί, ἢ πολλὰ ὦτα, id est, multi regis oculi & multa aures.

Cura animi imprimis gerenda.

E M B L E M A L X X I I .



*En quanto studio rudes catellos
 Vrſa perpoliat , decentiorem
 Donec imprimat , ingeratque formam :
 Mortales meritò rubere diſcant ,
 Qui, neglecto Animi nitore pulchri
 Innatis , modò ſunt luti parentes.*

C O M M E N T A R I U S .

O Rus Apollo in ſacris ſuis Sculpturis refert , Ægyptios ſi quando hominem initio quidem informem natum , ſed poſteâ formam accipientem, innuere vellent, urſam prægnan-

prægnantem depingere solitos fuisse. Hæc namque sanguinem primum condensatum, & concretum parit, hunc postea propriis fovens femoribus efformat, linguaque lambens perficit. Hinc Poëtarum princeps Virgilius dicere solebat, se Urfino more fingere carmen, cum (ut referunt ii qui ejus vitam conscripserunt) plurimos inconditos versus mane effunderet, eosque politos, ad tres quatuorve redigeret. Cæterum ut ad propositum revertamur, ac hæc nostrâ Vrsâ quantum sæpè homines degenerant? dum præstantissimam illam liberorum suorum partem, animum dico, securi incultam relinquunt. Quos homines meritò eximius ille Theologus Nazianzenus, *Luti parentes* vocat. Quemadmodum enim (ut est in Adagio) lutum non fit testa, nisi tundatur, & rude lignum non est simulacrum, nisi ei forma inducatur: sic homo, non est homo, nisi disciplinis formetur, & ratio in eo promoveatur. Horat.

Doctrina sed vim promovet insitam.

Unumquodque animal fœtus suos non solum gignit, atque educat, verum etiam format ad naturalem suam functionem. Solus homo hæc in parte claudicat. Luxui, iræ, ambitioni, temulentiaæ assuescere videt natos, & patitur; instillat iis verba vix Alexandrinis, ut ille ait, ferenda delitiis, eaque osculo excipit. Interea innocentissima proles parentum culpâ labitur, & peccat: Parentum dico, qui nolunt liberos suos severa lege proficere, qui sicut omnia, spes quoque suas ambitione donant; deinde cum ad vota properant, nihil præter malitiam, atque improbitatem inveniunt. Diogenes cum conspiceret aliquando puerum se indecore gerentem, pædagogum illius baculo percussit, dicens, Cur sic instituis? Quàm multi divites evigilant, ut habeant egregium canem, ut generosum equum, multos servos, cæterum ut probum & doctum filiis suis pædagogum vix unus & alter curat. Olim quidam cum Astrippo agebat, ut filium suum susciperet erudiendum, cumque Philosophus pro mercede quingentas drachmas posceret, alter deterritus magnitudine pretii, inquit, Emerem mancipium iis nummis. At hæc, inquit Aristippus, habebis duo. Sentiens eandem pecuniam paraturam ei, & Philosophum utilem, & filium obsequentem. At quoruscunque hominum hoc capit? Agro excolendo, domui exornandæ omnes Fortunas impendunt, in istis autem omnibus nihil est

est præterquam ipse Dominus & suus hæres pudendum, & incultum: Hanc hominum insaniam egregiè olim Diogenes Cyrenicus perstrinxit. Cum enim aliquando ab aliquo esset invitatus ad prandium, screans, locum quæsit in quem sputum ejiceret. cum autem omnia splendere, hospitem verò solum sordere animadverteret, in ipsum hospitem ejecit: ipse indignabundus rogavit, quænam ista esset impudentia, sputo conspurcare hospitem? Reponit Diogenes, omnibus id moris esse, in locum vilissimum ejicere phlegmata, se verò nullum invenisse viliorē, quàm ipsum hospitem, itaque in illum ejecisse. Intelligebat scilicet Philosophus, æque homines spectari debere, ut equos mercamur. Neque enim in emendis equis phaleras consideramus, aut baltei polimina inspicimus, sed istis omnibus exuviis remotis, equum ipsum contemplamur, ut sit ad speciem honestus, ad cursum vegetus, & ad vecturam validus, an ei sit

Argutum caput, & brevis alvus, obesaque terga,

Virg.

Luxuriatque toris animosum pectus:

Sic cum vuleris veram hominis æstimationem videre, & scire qualis sit, nudum inspice, deponat patrimonium, & alia Fortunæ mendacia. Corpus ipsum exuat, animum intueri, qualis quantusque sit, suo an alieno bono magnus, an iners & rudis, an verò à disciplinis liberalibus & institutione formatus. Socrates cum Gorgiam percunctaretur an Persarum regem fœlicem esse putaret? Nescio inquit quantum virtutis habeat & disciplinæ. Ab his animus lumen accipit, non secus ac visus à circumfuso aëre. Hinc interrogatus quidam quid sibi conferret eruditio? Respondit; ne in theatro lapis lapidi infideam. Et certè sic est ut Comicus ait,

Sen. Ep. 29.

ὁ γραμματέων ἀπὶ τοῦ ἑλέπιδος ἐλέπων,

id est, litterarum expertus non inspicit aspiciens;

contrὰ διὰ τὴν ὁρῶσιν οἱ μαθηταὶ γραμματεῖ,

id est, qui litteras didicere, bis tanto vident. Itaque


Petite hinc juvenesque senesque

Finem animo certum miserisque viatica canis.

Inscitia.

Inscitia semper arrogans.

EMBLEMA LXXIII.



*Vt spicæ vacuæ levant cacumen ,
 Et plenæ reprimunt , solumque spectant :
 Sic homo vacuus scientiarum ,
 Et cui nihil est probæ monetæ
 Præ se despicit eruditiores ;
 At contrà Sapiens , suoque sese
 Explorans modulo , videbit usque
 Quàm sit testa suæ impolita mentis .*

COM-

COMMENTARIUS.


Menedemus Atheniensibus studiosis dicere solebat; Plutarch. de profect. vir-
tut. Plerosque eorum, Sapientes navigare Athenas, deinde fieri Philosophos, id est, sapientiæ studiosos, potestremò Idiotas; innuere volens, quo quis plus in verâ Sapientia profecerit, hoc minus superbire, magisque videre quantum sibi desit. Quod quàm verû sit probavit Socrates, qui dicebat, Se nihil scire, præter hoc, quod nihil sciret; reliquos verò ne hoc quidem scire. Eoq; de se testimonio oraculo Apollinis iudicatus fuit sapientissimus. Et quidem merito, quia in omnibus hæc est sola perfectio, imperfectionis suæ indubitata cognitio. Longe aliter est in istis sciolis nostris, qui magnificis titulis, qui sapientibus pileis, qui splendidis cingulis, qui gemmatis annulis, bis terque magistri nostri, absolutam profitentur scientiam, & magistralibus suis definitionibus, conclusionibus, & propositionibus perstrepunt & insaniunt; ita ut aptissimè in eos quadret quod vulgo dicitur. *Ἀμαθία θεός ἐστι, λογισμὸς δὲ ὄκνον φέρεται*, id est, Inscitia confidentiam, prudentia verò cunctationem parit. Idem ait Quintilianus, Fortius scilicet eos dicere, qui nihil habent artis: cum interim cordatus orator, ac periculum intelligens, initio trepidet; illi cum nondum didicerint, quid sit scire, nullius rei sibi non arrogat scientiam. Canis timidus latrat vehementius, quam mordet. Et altissima quæque flumina minimo sono labuntur. Homerus Menelaum hoc nomine laudat, quod scilicet esset brevilocus quidem, sed tamen argutus. Et Epaminondas à Pindaro commendatur; quod haud facile alter inveniretur qui plura sciret, & pauciora loqueretur. Habent nimirum hoc Sapientes illi, quibus cor modestè situm est, Sileni Alcibiadis videri volunt. Semper suspirant cum vident quantum sit quod nesciant. Est enim (si dicere licet) avara, aut certè avaritiæ, aut hydropi similis Sapientia, jugiter sitit, quotidie inardescit, quo plus quæsierit, eò sibi pauperior videtur, & plus appetit. Contra isti nostri *φιλαύτοι καὶ δοξόστοφοι*, quid non sibi persuadent: simul ac sapere cœperunt, jam sapiunt. Cum beatus sit (secundum Platonem) cui etiam in senectute sapere contingat, verasque opiniones assequi. Vix limen libarunt arcanæ hujus Sapientiæ domus, & jam se penetrasse putant. Et hæc causa est,

cur nunquam ad eam perveniant; siquidem nihil tam profectui adversarium, quàm profectiois opinio. Vidit hoc sapientiæ oculus, cum diceret multos ad Sapientiam perventuros fuisse, nisi se jam eò pervenisse putassent. Stultus viator sit, qui id viæ emetiri conetur, quod jam se emensum putat. Itaque hoc tanquam ex tripode habe; *Credere se Sapientem, primus ad stultitiam gradus est.* Humilitate, humilitate est opus, quæ fundamentum est veræ sapientiæ; quæ non quid actum sit, sed quid agendum, non quid adsit, sed quid desit, attendat; quæ non de quæsito gloriatur, sed de quærendo sollicita sit. Obstat superbia ingenio, non secus ac tumor oculorum visui. Non possum non hic pulcherri-
mum Gregorii locum addere: Qui humilitatem, quæ est mater virtutum nesciunt, usum sui laboris perdunt. Et si quæ bona sunt, quæ videntur, quia surgentis fabricæ robusta cellitudo non figitur, utpote quæ nequaquam in petrâ solidatur, corruunt. Soli igitur ruinæ crescit, quod ædificant, quia ante molem fabricæ, Humilitatis fundamenta non procurant. Fastus itaque & elati spiritus, ex adolescentium animis excutiendi sunt, non secus ac aër ex utribus, si quid utile eis velis infundere.

Lib. 18. Moralium.

Ardua quæ pulchra.

EMBLEMA LXXIV.



*Hand levis ascensu Palma est, sed vertice fructus
Præmia perpesi grata laboris habet :
Ardua Virtutis prima est via, qui pede forti
Pergit, is in blando suscipitur gremio.*

COMMENTARIUS.

Palma arbor est ferens dulcissimos fructus, quos *Dactylos* vocamus, hos, quia admodum cultellato cortice est, difficile est contingere. Comparatur huic Virtus, ad quã

Plinius lib.
13. cap. 4. &
lib. 16. cap. 42.
Gell. lib. 3.
cap. 6.

*Ardua saxoso perducit semita clivo,
Aspera principio (neque enim mihi fallere fas est)
Prosequitur labor, aditendum intrare volenti.*

Silius Italicus
lib. 15.

Sed

— *Mox celsus ab alto**Infra te cernes hominum genus.*Plutarchus in
Demost.

Exstat apud Platonem, in Hippia maiore, in calce Dialogi, proverbium elegans: *χλεπὸν τὸ καλὸν*, id est, Difficilia quæ pulchra. Cui dicto omnes humani actus fidem adstruunt. Quam amarè ferit agricola quod prædulciter metit? Quanto sudore miles, quam immenso sanguine quernam illam coronam, cum militari fremitu, & incondita cantiuncula adipiscitur? Quanto vitæ discrimine Mercator, & nauta pontum trajiciunt, merces exoticas petitori? Quam indefesso ac plane adamantino sudore dulcissimum illud Scire consequimur? Testis Demosthenes, quo nemo unquam laboriosius, nemo per plures oblucentis naturæ difficultates in altum reptavit, qui plus olei quàm vini consumpsisse dicitur, & omnes opifices antelucana vicisse industria. Hic tandem in dulcissimam Musarum, excelsio colle habitantium, familiaritatem receptus, id consecutus est, ut Oratorum princeps diceretur, ut Cæsaribus, Regibus, & Imperatoribus charus & individuus comes esset: Atque hæc omnia labore & industria, sine quibus nulla in hoc mundo gloria. Rebus enim maximis difficultatem proposuit Natura. Laudis Herculeæ fundamentum Labor fuit. Nulli re magis Vlysses quàm labore cognoscitur, quantalibet prudentia fingatur, si otiosus fuisset, latuisset. Labor Romuleos Duces, Scipiadas, Camillum, Fabios, Curios, Fabritios, Metellos, Pompeium, Iulium Cæsarem, aliaque periculis nota nomina, in excelsum illud Famæ theatrum extulit,

Lucan. lib. 7.

Et mox æternos animas collegit in orbes.

Latuissent hi, nisi tristem materiam suis virtutibus implevissent.

Ovid. lib. 4.
Trist.*Hæc tunc quis nosset felix si Troia fuisset?**Publica virtutis per mala facta via est.*

Devoranda hæc sunt iis qui ad Honorem aspirant, alioqui quod in Adagio est *μήτε μέλι μήτε μέλι σκας*, id est, neque mel neque apes. Vere Comicus,

Fortiter malum qui patitur, potest poritur bonum.

Quid aliud Homerum innuisse putabimus per herbam *Moly*, cui radicem nigram, florem lacteum attribuit, quàm radicis nigrae symbolo, Laboris molestiam significare, qua pervenitur ad florem lacteum, id est, ad floridam illam animi tranquillitatem,

tem, Virtutis absolutæ jucundissimum præmium? At contrâ compendiarie res est improbitas, sitque nescio quâ naturæ corruptione, ut, quæ turpia sunt, vel *ωπεδιδαντοι* protinus arripamus.

— *Facilis descensus Averni,*

Sed revocare gradum, superasque evadere ad auras,

Hoc opus, hic labor est. Pauci quos æquus amavit

Juppiter, aut ardens vexit ad æthera Virtus.

Virg. lib. 6.
Æneid.

Omne tempus (inquit Seneca) Clodios, non omne Catones fert.

Ad deteriora faciles sumus, quia nec dux potest, nec comes de- Epist. 97.

esse: & res etiam ipsa, sine duce, sine comite procedit, non pro-

num iter tantum ad vitia est, sed præceps. Egregias quasdam

antitheses ponit Virtutis, & Voluptatis, idem ille Philosophus:

Altum quiddam est virtus, excelsum, & regale, invictum & infa-

tigabile. Voluptas quiddam humile, servile, imbecillum, cadu-

cum, cujus statio, & domicilium fornices & popinæ sunt. Vir-

tutem in templo invenies, in foro, in curiâ, pro muris stantem,

pulverulentam, coloratam, callosas habentem manus. Volupta-

tem latitantem sæpius, ac tenebras captantem, circa balnea &

sudatoria, mollem, enervem mero atque unguento madentem.

Hæ vero duæ Divæ sic comptæ, olim Herculi, dum in fluxu &

lubrico ætatis esset, apparuerunt, sed laboriosam Virtutis viam

elegit, per quam postea in cælum ascendit. Cum contrâ Han-

nibalem Voluptatibus sese devotentem, vitia hyberna solverint,

& indomitum illum nivibus atque Alpibus virum, extermina-

verint. Hæc ergo auræ gemmæ hæc consigno; Qui à Voluptate

incipiunt, in laborem & dolorem desinunt: è contrario qui ab

amaro principio auspicantur, dulci fine clauduntur. Quoniam,

ut Gellius ait, si quid per laborem rectè feceris, labor citò perit,

benefactum autem nunquam recedit, sed si quid per volupta-

tem nequiter egeris, voluptas abit, nequiter factum perpetuò

manet,

Vide Sil. Ital.
& Xenophō-
tem.

F I N I S.

E e 3

F L O.

P O E M A T A

A L I Q V O T.

Ad Amplissimum Consultissimumque Virum
D. ÆMIL. ROSENDALIVM,

O D E.

O Hagiensis maxime Curia
Senator, ingens presidium reis,
Quò Gonda se jactans alumnò
Præterito decus æquat ævo,
Qua cura, quanam laudis adorea
Plenis honorum muneribus tuum
Venisset, æternæque nomen
Per titulos memoresque fastos?
Fallor: virorum nam Rosendalii
Frequens in ore est nomen amabile,
Eritque, dum suus disertis
Iustus bonos fuerit Camænis.
Præclara virtus nil habet inivium,
Perrumpit acris per remoras suas,
Nullique non vivo, aut perempto
Præmia restituit laborum.
Tu, cum juvenis ver ageret suum,
Te munisti vi sapientiæ,
Sciens nihil nos possidere,
Præter opes animi, perennæ.
Cum fratre primus semper in arduos
Ausus volabas, esse putans pigri,
Non eminere cursitantem
In stadio studii decoro.

Nempè illa magni pectoris indoles
Sua recordans semper originis,
Insueta tentat, æque duris
Ad decus egregium resultat,
At nunc sacrato Concilio Patrum
Fulges supremis auctus honoribus,
Hic te stupefunt, dum, deserto
Ore tonans, sacra jura reddis.
Ut nauta pressus in medio mari,
Tumultuoso Plejadum chorò
Scindente nubes, auspicatos
Tyndaridum speculatur ortus:
Sic te misellus suscipit innocens,
Periclitantem presidio tuo
Causam tuentem, mox triumphum
Latus agit posito timore.
Amore justis hæc perficis integer,
Nam spernis altò dona clientium
Vultu, satisque magna merces
Est animo, meruisse rectè.
Ergò vir ingens, Te, decus ô meum,
Diu reseret publica faustitas,
Te dico, cujus vita prodest
Omnibus, interitus noceret.

Ad eundem, cum Vxorem suam, omni Virtutum genere
ornatissimam Matronam, defunctam lugeret.

Prestans Senator, nate in exemplum
omnibus,
Qui consulendo catui mortalium,
Perenni claram demerentur gloriam;
Quamquam dolendi causa sit justissima,
Adempta terris illa portio tui
Marita cordis, cujus annorum tibi
Series adacta adanxerat canam fidem;

Tamen induendus dissimillimus tuo est
Vultus dolori, lacrymæ sub pectore
Tibi devorande. Suadet hoc cunctis patēs
Famæ theatrum, in quo locatus, maximam.
Debes tueri mente personam tuam.
Plebeia corda, quæ abest capax sui
Mensura, luctus nesciunt modum sui,
Illisque longus ponit arumnas dies,

Ratione

Ratione quas determinare te decet.
 Mortalitatís Vxor excepit suæ
 Legem statutam, quam movere non valët
 Cura, labosque huic purpurata natio
 Iovesque terre, pauperesque subjacent.
 Natura prudens, quod gravissimum putat
 Humana turba, fecit omnibus mori
 Commune, quò se veritatem æqualitas
 Fuit: l'varet: omne possit id sibi,
 Quodcunque tellus fert in auras luminis.
 A ventre matris tale nos fatum manet.
 Hoc cogitans Matrona, quæ prudentiam
 Plus quam virilem præferebat, indies
 Se preparabat semita optatissima,
 Quam prævio trivère majores gradu:
 Iam jamque mortis lineam videns sibi
 Sensim admoventi, sircinüs lectus suis
 Fatalis hore, lata, vultu interrito

Punctum præcata est; quò solutus spiritus
 A mixtione terre corpusculi,
 Adscriberetur Cælitum dulci choro.
 O ter beatos, qui fide, innocentia
 Vita peractæ, demeruerunt id sibi,
 Ut inter astra Cælites micent novi.
 Tunc nostra mens, quod gaudet, demum
 tenet,
 Quando exsoluta, separata, libera
 Tenebrosi corporis custodia,
 Cæleste toto fulgur admittit sinus.
 Hoc chara Coniunx experitur, hoc videt,
 Postquam cadus sæculi & mortalium
 Rebus Valere dixit, atque Plaudere.
 Iam turbidis subducta tempestatibus,
 Humana ridet, in Salutis stans vado,
 Et, (siquid umbræ mentis est) cunctos rogat
 Ne turbet nullus hanc quietem questibus.

Ad Amplissimum Virum

GERARDVM VERLANIUM.

Maxime Verlani, patria pater, at-
 que Senatus
 Immortale decus; si quem dixisse beatum
 Ante obitum licet, & frigentis iusta se-
 pulchri;
 Te merito dicemus eum: Nam pondera
 rerum
 Quas humeris fulcis, veluti fortissimus
 Atlas
 Aethers ardentis stellantem sustinet axē;
 Deponens; urbemque tuam, strepitusque
 perosus,
 Confugis in gremiū tibi te reddētis agelli,
 Hic securus opum, & vani contemptor
 honoris,
 Diligis innocui divina silentia ruris,
 Et caligantes sacra formidine lucos
 Perreptans, patriam lætus consurgis in æ-
 thram
 Mente una, suprema petens, taciteque re-
 volvis
 Gaudia, quæ olim es fruiturus, quando,
 relictis

Corpore, cælestes conscendet spiritus arces,
 Fortunatus senex, qui deterioribus annis
 Has delegisti sedes, quas nec sitis auris
 Incolit, aut miseris invertebat ambitus
 urbes,
 Sed mentis securus quies, quæ prævalet
 omni
 Thesaurus, regumque opibus, clarisque
 triumphis,
 In quibus assidua posuere cubilia cure.
 Hic tibi contingunt solatia grata senectæ:
 Nam tectas avibus pedicas moliris, &
 anceps
 Decipis, aut lepori villosa retia tendis,
 Aut vitem, ramosve putas, sessusque pu-
 taudo,
 Membra salutifero tradis mulcēda sopori,
 Quæ molles herbe, aut viridissima grami-
 ne ripa est,
 Vidarum suadente sono, quæ lævia lapsæ
 Saxa per & fulebras, grata raucedine
 plaudunt.
 Interea errantium resonat per prata boatus.
 Vacca-

Vaccarum, numeros volucres meditantur, & auras
Mulcentes, grato mala tedia murmure fallunt.
Aut quando excubitor lucem prænunciat ales,
Quæ somni, atque operum iustas disternat horas;
Tityrus egreditur tectis, pinguesque capellas
Per creperam lucem comitans in pascua ducit;
Defessusque viâ, roranti culmine montis
Considet, & calamò veteres decantat amores

Aemulus Ascræo vati; vel pectora lusu
Oblectans, agiles ad luctâ concitat hircos.
Quàm jurat hæc vidisse senem, quem nulla fatigat
Cura, nec occultis sudât præcordia culpiæ
Hæc tibi fata diu Verlanî gaudia præstent,
Dum (quod contingat serò) terrena relinquens (nates.
Purior ad patrios mens est reditura penam
O mihi si quondam talem dent Numina ritam!
Non ego divitias Arabum, non regna potentum
Prætulêrim, modicò sat fortunatus agello.

Ad Incomparabilem virum DOMINICVM BAVDIVM I. C.
 & Historiarum quondam Professore, cum Civilis & Moralis
 sapientiæ Monita, Lugduni Batavorum ederet.

O D E.

Qualis minister fulminis ignei
Ales, Tonantis perpetuus comes,
Cælus anhelans puriores;
Spernit humum fugiente pennâ:
Cunctasque post se deserit alites,
Non sustinentes lumina Cynthii,
Quæ ferre jam curâ paternâ
Condidicit teneris ab annis:
Talis, perustus Baudius igneo
Calore pectus, evolat altius,
Supràque mortales caducos
Exerit ingenii vigorem.
Sic magnus olim Fluccus in æthera
Rupit, potenti numine concitus,
Sic semper ad laudem, decusque
Erebitur generosa virtus.
Tritas popello currere semitas
Spernens, viarum diligit aspera,

Hic collocata scit laborum
Pramia, perpetuæque curæ.
Sic perge Baudi, propositum preme,
Nil Momus in te, nil tua tempora
Ingrata viris, invidorum
Nil streperi poterunt susurri.
Virtus Pyropo lucidior, sibi
Vult invideri, quoque magis furit
Gens nocturnarum, fulgurantes
Hoc magis ejaculatur ignes.
Ut suber undis usque supernatat,
Mergi repugnans: sic tua gloria
Injuriosa mole pressa,
Altius evolitabit ales.
Tu posterorum laudis adorea
Recens vigebis, immeritò mori
Cælum recludetur, nitensque
In medio statuêre Vatum.

Poëta eximio DANIELI HEINSIO Gandensi; apud
Batavos Lugduni Professori dignissimo.

O D E.

Poëta magne, qui tacitè mihi
Nondumq; visus carmine junctus es,
Quo maximo pridem placebas
Scaligero, egregioque Doussè;
Quæ Suada; quis nos insinuet (precor)
Sodalitati Mercurius tua
Quis det mihi frui Heinsiana
Colloquio, salibusque linguæ?
Tecum nec aurum, materiem mali,
Nec obstupescam sceptræ regentium,
Non ambitum mirer clientum,
Non hominum miseros honores;
Hæc cuncta magno pectore rideam,
Velutque celsò culmine montium
Locatus, hoc inane rerum
Desuper aspiciam quietus.
Visemus altos hæc positi solo
Simul recessus ætheris ignei

Mentesque perrumpent coruscum,
Corporea sine mole, cælum,
Excelsa magni pectoris indoles:
Humi morari nescit, in arduum
Erumpit, hic adstans Tonanti
Æthereos speculatur ortus.
Quanta hæc voluptas cernere siderum,
Tellure spretâ, luciferos globos,
Et machinæ: molisque tantæ
Mente Deum stupuisse fabrum?
Natura nobis consimilem Diis
Mentem creavit, omnia pervolat
Currrens, recurrens, inque sese
Hoc patulum capit univèrsùm.
O quisquis illam sic habet, ut suprâ
Opes, honores, vanaque cætera
Consistat, is suo caduco
Cælicolas imitatur ævo.

Ad Familiarem quendam suum.

M Iraris usque, cur sacer votum chorus
Contemnat urbes, & suas sylvas
amet:
Hæc causa, Amice, est: Urbs strepens
tumultibus,
Suisque curis; cogitantibus nocet:
Nam sicut altum promovet silentium
Ad alta mentes, sic tumultus dejicit,
Sinitque nullam vindicare se sibi
Adde & quod ardens ingenti nostri vi-
clandi recuset urbis repagulis, (gor
Volens aperto divagari in æthere.
Hoc sylva præstat, hic per alta collium
Errans vireta gaudet, & molestiis,
Curisque liber concinit carmen Deo.
Movet calores interim silentium,
Quiesque ruris, aura leni sibilo
Favet canenti. Quis, (nisi poëticum
Qui non subivis limen & dulces fores)
Nil mente magni cogitet? cum per sacras

Noctis tenebras divagatur undique
Silente mundo, quam juvat tueri
Cuncta intuentum siderum frequens de-
cus,
Et prata vultu roscido madentia?
Cum nox recedit, lux recurrit aurea;
Vigilemque ratem suscitant ad munia
A parte cuncta consonantes alites;
Tunc rursus horti conteneri purpuram,
Agmenque florum nocte natorum libet.
Collesque picti primulo diluculo
Recente rore pectus ad sese trahunt,
Hic aut petulci sunt ei carmen capri,
Aut fons sonoris bulliens è rupibus,
Aut Phyllis imis delitescens vallibus
Malis laceffens fistulantem Tityrum.
Quanta hæc voluptas versibus sylvestribus
Cantare? quando tale præstant oppida,
Quæ quam tumultus, nil habent, atque
ambitum?

Ef

Hæc

*Hæc causa Amice est, cur sacer vaturn
chorus
Contemnat urbes, & suas sylvas colat.
O si mihi olim Cælitum benignitas*

*Tribuat quietæ præta solitaria
Habitare, quæ nunc arido rivo fluit,
Torrentis instar vena manaret mihi.*

**Addoctissimum Virum, D. GUILIELMVM TRAVDENIVM
Præceptorem olim suum.**

Traudenî columen novem sororum
*Qui, me Socratico sinu receptans,
Mores ingeniumque fabricasti;
Quid te, dulce Decus meum, coëgit
Tam diu sollicitâ morari in urbe?
Non auri sitis, ambitusve, mentes
Cogens quidlibet & pati, & patrare,
Sed mens sedula, gnava promovendi
Tuos discipulos ad altiora;
Visne? dum Canis æstuans calore
Solvit corpora, dissecatque campos;
Linguamus strepitus furentis urbis,
Secessus tacitos petamus horti,
Musis dulcibus optimi sodales?
Hic pronus tremulâ cubans in umbrâ,
Si quos fortè tibi tuæ Camæna*

*Plectro versiculos Horatiano
Dickarint; mihi præleges, vicissim,
Si quos Lux mea, promovens calores,
Rudes versiculos sonare coget
Agresti calamo; tibi legentur.
Iam mihi videor perambulare
Dulces areolas, per & vireta,
Nunc rursus videor loquace ripâ,
Mulsus lenibus arborum susurris,
Grata carpere somnulum sub umbrâ.
O senior hortuli voluptas,
Tu nostri requies laboris esto.
Fœlices ter, & amplius putandi;
Quos summus pater, arbiterque rerum
A turbis voluit tumultuosos
Remotos; sibi vivere, atque obire.*

**Prosoopœia mortui nostri reverendi Avunculi magni,
HENRICI IOHANNIS THARDT.**

O Curvæ interris animæ, & cæle-
stium inanes,
*Quid mea flebilibus violatis busta que-
relis!
Quid sibi vult gemitus? quid singultan-
tia verba,
Quæ medio fletu vox intercepta profatur?
Vtique adeone mori miserum est? ab sisti-
te fletus,
Sistite, ne tali sitis pietate profani,
Debita naturæ mors est, Caput omnia
tellus
Qua genuit. Stultum est communem
plangere sortem,
Omnibus hæc lex est, hac conditione crea-
mur.
Tum decuit flevisse viri, cum luminis oras*

*Parvulus ingrederer, subiturus vincula
diri
Corporis, & mundi immundi passurus a-
marum
Servitium. Exuvia, falseque incommo-
da lucis
Istic nunc mala turba jacet, nos nobile cæli
Depositum, optatâque domo, patriâque
potimur,
Vixi, & quem dederant cursum mihi fa-
ta, peregi;
At jam parta quies, nullum maris æquer
arandum
Amplius, æterno fundata est anchora
fundo:
Nunc animus tandem cælo prorumpit a-
perto*

*Libet & , humanis quantum insit rebus
inane ,
Despicit , ac ridens latatur sine laborum .
O bona mors , portus , statioque aptissima
fessis
Mentibus , eheu quàm cæcis erroribus a-
ctus
Et Sirenaïs degens in cautibus orbis ,
Teque , tuasque simul studui vitare sa-
gittas ,
Demens , heu nimium demens : nam mors
mala nunquam est
Quam bona præcessit vita , & meditatio
vite
Alterius , sed quis pariter cum corpore
putri
Omnia putrescunt ; his formidabilis ad-
stat .*

*Fœlices lethi , pietas quos addidit astris
Quid vita est aliud , gravium quàm Ler-
na malorum
Cui comites sunt ; Spes , Metus , & non pu-
ra voluptas ,
Dura palastra piis , donec mens alta su-
umque (sa est :
Aspirans ortum , squallenti carcere clau-
Nam ratio , residens capitis sublimis in
arce ,
Asiduoque suum cupiens defendere regnũ ,
Cogitur Affectus servos tolerare rebelles ,
Injustumque jugum : Nam terra , terrea
moles
Corporis affixa est : Ratio cœlestia anhelat ,
Perpetuum est bellum hoc , nisi dictatura
Tonantis
Sese interponens capitales separet hostes .*

Ad undequaque doctissimum Mathematicum D. W I L-
B R O R D V M S N E L L I V M . R . F .

O D E .

O Magna magni progenies patris ,
Cui latentes pandit origines
Natura rerum , Cœlitumque
Hac fragili facit esse terrâ ,
Quam vim Prometheus ille hominũ sator
Creando vestris indidit artibus ;
Quo finxit è luto latentes
Pectoris omnisii recessus ?
Non viltori , non equidem puto :
Sed apprehensam Palladis è sinu
Prudentiam , quam cæterorum
Parcius attribuit creandæ ,
Menti ; tibi unius largius addidit :
Nam tu caducis cœtibus altior ,
In astra tendis , sordidamque
Spernis humum fugiente pennâ .
Mens orta cœlo spirat originem ,
Pigroque quamvis carcere clauditur ,

*Hanc patriam tamen revisit
Corporea sine mole velox .
Hac est voluptas , hoc tibi gaudium
Videre Cœlos , & vaga sidera ,
Notare solis , atque Luna
Umbriferos animo labores .
Nos cogitantes nil nisi terrea ,
Segnes veterno , particulam sacram
Fœdamus , & caduca stulti
Præferimus bona sempiternis .
Vt bruta quis in pastibus est sita
Vis omnis , & quis terra poli vice est :
Sic nos vagamur , mensque sedit
Inferior capite elevato .
O te beatum Snelliade , cui
Deus creator pectoris hanc dedit
Vim , quam reserves donec altos
Cœlitum repetas recessus .*

Ad ingenuum, verèque nobilem adolescentem, D. GYSS-
BERTVM DVVENVORDIVM.

O D E.

Quid bella semper, quid gladios crepas,
Ludosq; Martis, O Iuvenum decus?
Hâc mente non, hos in usus
Pierides minimè educarunt.
An non (amabo) dulcius est, suos
Versare libros, cumque sacro choro
Novem sororum, molle carmen
Gorgoneo resonare monte;
Quàm nigricantem cernere sanguinem
Spumare terris, & subitos sonos
Audire, cum tormenta belli
Fulmineos jaculantur ignes?
Cælo beabunt Pierides tuum
Nomen, nec ullo sanguine gloriam
Hunc consequeris, cum triumphus
Bellicus, immodico cruore
Nisique constet, sapius & comes
Sit ipsa mors, quæ lege pari rapit
Imos, & insignes, ducesque
Militibus minimis adæquat.

Quod si severum propositum premas,
Et militandi mens sit; honestius
Monstrabo bellum, quod gerendum
Proposuit Deus unicuique;
Te vince. Summa est hinc animæ salus
Tibi futura. Rex eris omnium
Fortissimus; cum turbulenta
Rex fueris, Dominusque mentis.
Vides ut intus seditionibus
Contagiosis omnia ferveant,
Hinc ira surgit, hinc libido,
Inde fames male suada fama,
Suos tyrannos fert Ratio impotens,
Cui jus regendi Dii dederunt tui,
Nil frena profunt, in ruinam
A propriis raperis quadrigis.
Compone bellum hoc: Frustrà etenim foris
Certatur; intrà mænia sis furor
Grassetur hosti, civitati
Insidias meditans doloque.

EPITHALAMION

In Nuptias Consultissimi viri, D. PETRI WALENBURGII,
& lætissimæ Virginis GEERTRVDÆ LANGII.

Quondam Diva Venus (favete dictis)
Infantem peperit, Dii Deaque
Omnes conveniunt, & inter illos
Partum Iuppiter ipse gratulatur.
Arrisit Superis puellus, aëst (heu)
Ridendo pupugit Iovem miscellum,
Nam febrim trepidos statim per artus
Latè serpere sensit, intimaque
Cæcis ignibus exedi medullas:
Chiron consulitur, tremente Venam
Tentat pollice, sed suo tenore,
Non præter solitum, refert morveri.
Ridet Iuppiter artis imperitum,
Compellatque Themis, cui Deorum
Datum munere vera prædicare;

Hæc sub vestibus asserit Sororis
Medelam dubii latere morbi;
Statim Iuppiter Alite expedità
Iunonem petit, memorque dicti
Quæsit medicamen à Sorore.
Nec sibi modò scrivit hanc medelam,
Sed seris quoque posteris reclusit.
Hinc quando petulans Puella sese
Offert luminibus, suosque nutus
In nos ejaculatur; impotentes
Toti solvimur, integerque sanguis
Ferret turbidas, expetitque jungi.
Sciens Virgineo in sinu medelam.
Testis Sponse, cui cupitus ardor
Iam nunc in gemitu quiescit ulnis.

O quam

O quàm flamma tuos peredit artus,
 Dum morbi taciti latens origo
 Sensim serperet alius, suisque
 Per contagia cresceret veneni?
 Virgo blanda, proterva Virgo quas non
 Tibi nequitias libidinesque
 Parabat, digitis & ore blando
 Dum dulces caneret modos Amorum,
 Nunc rursus regida velit Sabina
 Omnes sperneret impetus Amoris?
 Tu tu saucius undecunque, Venis
 Cecum vulnus alis, foveſque flammam.
 Et petos quoties vides ocellos
 Toties jecur omne devoratur.
 Tandem longius hoc jugum perosus,
 Ignem detegis: illa post molestas
 Perpeſſas hyemes, graveſque noctes
 AEquales quoque concepit calores.
 Felix post varios cui labores
 Conſingit placidum ſubire portum,

Felix ſponſe, cui datur potiri
 A quâ tulerunt Proci repulſam.
 Eja nunc age ſint procul remota
 Pura carniſices ſerenitatis
 Curae, ſemina peſſima ſeneſcæ.
 Viſtor ſervide vindicato temet
 Linguâque, oreque, morſiunculâque,
 Et pro noctibus, aſperisque verbis
 AEquales dato baſiationes,
 Minuta ſacule, minutiores
 Dii Celi, nitidi Iovis Quirites
 Apparent, vocat Heſperus, Venerſ-
 que.

Vos caſti comites thori puellæ
 Sponſæ figite baſium ſupremum
 Cras matri ſimilis ſuæ redibit.
 Ite nobile par, valete multam,
 Et brevi datæ filios tenellos,
 Qui vobis lepidi ſus loquelis
 Levent tadia proxima ſeneſcæ.

Doctiſſimo & integerrimo Adoleſcenti D. GERARDO
 BRONCHORSTIO, Clariſſimi Viri Everardi
 Bronchorſtii filio, cum Lugd. Batav. publicè
 de jure reſponderet.

Hæroe natis quanta neceſſitas
 Incumbit altis ire per impetus.
 Semperque ſe præſtare dignam
 Egregio ſobolem parente?
 Locus latendi talibus haud datur,
 Inſueta ſperat vulgus & omnium
 Arreſta corda pollicentur
 Nil treviale ſibi aut minutum,
 Hinc celſus urget ſpiritus, hinc pudor
 Hortatur acer, promovet inſiſtas
 Vires, & imbelles lacertos
 Auſibus exacuit probandis.
 Ne facta patrum deſidia ſua
 Fulcrum putantes, & genus improbent,
 Seſeque quo ſunt clarioreſ.
 Degeneres magis eſſe prodant.
 Nam geſta patrum nobiliſſimum, nota
 Sunt filiorum degenerantium,
 Ut turpitudine clarioris
 Lucis ab oppoſito probatur.

Hoc cavet olim Dardanius Puer,
 Dum non inertes, vel timidæ ſeras,
 Sed patriæ virtutis hæres, (nem.
 Optat Aprum, aut rabidum Leo-
 Innata virtus omnia perpeti,
 Quàm turpe mavult opprobrium, neque
 Mors ipſa ſi premat, decori
 Propoſiti moveat tenacem.
 Hic ardor, hæc vis te quoque compulſit
 Multis negatam tendere ſemitam,
 Bronchorſti, inacceſſos parentis
 Dum ſequeris generoſus auſus,
 Parentis ejus, qui geminos polos
 Fame levatus curribus arduis
 Percurrit, & ſui nitore
 Nominis obſtupescit omnes.
 Quem nos tonantem de cathedrâ ſuâ
 Audimus alto turba ſilentio.
 Doctoſque pendentes ab ore
 Legiſerum rediſſe Panlum

*Censurus astris. Perge age spes patriis
Implere tanti, principia hac erunt
Majoris ausus mox & ipsum
Nomine reque dabis, parentem.*

*O ille quantâ latitiâ caput
Hinc inde sparsum canitæ, dabis
Sua quieti, cum videbit
Se in proprio superesse nato.*

Honori eruditissimi modestissimique Juvenis D.

JACOBI REALI. P. F. cum publicè

Lugd. Batav. Theses juridicas proponeret.

PRudenter ille Reclor & rerum parës,
Probo cuique candicantes gloria
Inserit ignes, quos flabello provido
Dictator ille terreis corpusculi
Ratio fovere debet, & reklä viâ
Virtutis, altum promovere ad æthera;
Divina namque mens licet suo sibi
Placeat theatro, quatenus cæli sui
Est emulatrix, atque simplex, attamen
Honorem anhelat magna quatenus riget.
Hinc ardor ille Heroicus spernens moras
Insueta tentat, seque vix velox capit,
Temni que censet dulce Virtutis decus
Contempto Honore. Testis es magno patre
Condigne Fili; qui perustus Gloria

Calore; dignum laude certamen subis
Redisque victor, non superbos sanguine,
Sed pulchriori Gloria fulgens face.
At heus monendus hoc tamen discas ve-
lim,
Insiste pugna huic, ne remitte spiritus,
Faceat omnis torpor, & pigrum pecus
Fucos habere res suas sibi jube:
Hi namque sese putrido fixit solo.
Fædè remittunt, nesciisque originis
Populare menti nobili imponunt jugum,
Virumque funus ambulant, donec solum
Illos repositat, nilque præter spiritus
Abominandos naribus linquunt suū.

Nobilissimi, doctissimique Juvenis D. BARTHOLDI
WICHERINGII albo inscriptum.

Nobilitas, splendorque patrum, quos
ardua virtus
Extulit, & quorum, jam tot labentibus
anniis,
Fama viret, natos, & qui nascuntur ab
illis
Admonet, ut laudes partes insignibus
ausis,
Accumulent virtute novâ, ne monstra,
suaque,
Degenere fuci, fiant injuria gentis:
Sed miseros persæpe patres spes lactat in-
anis.
Dum soboles nimium generis suffulta ni-
tore,
Egregiumque putans per testamenta re-
linqui

Nomen; in obscuras detrudit pulchra
tenebras
Gesta patrum, nilque ipsa animo lauda-
bile volvit,
Sic Heros quondam, domitis agnomen
ab Astris
Cui virtus invicta tulit, splendoris acer-
bam
Pertulit eclipsim in nato; præclaraque
magni
Facta patris, sobolis crimenque & stigma
fuerunt.
At te flos juvenum, quem quondam cura
benigni
Sideris, & placido viderunt lumine
Parcæ;

Mens

*Mens alio impellit: nam fama incum-
bere patrum
Vile putās; proprio gestis splendere nitore,
Non secus ac quondam generosi seminis
infans
Magnus Alexander, fertur doluisse,
parentem
Omnia jam vicisse, sibi que haud esse re-
lictum*

*In quo virtutis propria queat edere si-
gnum.
Macie animi Iuvenis, semperque hanc
comere partem
Perge tui, qua, cum vitientur cuncta
Senectū,
Emicat, & longis vires sibi sumit ab an-
nis.*

Ad Amicum quempiam.

Dum tu molesto commorans in op-
pido,
Amice curas, quid severa cogitet
Cohors Iberi, quisve publice rei
Status sit aptus, atque vertici tuo
Curando crines albicantes inprimis;
Ego solutus omnibus molestiis,
Horti beatos terminos latos colo;
Hic in virenti molliter ripa cubans,
Mulsus susurris arborum trementium,
Aut garrienti fluminis lymphâ vagi,
Carpo sopores, aut sub undis vitreis
Pisces hiantes fallo glabrâ arundine,
Aut inter agnos debiles, & hadulos,
Bovesve stratus tale carmen concino,
Ascreus olim quale rates condidit;
Quando in reduclis montium cubilibus
Satyros stupentes detineret versibus.
Aut quale quondam consonabant Ar-
cades

*Cum seva nondum turma militantium
Miseros Menalcas, Daphnidesque è pa-
scuis
Propriis recedere exules coëgerat.
Quam dulce tunc est, cum boatas interim
Gregis cubantis obstrepat, vel fistula
Cogentis agnos in vireta Tityri?
Hinc grata texunt arbores umbracula,
Eduntque lenem sibilum motus comis,
Hinc unda pronis murmurat decursibus.
Illinc ocellos sylva pascit florida,
Aves per omnes salitantes ramulos
Plero citroque cantibus me recreant,
Viresque mentis solitudo suscitāt.
Inunc, tuamque compora vitam mea
Memet beatum, te misellum dixeris,
Vereque dices esse nil fœlicius;
Quam dissolutum posse curis vivere,
Desideratoque hortulo acquiescere.*

Præcepta quædam cuique sapienti servanda.

Quisquis beatam Cælitum vitam sequi
Mortalis optat: hac sibi quam sedulo
Serranda ducat: Constitutus in statu

*Modico, quiescat, non anhelans alterum.
Talenta Cræsi vincit alto pectore,
Qui vivit insons sorte contentus sua.*

Aliud.

Ad latioremersus ex sorte anxiam,
Semper priores sit sui status memor,
Metuens secundos, providus recte, Deos:

*Quo sortis aura fluctantis altius
Evexit, ac levavit humanas opes,
Hoc ad ruinam prominent magis suam.*

Aliud.

Aliud.

Illustre quamvis numen & decus gerat ;

Non intumescat ; Namque nulla certior
Nota impotentis, quam tumens superbia,
Virum potestas arguit; tunc optime

Quid quisque sit cognoscitur ; quando
decus

Defertur illi : qui remitti spiritus
Animi superbos ; tollitur, qui surrigit,
Calcatur usque, singulis fastidium.

Aliud.

Sive in secundis, sive rebus asperis
Positus sis, alta mente terram deserat,
Cælumque (sicut Armiger magni Iovis)
Vestiget, & , quod hic situm est sum-
mum bonum.

Quicumque terra fixus haret torpide
Dulci veneno inebriatus plurimum,
Hic jure vivens est vocandus mortuus
Contemptares mortalis est, nisi supra
Mortalitatem surgat, & calum petat.

O DE.

Eheu quam rapidis tempora passibus
Nobis praterant : volumur indies
Ad metam miseri, nec senium tamen

Perfensiscit homo suum,
Incrementa brevis, (si bene computes)
Ætatis, proprio nomine dicier
Decrementa merent : nam perit hic dies
Quem vita audier autumant.

Inter sordidulas sollicitudines
Ætas tota perit. Nil homines, nisi
Nugas, parturiunt nisiBUS improbis,
Nemo se sibi vindicat.

Hic vani tituli turget honoribus,
Monstrari digitis magnificum putans,
Cum mors æqua tamen singula destruens,
Spernat magnificum decus.

Hic certamen opum cum reliquis init,
Et dives loculis, pectore pauper est,
Duro menti cupida sors sua displicet
Et sors alterius placet.

At quantas animi sollicitudines
Ponit, qui fragiles res hominum æstimas,
Vitam condidit spernere flebilem,
Vivens fata preoccupans ?

Hic curis hominum mortuus omnibus,
Ignotusque aliis secum habitat, sibi
Prudens usque vacat cunctaque negligit,
Extra se nihil expetens.

Non hic spe fluitat pendulus horula
Incerta, quoniam dicere huic licet
Vixi, spem refeco, quod superi dabunt,
Apponam facili lucro.

Hujus non animum sollicitant opes,
Nam, quodcumque Dii contribunt, capit
Gratus, quod rapiunt, restituit, suis
Se virtutibus implicans.

Tantum vel modicis conditionibus
Mens contenta valet. Ditior omnibus
Hic audire meret ; paucula qui tenens,
Nil majus tamen expetit.

Venaris ? stolidè quò fugis ? heu brevis,
Ævi, multa petis ? regna, potentiam
Quid mortale genus ; hoc spatio redi,
In te singula desident.

Regnum perpetuum mens bona possidet,
Mentem quare bonam, cætera negliges ;
Hanc cum nactus eris, tum sapiens scies
Quam non sana petiveris.

Piæ aliquot Meditationes.

MEDITATIO I.

Immensa Reflor Cælitum,
En lux recedit publica,
Vicibusque mundum debitis

Nox eminens amplectitur ;
Te supplicantes poscimus
Fugare nubes pectoris.

*Ut dum carere lumine
 Illo diali cogimur,
 Lustremur omnes cœlitus
 Divinitatis lampade.
 Da corpori laboribus
 Fesso diurnis, molliter
 Pieque, conquiescere;
 Quo sic reſectis, viribus,
 A laudibus tibi debitis
 Solita auſpicemur munia:
 Sed inſtat hoſtis, ac parat
 Arcum, & ſagittarum minas,
 Exſurge Dux fortiffimi,
 Illique ſperatum diu
 Palmam reſiſtens præripe.
 En præliandi callidus
 Occaſionem jam capit
 Et ſempiternis nititur
 Mentem implicare nubilis,
 Nunc tortuoſus Proteus*

*Se blandienter ingeret,
 Nos per meandros plurimos
 Sibi ſubjugare cogitat,
 Modò ſurorem Panicum
 Intentat, atque corpori
 Rabiem minatur inſolens,
 Ut preſſus arida fame
 Lupus, undecunque circuit
 Imbelle Paſtorum pecus,
 Quod ni Molosſicùm Canum
 Amica viſ defenderit,
 Iam morſibus totum patet.
 Adeſto Paſtor cordium,
 Illamque partem Spiritus
 Tui tuere traducem;
 Ut poſt laboris plurimos,
 Quos exulans fert indies;
 Cælo recepta gaudeat
 In patriis ovilibus.*

M E D I T A T I O II.

Quonſque tandem Mens mea,
 Tradux Supremi Numinis,
 In ſordibus fœdiſſimis
 Hærebis hujus ſæculi?
 Exſurge, ſurſum te vocat
 Origo cœleſtis tua,
 Habitusque celfi corporis.
 Quamvis parat cupidinum
 Aëſtus rebellans prælia,
 Et jam reſectis viribus
 Inte paratam cominus
 Signum movet, reſiſtito,
 Namque eſt triumphandum malum.
 Sed, heu; moras recalcitrans
 Intexis? an mundi decus,
 Aut umbra vana gloriæ
 Pedem paratum detinet?
 Hac cuncta mundi ludicra
 Habere res ſuas jube
 Quo ſit locus cœleſtibus:
 Ut ægra namque luminum
 Acies, Dialæ Cynthiæ

*Tolerare lumen non valet;
 Sic preſſa mens caligine
 Mundi caduci, fulgidum
 Dei jubar non ſuſtinet.
 Quid vita? nunquid omnium
 Centrum dolorum, quod Metus,
 Et Spes futurorum ambiunt?
 Nulla hic voluptas candida,
 Sed ſemper illius latus
 Mæror velut comes fodit.
 Iam forſan incubat tuo
 Mors atra collo, quæ vetat
 Spes inchoare credulas.
 Stat cuique vitæ terminus
 Fato locatus, quam propè
 Verſetur ille, incognitum eſt.
 Hæc ergo crede Maximum
 Tibi Imperatorem loqui;
 Eſt tranſeundum, ſarcinas
 Paratus Hoſpes collige.
 Quidnam reponet? heu miſer,
 Hic nullus eſt mimo locus;*

*Velo levata singula
 Illi patebunt; Intimo
 Tunc eruentur pectore
 Voces sine arte. Tunc eos*

*Dices beatos, indies
 Qui providi vite sue
 Manum applicarunt ultimam.*

MEDITATIO III.

Quocunque Rerum Conditor
 Aciem reflecto luminum,
 Nostri recurvat undique
 Fucies status miserrima;
 A fletibus primordium
 Haurimus avi, huic consonat
 Exinde vite fabula.
 Bores, oves, & alites
 Simul atque in auras luminis
 Insuperant, nixus suos
 Et functiones explicant,
 Nos destituti viribus
 Et vagientes flebile,
 In sordibus miserrimis
 Et fœdeolenti fœcore
 Pereamus omnes, ni statim
 Nutricis occurrat manus.
 Iam quando adulta nos viris
 Adscriptis atas, undique
 Cura æstuant in gruunt.
 Virumque solis tramitem
 Percursitamus sedulo,
 Vt adsit, unde corporis
 Necessitati sit satis:
 Cumque arbitramur undique
 Nosmet beatos, intonans
 Fortuna fallax, nos humi,
 E maximis fastigiis,
 Gravi ruinâ dejecit.
 Adeo cito mortalium
 Fœlicitati syllaba
 Accedit una. Quid loquar
 Morbos, & ærummas graves,
 Quis usque & usque subiacet
 Mortalis imbecillitas?
 Nunc mordet illud, nunc premit
 Nos ille vite carnifex.
 A parte cunctâ denique

Nunquam beatos Sol videt,
 Vt inquilini sedibus
 Dubiis vagantes, rarius
 Habitant quietè aut commodè:
 Sic donec hic perfungimur
 Mortalitati munere,
 Cœlestis arcis exules,
 Iactamur incerto mari.
 Ita Imperatori Deo
 Visum, placetque, nec potest
 Autoritate propriâ
 Statione quisquam excedere;
 Ne dirus atque pertinax
 Desertor ejus audiat.
 Vt mensibus novem tenens
 Nos matris alvus, aëri
 Cœlique tempestatibus
 Corpusculum hocce preparat:
 Sic & per has tristes moras.
 Mortalis avi, nos Deus
 Vite sequenti fabricat.
 O ille decretorius
 Quando appetit nobis dies
 Qui mixtionem corporis
 Animique nostri separat,
 Tunc gaudii denum locus,
 Tunc intonandum lætus,
 Pars illa nostri sanctior,
 Capaxque sublimis Dei;
 Hæc servitute flebili
 Soluta, patriæ suæ,
 Originiq; redditur,
 Quodcunque circa se videt
 Rei caducæ, despicit,
 Linqvitque non ingratis
 Iamque inter alios Cœlites
 Locato, mortales videt,
 Et ridet actus; utpote

Cui nota nunc aternitas,
Bonumque summum, quod viis
Variis vagando erronei
Homunciones querimus
Hac feritatis sensibus,
Affectibusque corporis,
Dum mente mecum rumino;
O par Deo Patri Deus :
Opto diem qua deseram

*Hoc contubernium mali,
Interque sanctos Martyres
Et simplices columbulas
Aevo pereuni persruar.
Hoc da Creator omnium,
Vbi limitem fatis datum
Peregero; sic sit tibi
Cum Paire summo gloria
Per seculorum secula.*

F I N I S .



1. The first part of the book is devoted to a general
introduction of the subject, and to a description of the
materials used in the experiments. The second part
contains a detailed account of the experiments, and
the results obtained. The third part is devoted to a
discussion of the results, and to a comparison of the
experimental results with the theoretical predictions.
The fourth part contains a summary of the work, and
a list of references.

1. 1. 1.



3.13

1K

